

**APOLOGIA PRO
DECRETO S.D.N.
ALEXANDRI 7. ET
PRAXI
JESUITARUM...**

Domenico Maria Sarpetri, ...



APOLOGIA

PRO DECRETO S.D.N.

ALEXANDRI VII.

ET PRAXI JESUITARUM
circa cærimonias, quibus Sinæ Confu-
cium & Progenitores mortuos colunt,

EX PATRUM DOMINICANORUM
& Franciscanorum scriptis concinnata.

BIBLIOTECA NAZ.
ROMA.
VITTORIO EMANUELE.



LOVANIÏ,

Apud ÆGIDIUM DENIQUE.

M. D C C.



PRÆFATIO.

ANni sunt sexaginta & amplius, ex quo Sinici ritus, quales hactenus Patres Societatis JESU tolerarunt, in Idolatria crimen vocantur: anni propemodum quinquaginta, ex quo Alexandri VII. Decretum, ritus eosdem approbantis, variis cavillationibus eluditur. Atque illo toto tempore nihil fuit, in quo Societatis adversarii sibi magis applauserint, nihil quod jactaverint ambiciosius quam hujus accusationis autores habere omnes eos aut ferè omnes, qui è S. Dominici vel sancti Francisci familiâ Dominicam vineam apud Sinas excoluere. Porro, si illud ultrò daremus verum esse, quod constat esse falsissimum, tantum abest ut contra Jesuitas ea res decretorii vim argumenti haberet, ut ne legitimi quidem ac justii præjudicii loco deberet esse. Quin potius si quid nondum utrâque parte eruditâ præjudicandum foret, non posset nisi pro Societatis causa præjudicari. Et verò controversia est ejusmodi quæ in merâ facti, ut aiunt, questione posita sit, videlicet quid de suo Confucio, quid de Progenitoribus suis Sina sentiant, quid velint iis ritibus aut carimoniis, quibus eos colunt ac venerantur. Ea super questione decerni quicquam in Europa nisi ex Missionariorum fide ac testimonio huc usque non potest. Quod si annumerentur suffragia Patrum So-

P R Æ F A T I O.

cietatis , qui Missionem Sinicam procuraverint ; numerus ter quaterque major reperietur , quàm eorum qui ex utroque illo ordine pedem fixerunt in Sinis.

Nec minùs certum est pluribus eos majoribusque ad rem penitus pernoscendam & percipiendam præsidiis fuisse instructos. Ea enim præsidia sunt , ni fallor , hominum inter Sinas litterarum familiaritas & consuetudo , tum in gentis moribus institutisque cognoscendis , in linguâ tenendâ , in libris pertractandis usus & exercitatio. Cui verò dubium esse potest quin Patribus Societatis cum litteratis Sinensibus longè major & frequentior consuetudo intercesserit: quippe qui annos ipsos quinquaginta antequam ulli ex Ordinibus aliis Evangelium inter Sinas promulgare contingeret , per omnes ferme Imperii Provincias dispersi fuerint , & in Primariis civitatibus atque adeò Regiâ in urbe , domos habuerint.

Certè Navarreta , qua nemo acriùs , nemo impotentius in Jesuitas Sinenses invehit , ultro fatetur eos qui ab universis aliorum Ordinum Missionariis ad Christianam fidem adducti sunt , si componantur cum iis quos Societatis JESU Patres erudierunt , tam paucos esse
Tomo ut Atomî cujusdam instar videri debeant.

2. P. 315. Quod eum verè scripsisse , vel ipsa quam instituit , enumeratio satis evincit. Nam ad annum usque 1677. quo tomum suum posteriorem edebat in lucem , omnium qui ab utriusque Ordinis Missionariis Baptismo tincti fuerunt , numerum facit millium admodum tredecim : quo numero etiam infantuli continentur. Atqui ex

P R Æ F A T I O.

Societatis Missionariis unum appellat P. Branca- Ibid. p.
tum in cujus grege adulti homines essent qua- 235.
dragies mille. Nec abludit historia dominicana
familia, ex quâ discimus eundem illum Jesui-
tam unâ in urbe Xan-hây locisque circumpositis part. 2.
Christianorum habuisse facile viginti millia. pag. 377.

Igitur cum pro Neophytorum numero cresce-
re quoque proportionē soleat litteratorum chri-
stianorum numerus; fieri non potuit quin Patri-
bis Societatis longē plures istorum suppetere,
quorum consuetudine sermonibusque docerentur,
quæ communis Sinarum sententia, qui totius
gentis mores essent.

Fam ut ad linguæ peritiā ac librorum in-
telligentiā veniamus, idem Navarreta homo,
si quisquam alius, ab eo alienissimus ut in gra-
tiam Jesuitarum mentiri quidquam vellet, Tom. 2.
fateri non dubitat libros ab iis Sinicè conscrip- P. 6.
tos eâ eruditione esse ac doctrinâ, quæ non lau-
dem modò sed & admirationem mereatur. Non
deerat igitur, vel ipso teste, Patribus Societa-
tis litteratura Sinica, quantum satis esset ad
instituta gentis illius & doctorum hominum pla-
cita pernoscendâ.

Atque ea quidem sunt ejusmodi, ut nihil
Jesuitarum causæ officeret vel si Franciscani
Dominicaneque qui apud Sinas fuere, in sen-
tentiā contrariam ad unum omnes conspira-
rent. Quis enim est cui non potior illa opinio
videri debeat, cui constet longē majorem nume-
rum testium, & longē plura ac certiora veri-
tatis indagandæ præsidia suffragari? Sanè qui
hoc præjudicii ex hominum mentibus evellere
aggrediatur, necesse est horum alterutrum de-

P R Æ F A T I O.

*monstrandum suscipiat, vel Jesuitas adedò indiligentes atque oscitantes fuisse, ut ea quæ habebant ad rem penitus cognoscendam adju-
menta non adhibuerint, vel adedò protervè sce-
lestos, ut quod verum esse intelligerent, hæte-
nùs deditâ operâ non dissimulare solum sed etiam
inficiari sustinerint.*

*At enim ampliùs integrum non est ipsorum
adversariis, etiamsi maximè velint, ad ejus-
modi accusationem confugere, postquam D.
Maigrot totius hujus causæ caput, ille alioqui
tam parum assuetus Jesuitis parcere, non ta-
men ausus est ita omnem ipsis laudem invidere,
ut negaret errorem cujus eos insimulat, quem-
que damnari flagitat, bonâ fide susceptum ab
iis fuisse. Sic enim fatetur, eam praxim
amplexos esse, quæ sibi in Domino ma-
gis veritati consona videbatur.*

*Jam verò qui in amplectendâ sententiâ, ve-
ritatis unius studio duci se passi sunt, est ne
credibile aut omninò simile veri eosdem agnitâ
semel ac perceptâ veritate constantes in errore
pristino deffendendo fuisse, adedò ut Spiritui
sancto mentiri sustinuerint, hoc est per sum-
mam impudentiam id coram sanctissimæ Sedis
Apostolica tribunali verum testari, quod esse
falsum sua ipsos conscientia admoneret?*

*Neque illud multò verisimilius, eos temerè,
nequaquam exploratâ re, aut sententiam illam
arripuisse, aut semel arrepta postea semper
adherere voluisse. Quid enim? eâne recordiâ,
eo stupore fuisse Missionarios illos omnes, ut ab
annis ampliùs quinquaginta, ex quo hæc con-
troversia tanto undique strepitu agitata est,*

P R Æ F A T I O.

dum ipsi nominatim vocantur in jus atque aguntur rei, dum ad singula accusationis gravissima capita respondere coguntur, dum innumera ex utrâque parte scripta prodeunt, illi, inquam, tanto numero, tantâque rei certius inquirendæ facilitate, omnia susque deque habuerint, & quid verum, quid falsum esset, nihil solliciti, maluerint deditâ operâ Christianorum immensos greges superstitioni suæ atque idololatriæ obnoxios relinquere ac retinere, quàm de susceptâ sententiâ praxique expendendâ cogitare? Tanta vecordia, tantus in tali restupor, nescio an videri posset tolerabilior quam ipsa mala fides: verius dixerim, non posset cum pessimâ fide non esse conjunctus.

Itaque D. Maigrot, dum eos concedit non nisi bonâ fide egisse, eam praxim amplexos esse, quæ sibi in domino magis veritati consona videbatur; hac confessione omnem ab illis suspicionem amolitur non solum oppugnata de industriâ veritatis, verum etiam tante in eâdem indagandâ socordiæ.

Quod si neque malæ fidei, neque verò negligentia crimen, quantum ad eam rem pertinet, iis objici potest; si longè eos majori numero semper fuisse, longè majoribus atque amplioribus ad veritatem facti controversi pernoscendam adjumentis instructos fuisse constat, id est ad sensum animumque Sinensium. In usurpandis cærimoniiis suis planè perspiciendum; quis neget in tantâ inequalitate partium, pro Jesuitis præjudicandum fore, vel si adversarios haberent omnes Franciscanos atque Dominicanos qui hætenus in Sinas Evangelii prædicandi causâ penetrarunt?

P R Æ F A T I O.

Quid jam futurum censebimus, si comperiamus horum etiam partem, eamque præcipuam ac spectatissimam, ad Jesuitas se adjunxisse, & pro Alexandri VII. decreto cum iis consensisse? Quid si comperiamus præterea illos etiam qui sibi palam atque aperte rejiciendum esse judicarunt, suppeditare tamen vel invitos, seu potius incogitantes, arma quibus istud ipsum decretum propugnetur?

Atqui hujus utriusque generis instrumenta in hoc collecta volumine exhibemus. Continet enim primum varia scripta, variaque excerpta ex eorum libris, qui pro Alexandri VII. decreto cum Jesuitis steterunt. Neque verò omnia omnium testimonia proferenda duximus, sed ea dumtaxat quorum est adeò certa veritas, ut de iis ambigere nemo possit, qui modo legerit. Subjiciuntur deinde eorum auctoritates qui, dum illud decretum impugnant maxime, ea tamen posuerunt atque ultro fassi sunt, quibus positus convellitur quidquid argumentorum in contrarium vel ab ipsis vel ab eorum gregalibus adductum est. Atque his duabus veluti partibus collectio hæc absolvitur.

Quæ priori parte continentur sunt ejusmodi, ut eorum veritas nemini dubia esse possit. Patris quidem Sarpetri scripta dudum edita sunt: neque tacitum est quo in loco propria auctoris manu exarata servarentur. Vel unus ejus Tractatus de caerimoniarum usu quibus Confucium & Progenitores suos Sina venerantur, luculenter etiamnum docet quemadmodum P. Navarreta suorum collegarum nomine circa eas caerimonias pactus fuerit cum Patribus Societatis Jesu apud Sinas

P R Æ F A T I O.

Sinas degentibus : Quippe Tractatum hunc P. Sarperrus eo consilio scripsit ut de illa P. Navarretta transactione reliquos Dominicanos certiores redderet , eosque hortaretur illam ut assensu suo comprobarent. Quis autem cogitet P. Sarperrum id serio suscepturum fuisse ut Collegas suos hortaretur ad approbandum suffragio suo instrumentum illud , quod nusquam extitisset , cujus loco si quidpiam supposititium veller obtrudere , satis sciret uno coniectu oculorum facile fraudem omnem ab illorum unoquoque detegendam.

Hujus instrumenti veritate constituta , nihil habet difficultatis ea P. Sarpetri Declaratio , qua illud pro se ipse ratum habet atque approbat ; Præterquam quod extat Romæ declarationis ejus exemplar autographum.

Denique de Responsis R. P. Joannis de Paz nulla potest esse dubitatio ; quippe quæ annuentibus , & approbantibus ipsius Præpositis edita sint : Nec ulla pariter de Tractatu D. Gregorii Lopez deque ejus ad summum Pontificem & ad sacram Congregationem Epistolis , quas autographus in sacra Congregationis de propaganda fide tabulario notum est asservari. Ejus autem ad P. Philippum Couplet Epistolæ Parisiis apud Patres Societatis Jesu habetur autographum exemplar.

Porro quæ his instrumentis continentur , alia sunt extra controversiam , alia in disputationem vocari possunt. Dubitari potest utrum qui ea scripsere Dominicani satis recte existimaverint de librorum Sinicorum quos citant auctoritate , tum de sensu eorum textuum quos pro se addu-

P R Æ F A T I O.

tunt, vel quos in suam sententiam explitan-
dos suscipiunt. Atque hoc ipsum est quod apud
Apostolicam Sedem hodie disceptatur: qua in
disceptatione habent alia Jesuita quibus cau-
sam defendant suam, utcumque de his qua
damus scriptis, statuatur.

Dubia vero nullatenus esse possunt nonnulla
qua in his elucet, & ad facti, ut aiunt,
questionem pertinent stetisse cum primum sic
Dominicanos qui horum auctores sunt Jesuitis
pro Decreto Alexandri VII. nec iis qua contra
objicerentur permotos fuisse, quominus eam sen-
tentiam, Sinicorum librorum auctoritate niti
crederent. Quis enim hosce Dominicanos putes
adeo profligata conscientia fuisse ut in re gravis-
simâ & qua ad religionem maxime pertineret,
contra quam sentirent, loqui non erubuerint?

Alterum est neque ipsos per se observasse ne-
que ab aliis didicisse, Confucio, Progenitori-
busque mortuis vulgo & palam à Sinenfibus Lit-
teratis numen ullum potestatemve tribui, nec
eos in tabellis verè praesentes credi, nec istorum
quidquam significari per eos ritus, qui in ipsis
colendis adhiberi solent: ipsos vero Sinas, dum
ab homine Christiano factitari vident qua licere
sanxit Alexander VII. Decreto suo, nunquam
illos factum sic interpretari quasi addictum se
his erroribus profiteretur. Necesse est, inquam,
nihil istorum à Dominicanis illis aut pro-
pria experientia cognitum, aut aliunde ac-
ceptum fuisse. Cujus enim sceleris tum fuisset
non modo contrarium testari, sed etiam pro-
bandum, ut illi fecerunt, confirmandumque
suscipere?

P R Æ F A T I O.

Denique longe omnium certissima haberi debent quæ illi referunt non modo tanquam ab se visa & perspecta, sed tanquam Collegis ac fratribus suis ad quos scribebant, notissima. Hujus generis illa sunt quæ ex Patre Sarpetro didicimus : P. Navarrettam, factâ sibi ad id potestate à Vicario suo Provinciali, pactum iniisse cum Patribus Societatis, initumque suo Chirographo firmasse ; habitum fuisse antea cœtum Dominicanorum inter Sinas degentium, in quo ex majori suffragiorum numero constitutum erat standum esse Decreto Alexandri VII. Dominicanis imperatum esse ab uno Praposito suo Provinciali, ut ei Decreto parerent, prohibitum ab altero hujus successore ne quid contra illam praxim auderent scribere. Tum quod refert P. de Paz, Dominicanorum relationibus quâsi certum atque indubitatum affirmari nullum Sinas Confucio numen tribuere potestatem nullam idque eos publice ac palam profiteri. Postremo R. P. Gregorium Lopez a Praposito suo delectum esse tanquam doctissimum inter sodales aut unum è doctissimis, ut eas controversias quæ hodie agitantur, scriptis explicaret.

Hæc, inquam, ejusmodi sunt de quibus ambigi nequeat, ubi semel genuina esse constat ea scripta quæ exhibemus. Superest ut de ipsis auctoribus quales fuerint, & quâ quidque occasione scripserint, paucis referamus.

Atque hæc in antecessum, donec fusiis alio in opere adversus novum Dominicanorum

P R Æ F A T I O.

Sinenſium ſeu verius Moralis Præcticæ Apologiſtam monſtretur quantoper: à ſuo Navarretta aliisque ejusdem nota hominibus imponi ſibi paſſus ſit : quantum imponat ipſe ſibi ſuis plerumque argumentationibus & conjecturis : quam immerito ſibi placeat , & in ſuos adverſarios quaſi hominum i reptiſſimos inſultet , tum etiam cum nihil niſi magnam rerum, de quibus ſcribere aggreſſus eſt , ipſusque adeo hiſtorie domeſtica ignorantiam prodiſt.

P R Æ F A T I O :

De R. Patre Sarpetro.

Reverendus Pater Dominicus Maria Sarpetrus, alias à Sancto Petro nuncupatus, è Sicilia oriundus fuit, ibique Ordini Sancti Dominici nomen dedit Panormi apud Diva Zitta Conventum. Is cum Philosophiam docuisset, atque ad profitendam Theologiam approbatus esset, transiit ad Philippinas insulas, ut se animarum saluti in Missionibus procuranda devoveret. Missus inde à Præpositis in Sinense regnum, unâque jussus est præcipuam adhibere diligentiam in dignoscendis sectarum Sinicarum superstitionibus.

De his nimirum plurima tunc temporis erat contentio, occasione Decreti ab Alexandro septimo editi, quo summus Pontifex Christianis Sinensibus permittit nonnullos ritus, quos P. Joannes Baptista Morales Dominicanus Roma quasi supersticiosos atque Idololatricos accusaverat. Variabant Dominicanorum ea super re sententia: atque inde factum videtur esse ut R. P. Franciscus à Paula eo tempore Dominicana Familia Provincialis apud Philippinas Sarpetrum hortatus sit, præcipuo ut studio ad eas res discutiendas animum intenderet. Noverat ille scilicet, quod & facile quilibet ex scriptis quæ sequuntur potest intelligere, quanta esset P. Sarpetri sinceritas, quanta moderatio animi, quanta in rebus æstimandis æquitas ac perspicacia: neque dubitavit quin esset in pri-

P R Æ F A T I O .

mis idoneus ad id præstandum quod habebat ipse in animo , nempe ut liquido constaret quid de ea tota re , quantum quidem ad factum , pertinet æstimandum ac judicandum foret.

Paruit suo Præposito Sarpetrus , summoque studio in id , quod ipsi fuerat demandatum incubuit , præsertim quinque illis aut sex annis quos vixit in custodia una cum aliis Missionariis : cum eo tempore juvandi proximos ac docendi facultas omnino adempta esset.

Nempe cum vexari palam Christiana Religio cœpta esset anno 1665. quicumque ex Evangelicis Ministris deprehendi potuerunt , atque inter eos P. Sarpetrus , ducti Pekinum sunt , & in carcerem inclusi , unde postea Cantonem missi. Eò advenere omnino quatuor & viginti ex variis Ordinibus : Franciscanus unus , P. Antonius à Sancta Maria : Dominicani tres , P. P. Dominicus Navarrette , Philippus Leonardus , Dominicus Maria Sarpetrus : reliqui è Societate Jesu , quibus omnibus nostrum Collegium custodia loco fuit.

Et quoniam non desperabant fore aliquando favente numine , ut hac tempestate sedata , suis Ecclesiis redderentur , Interea opera pretium se facturos esse duxerunt , si occasione illa quam præsens calamitas præter omnem expectationem offerebat , uterentur ad ea inter se statuenda & communi probanda consensu , quæ pertinerent ad praxim : cùm nihil esset fidelium utilitati accommodatius , magisque adedò necessarium , quàm ut à Missionariis omnibus una atque eadem agendi ratio servaretur.

Prima omnium fuisse videtur controversia de

P R Æ F A T I O.

Xamti, utrum scilicet eâ voce Sinicâ Deus O. M. appellari posset. P. Antonius à Sancta Mariâ qui sopitam ab annis 40. controversiam hanc recens excitaverat, defendebat acriter, nusquam uti licere hoc vocabulo, eosque qui uterentur, in errorem Sinensium atheorum incurere. Qua occasione factum est ut P. Sarpetrus suo suffragio comprobandum sibi putarit editum olim à P. Riccio Societatis Jesu, Missionis fundatore, librum qui Sinicè inscribitur Tien-chu xe-y, id est vera notio Domini cœli: eoque pertinet ut confutato Sinensium atheorum errore ostendatur scriptores antiquos librorum quos classicos appellant verum Deum cognovisse ipsumque sub *xamti* nomine coluisse: quantumvis recentiores athæi, ut errorem atque insaniam suam excusent, nomen illud contra vim ejus nativam ac significationem tribuante substantia nescio cui seu virtuti cœlesti, at merè tamen corporea, quam in veri Dei locum supponunt. Hoc P. Sarpetri testimonium datum est anno 1667. die Maij nonâ.

Et quia P. Antonius à Sancta Maria Romam quosdam miserat pro tuenda opinione sua commentarios, idem P. Sarpetrus P. Prospero Intorcetta Societatis Jesu Romam à Superioribus procuratori delegato alterum scriptum fusiùs tradidit Hispano sermone: quo in scripto exponit defenditque consuetudinem Patrum Societatis, qui adhiberent quidem hoc vocabulum sed tunc duntaxat, cum ostendere infidelibus volunt, quò facilius, eos ad fidem amplectendam adducant, verum Deum fuisse olim à Sinis adoratum, neque aliud quidquam

P R Æ F A T I O.

nomine xamti fuisse ab antiquis ipsorum Doctoribus significatum. Ea P. Sarpetri lucubratio absoluta fuit ad diem 20. Julii anno 1668. nec minus quàm reliqua ejusdem servatur antographa.

Præbuerat ipsemet ante aliquot menses occasionem controversiæ de cultu tam Confucii quam progenitorum renovanda. Sic enim refert in Epistola, quam hic representamus, se priusquam agere cum Patribus Societatis ea de re licuisset, subdubitasse annon erratum foret à P. Martinio in illa cœrimoniarum Sinensium expositione quam subsecutum est Decretum illud quo diximus licitas declarari. Ac Pater quidem Sarpetrus, quoniam nullo præconcepto judicio occupatus ad congressus illos animum attulerat, ut primum facti veritatem sibi visus est comperrisse, sublata dubitatione qua tenebatur, facile se ad sententiam Patrum Societatis adduci passus est. Itaque, interim dum Collegæ ipsius duo cum P. Antonio à Sancta Maria in eo erant, ut quæ dubia de novo sibi occurrerant, scriptis exponerent, suum ipse testimonium die quarto mensis Augusti 1668. exaravit: quo postquam professus est quid de Sinicis cærimoniis existimet, confutat id quod rumores à malevolis conficti vulgaverant, Patres Societatis à prædicando Christo Crucifixo inter Sinas abstinere. Deinde Novembris die 12. ad Sacram Congregationem de propaganda fide litteras dedit, quibus & de his agit quæ inter ipsos discussa Cantone fuerant, & illius scripti meminuit quod modo laudavimus.

Postquam responsis PP. Societatis ad dubitationes

P R Æ F A T I O.

bitationes P. Navarreta effectum est ut ipse horum sententia adharere se profiteretur tradita declaratione quam suo loco representabimus ; tum P. Sarpetrus , cui nihil fuerat magis in votis , quam ut controversiæ omnis ista componeretur , Declarationem ipse suam adjunxit , quarta die Octobris 1669. Quâ sibi vehementer probari testatur illam P. Navarreta , nominatim ob eam causam , quod valde consentiat cum iis quæ ante aliquot annos majori suffragiorum numero in Dominicanorum cœtu apud Sinas eo tempore degentium decreta erant & constituta.

Atque illud est P. Navarreta pactum quod ut præpositis suis collegisque probaret P. Sarpetrus , Hispanico idiomate tractatam scripsit quem latinâ linguâ donatum hic exhibemus. Cum enim paulo post P. Navarreta Cantonem fugisset Macaum eo consilio ut inde remigraret in Europam , neque docuisset Collegas suos , quid eorum nomine transegisset , P. Sarpetrus officii sui duxit esse , & omnes admonere quid esset actum , & eos dedocere qui iisdem adhuc tenerentur dubiis quæ ipsum olim tenuerant.

Iis hujus tractatus exemplaribus quæ in Sinis sparsa sunt ; præfixa fuit auctoris Epistola ad Provincialem suum & ad definidores capituli ejusdem Provincia scripta : ex quâ intelligitur quid antea Provinciales ejusdem Provincia duo statuissent de carimoniis Sinicis : Et quamquam ad nos hæc epistola nondum pervenerit , ut possimus ipsa hic auctoris verba representare , tamen hunc defectum facile sup-

P R Æ F A T I O.

plebit quod sequitur desumptum ex Tractatu P. Philippucci Soc. Jesu edito apud Sinas ante annos circiter viginti : hoc est eo tempore quo non solum P. Sarpetrus Epistola auctor , sed illi ipsi ad quos erat data , & alii rei totius de qua agitur conscii , adhuc in vivis erant.

Itaque P. Philippuccius , in eo tractatu cui titulus est , præludium ad plenam disquisitionem &c. cap. 4. prop. 3. Sic habet Item R. P. Fr. Franciscus de Paula ejusdem Ordinis & Provinciæ Provincialis , eisdem RR. PP. sibi subjectis jussit , ut responsionibus à P. Martinio Româ allatis se conformarent. Denique R. P. F. Philippus Pardus ejusdem Ordinis & Provinciæ Provincialis , præcitis sibi subditis vetuit , ne in suis libris illi doctrinæ contrarium scriberent , quam Societatis Patres in suis scripsissent. Hæc omnia manifestè constant ex Epistolâ prædicti Patris de sancto Petro ad suum Provincialem & Definidores Capituli Provincialis Philippinarum conscriptâ ; quæ ante initium citati Tractatus ejusdem Patris invenitur. Huc usque P. Philippuccius.

Porro Tractatum hunc omnem P. Sarpetrus ad duas propositiones revocat , quæ sunt illius veluti partes duæ. Prima est , sententiam Jesuitarum , ad quam tum ipse , tum deinde P. Navaretæ omnium illorum nomine accesserat , esse intrinsecè ac per se probabiliorē , hoc est ex iis argumentis quibus stabilitur & confirmatur. Altera , eandem esse quoque pro-

P R Æ F A T I O.

habiliorem extrinsecè , hoc est spectato eorum numero atque conditione quorum auctoritate nititur. Tum solvit ea quæ præcipue poterant objici.

Partem seu propositionem utramque , ac primam præsertim deffendit P. Sarpetrus magna argumentorum numero , quæ ita strictè ac pressè explicat , ut neque minori circuitu verborum ea proponi necesse sit , neque vero facile fieret , quin ea obscuriora redderentur. At sunt prænotanda quedam , antequam ad hæc Sarpetri scripta lector accedat.

1. Primum est non id nunc agi præsertim , quæ privata opinio illius Dominicanæ fuerit , aut quibus eam argumentis fulciat. Etsi enim nobis quidem persuasum est ea probatum iri omnibus , qui in hac re aliquid vident , baud tamen ex iis pendere volumus Jesuitarum aut potius Decreti Alexandrini causam spectamus illum scilicet hoc loco ut testem duntaxat , eoque adhibemus illius testimonium ut id ostendamus quod unum propositum est , ejus ætatis Dominicanos plerosque qui erant in Sinis , nominatim vero Navarretam subscripsisse Jesuitarum opinioni subscribendoque nihil præstitisse quam quod Præpositi sui , & quidem majores , fieri jusserant.

2. Secundum est , linguam esse in Europa nullam quæ vocem habeat perfectè respondentem Sinico vocabulo *Ci* : quod hæc quidem in causa significat cibos atque odoramenta aliæque id genus quæ ad mortui feretrum sive coram ejusdem imagine apponuntur ; ritus præterea & cærimonias tunc usurpari solitas. Quare , ne

P R Æ F A T I O.

*sapè rediret longior ille verborum ambitus , vñ
cem ipsam Cì quam adhibuit P. Sarpetrus , &
nos retinendam duximus, admonito semel Lecto-
re quem ea significatum habeat.*

*3. Tertium est P. Sarpetrum, cum sibi defendendū
ab Idololatria suscepit illud Cì quod in honorem
Confucii sexto quoque mense Litterati celebrant,
plus fecisse quam ad id quod sibi proposuerat ,
necesse sit ; nempe ad tuendam Jesuitarum pra-
xim seu potius sacra Congregationis responsa
anni 1656.*

*Duplex est nimirum apud Sinenses litteratos
colendi Confucii ritus. Alter positus est in salu-
tionibus quibusdam officiosis , qua gentis more
adhibentur coram tabella Confucii nomine
inscripta, capite sapius ad terram usque demisso.
Quod quidem tertio quoque anno fit tum cum
Doctōris aut Baccalaurei gradu donantur. Ritus
aliter sexto quoque mense redit, ac tum præter il-
las salutationes , odoraamenta comburuntur ante
eamdem tabellam , offeruntur vinum & carnes,
seu potius integra animalia , iisdem fere cum
cerimoniis qua apud eos in usu sunt , ubi nobi-
lem quempiam ac primariā dignitate virum
splendido cum apparatu mensa volunt excipere.*

*De postremo hoc ritu qui solemne Cì Con-
fucianum dicitur , nulla fuit hætenus , ad
proxim quod attinet , controversia. Nam sive
res ipsa vacet superstitione , sive superstitioni sit
affinis , Jesuitas certe prohibuisse semper ne huius
adeffent Christiani , non Sarpetrus modo sed &
ipse P. Navarreta testatur.*

*Prohibuere porro , non quod arbitrarentur ,
& aliis nonnullis visum erat, visum illum re ip-*

P R Æ F A T I O.

*sa sacrificii genus esse, aut aliquid vulgò adjun-
ctum habere, quod cultus merè civilis ac politi-
ci fines excedat: sed quod huic interesse. luter-
tos Christianos cum nulla lex cogat, sarius esse
meritò duxerunt Jesuita ab his eos cœrimoniis
arcere, quæ mali speciem aliquam habere pos-
sent, ut inter homines nondum satis in fide
confirmatos. Atque hinc est quod nihil aliud
Neophytis suis permisere, nisi ut Confucii ta-
billam eo quem modò exposui ritu salutarent,
cum ad gradus admittuntur: quem planè hono-
rem magistris suis adhuc viventibus exhibent,
neque Confucio negare possunt, si velint ad gra-
dus litterarios attolli.*

*Constat igitur quod dixi, cum Patri Sarpetro
id unum incumberet ut praxim illam tueretur,
quam & Patres Societatis Jesu permittunt, &
approbavit expressè Sacra Congregatio, necesse
non habuisse de solemni illo Cì Confuciano quid-
quam dicere: quippe cujus usum ac praxim
nunquam Jesuita approbarint. Sed hoc ipsum
etsi minus necessarium, non mediocriter tamen
pro illis facit. Qui enim ita religiosi fuerunt, ut ab
illa praxi, quam expertem criminis existimabant,
sicut est re ipsa, tamen Christianos suos jusserint
abstinere, quò longius eos removerent ab iis om-
nibus quæ ad Ethnicorum ritus accedere videren-
tur; quis credat eosdem contra rationis ac
conscientiæ præscripta permittere Christianis, &
si superis placet, suadere etiam voluisse, ut eas
cœrimoniis adhiberent, quas supersticiosas &
nefandas esse ipsi non ignorabant.*

*4. Ultimum hoc nec levis sanè momenti
ad id pertinet quod ait Sarpetrus, & sen-*

P R Æ F A T I O.

sententiam Patrum Societatis esse longe probabiliorem, tum verò esse ejusmodi, ut eam sequi deberent omnes, etiam si opposita sententia foret æquè probabilis.

Hic enim verò quibusdam fortasse in mentem veniat juris questionem esse de qua agitur : & qui in juris questionibus aiunt sequi non licere opinionem vel probabilissimam, Sarpetrum statim damnabunt & laxiorem ut appellant, doctorem criminabuntur ; quippe qui falsum dogma bonisque moribus adversum assumat. Verum cogitent illi probabilitatem de qua illi sermo est, non ad juris sed ad facti questionem duntaxat pertinere. Id enim unum quaritur an caerimonia illa, quas Sina erga Confucium & defunctos adhibent, ab ipsis religiosa esse existimentur, an tantum civiles ; hoc est an Sina literari Confucio ac defunctis partem divinitatis aliquam publicè tribuant, an ab eis vel beneficium aliquod sperent vel malum timeant.

Fam vero quidquid sentiat de opinionum in morali Theologia probabilitate, satis constat in hac nostrâ causâ sufficere probabilitatem, non modo ut earum caerimoniarum usus Christianis Sinensibus liber relinqui jure potuerit, sed etiam ut vetari nullo modo potuerit. Atque illa ipsa est aequitatis ac sapientiæ lex quam Sacra Congregatio præscribendam putavit Gallis Episcopis, qui ad has Orientis partes ante annos admodum quadraginta sunt missi.

Instruct. Nullum studium ponite, nullaque
pro Vic. ratione suadete illis populis, ut ritus

P R Æ F A T I O.

suos, consuetudines & mores mutant, Apost. pag. 14.
 modò ne sint *apertissimè* religioni & bonis
 moribus contrariæ. Quid enim absur-
 dius, quam Galliam, Hispaniam, aut
 Italiam, vel aliam Europæ partem in
 Sinas invehere? Non hæc, sed fidem
 importate, quæ nullius gentis ritus
 aut consuetudines, quæ modo pravæ
 non sint, aut respuit aut lædit, imò
 verò facta testis esse vult.

Et quoniam ea pæne est hominum
 natura, ut sua, & maximè ipsas suas
 nationes cæteris & existimatione &
 amore præferant, nulla odii & aliena-
 tionis causa potentior existit, quam
 patriarum consuetudinum immutatio,
 earum maximè, quibus homines ab
 omni Patrum memoria assuevere: præ-
 fertim si abrogatarum loco mores tuæ
 nationis substituas, & inferas. Itaque
 usus illarum gentium cum usibus Euro-
 pæorum conferte, quin immò magnâ
 vos illis diligentia assuescite.

Admiremini & laudate ea quæ lau-
 dem merentur: quæ vero laudis exper-
 tia sunt, ut non sunt præconiis assenta-
 torum more extollenda, ita prudentiæ
 vestræ erit de his aut iudicium non ferre,
 aut certe non tenere & ultro dampnare.
 Quæ verò prava extiterint, nutibus ma-
 gis & silentio quam verbis proscinden-
 da: opportunitate nimirum captata,
 quâ dispositis animis ad veritatem ca-
 pessendam sensim sine sensu evellantur.

P R Æ F A T I O.

His omnino verbis Sacra Congregatio Vicariis Apostolicis ad Sinas destinatos atque ipsis adjunctos Missionarios edocebat.

Sanè quisquis ex his regulis de Jesuitarum praxi in carimoniis Sinicis permittendis deque Alexandri V I I. Decreto judicaverit quo praxis illa probatur ; intelliget facile Patres Societatis adeo non esse progressos ultra limites ab Sacra Congregatione præscriptos , sed multum citra eosdem constituisse , ac longe severius in ea re se gessisse quam officii ratio cogeret. Quippe cum suis Neophytis non modo permiserunt nihil , quod apertè malum foret , sed nihil concesserunt unquam nisi quod apertè foret indifferens : ac ne istud quidem nisi jubente necessitate fecere , sed oblata quamlibet tenui specie mali , interdixerunt iis rebus quas per se & intrinsecè haudminus indifferentes & à crimine remotas arbitrabantur.

Itaque nihil necesse est ad Jesuitarum causam approbandam , ullomodo de opinionis , at aiunt , probabilis naturâ disputare , aut ad ejus veluti patrocinium confugere. Certè nihil hoc ad Sarpetrum atque ad ejus argumentationem pertinet. Ille quidem sive ex modestia , sive ut minus læderet eos qui aliter sentirent , satis habuit suam ac Jesuitarum sententiam dicere probabiliorē. Sed vel sic scopum attigit quò tota ejus disputatio tendebat. Modò enim vel probabile sit quod ipse cum Jesuitis defendit circa factum , ut loquimur , rituum Sinicorum , eo ipso constabit , quæ illi permittunt non esse apertissimè religioni & bonis moribus contraria. Proinde ritibus

P R Æ F A T I O.

iis interdicerere non potuerunt Christianis quos habebant , erudiendos , si Sacra Congregationis placita , si rationem ipsam sequerentur.

*Et vero quid charitati magis ac prudentiæ contrarium fingi potest , quam & plebeni Christianam persecutionis objicere periculo , & Gentiles à Christiana lege amplectenda remove-
re , ea prohibendo quæ utrique nullatenus ad religiosum cultum pertinere profitentur : quæ proinde si fiant , scandalo apud eas gentes esse non possunt , quanquam nos aliter instituti eadem religioni tribuere , ac religiosas carimonias interpretari soleamus ?*

Quis jam nescit quo se habitu Siamenses componant non modo coram suo Rege , sed vel coram una ipsius epistola ? Non alio cultu idola sua videntur posse venerari. Hoc ante paucos annos tota Gallia , ipsaque vidit Italia. Quid si hoc velit quispiam , profunda illa corporis abjectione ad terram usque , idololatriam contineri , neque Siamenses ad baptismum ante esse admittendos quam polliciti fuerint nunquam se deinceps ante sui Regis epistolam demissuros caput ad terram , neque ea facturos quæ ex lege patria solent ? Id quidem adversarios nostros velle necesse est , si constare sibi volunt : sed paucos fore arbitror qui cum illis sentiant.

Atqui Siamenses inter & Sinenses hac quidem in parte discrimen nullum esse constat. Quem honorem Siamenses sui Regis Epistola deferunt , hunc Sinenses habent nomini seu Confucii seu progenitorum in tabella , ut diximus , inscripto ; quæ his offerunt Christiani (de istis enim loquor) dum suo illo Ci

P R Æ F A T I O.

perfunguntur ea ipsa mortalibus offerunt quos excipere cum aliquo apparatu & reverentia significatione volunt. Sed hac quidem satis, ne ad ipsam disceptationem aggredi velle videar, & Patrem Sarpetrum pravertere.

Caterum quanta debeat esse Religiosi hujus Missionarii existimatio, quantam ipsius verbis haberi fidem oporteat, satius est unumquemque per se legendis ejus scriptis intelligere, quam à me predicari. Elucet quippe in iis zelus ille summa cum prudentia conjunctus, ille charitatis fervor, illa ingenua & fuci expers simplicitas, illa mansuetudo ac modestia, quæ tantam de hominis sinceritate existimationem asserant maximè si cetera rerum adjuncta consideres, ut quamvis solus ille ea quæ refert omnia testaretur, maximam tamen in ejus testimonio vim atque auctoritatem nemo non æquus aestimator tribuendam censeret. Sed erit, credo, non ingratum lectori si addiderimus hic nonnulla ex his, quæ de tanti ac sancti viri virtute aliunde accepimus.

Part. 2.
lib. 2.
pag. 330.

In historia quidem Dominicanorum Philip-pinensium Manila scripta anno 1676. de ipso deque aliis duobus ejusdem familia Patribus Polanco & Leonardo, quibuscum Missionem Sinensem ingressus est, scriptum legimus tres viros fuisse magno animo præditos, eoque spiritu qui homines apostolicos efficit: Todos tres escogidos, con grande valor è espíritu de apostolicos Missioneros.

Quanta esse debeat testimonii hujus auctoritas magis etiam intelligetur, si attendamus ad hac duo. Primum eandem in historia, cap. 41.

P R Æ F A T I O.

Laudari P. Polancum tanquam virum omni ex parte præstantissimum : ut ea laus non mediocris censeri debeat quod Pater Sarpetrus tanto viro socius laudum adjunctus sit. Alterum est scriptorem historiae illius , cum esset iis opinionibus infensissimus , quas P. Sarpetro placuisse usque non ignorabat , procul abesse ut hujus laudes augere atque exaggerare voluerit.

Qua cum ita sint tanto facilius fides habebitur duobus aliis Missionariis ea referentibus , qua ipsi oculis usurparunt toto circiter sex annorum spatio quos eadem inclusi custodiâ cum P. Sarpetro vixere.

Horum alter est P. Joannes Franciscus Ferrarius , unus ex antiquissimis Sinarum Missionariis , qui epistola è suo illo Kantonienſi carcere data 20. Februa. 1670. ad Emmanuelem Suarez Soc. Jesu Missioni Siamensi præpositum , ita de P. Sarpetro scribit. Habemus hic nobiscum P. Dominicum à Sancto Petro , alias Sarpetri dictum : est Sanctus Sculus. Pergit laudare viri probitatem , integritatem , studium pacis inter utrumque Ordinem alenda ac fovenda , laborem assiduum & contentionem in evolvendis Sinenſibus libris , eo duntaxat consilio , ut pacem illam , quam votis omnibus expetebat , facilius procurare posset.

Alter est P. Adrianus Grefſon è Societate Jesu , natus in Gallia : cujus virtutem ac pietatem prædicavit non semel testis locupletissimus D. Abbas de Lice , hodie Episcopus , cui cum in Sinis unâ versaretur , notus imprimis fuit. Sic autem ille de P. Sarpetro.

PRÆFATIO.

Eximius ille Religiosus , quandiu unâ nobiscum in exilio Cantonienſi verſatus eſt , ſingulis noctibus horâ poſt undecimam dimidiâ ſurgere ſolitus erat , non ſecus ac ſi in Cœnobio regularis diſciplinæ obſervantiſſimo fuiſſet , & tres fermè horas orationi tum mentali tum vocali tribuebat. Deinde paululum quieti corpus dabat , rurfuſque horâ matutinâ quintâ ac dimidiâ ſurgens Sacrum faciebat : quo abſoluto reliquorum Sacerdotum qui aderant , Miſſas , aut certè quotquot aſſequi poterat , auſcultabat. Eramus autem , dempto illo tres & viginti. Id uno aut altero anno , aut etiam menſe feciſſe , nec ſane laude & merito careret. At fermè ſex annis continuis ne tantillum quidem de illo fervore remiſiſſe , eundemque vitæ tenorem conſtanter & inviolate ſervafſe , argumento eſt illum valdè ſollicitum ambulafſe coram Deo ſuo , eique fuiſſe ſumma pietate ardentique charitate conjunctum.

Post annos ferè ſex in cuſtodia Cantonienſi poſitos , Miſſionariis in libertatem reſtitutis , factaque illis ad Eccleſias ſuas redeundi poteſtate , juffus eſt à præpoſitis ſuis P. Sarpetrus Miſſionem priſtinam repetere. Qui in labore , conſumptis reliquis vitæ annis admodum quatuordecim aut quindecim , diem ſupremum obiit circa illud tempus quo Apoſtolici Vicarii Sinas ingreſſi ſunt.

P R Æ F A T I O.

De R. P. Navarreta.

R Everendus Pater Dominicus Navarreta Hist. Philipp. part. 2. p. 260. Navarr. To. 2. lib. 6. cap. 1. 2. 3. &c.
sacrum S. Dominici Ordinem ingressus apud Conventum Rupis fidelis dictum (Peña-fiel) in Hispania , Philosophiam docuit Valli-foleti : deinde anno 1646. P. Joanni B. Morales in Philippinas revertenti se comitem adjunxit , atque illuc pervenit anno 1648. Post octo seu novem annos partim in Philosophia Theologiaque docenda, partim in missionibus regionum earum positos , redire statuit in Hispaniam : Cujus consilii causa soli Deo perspecta est , inquit Dominicanorum historia.

Navem conscendit circa initium anni 1657. & post varios casus quos ipse refert Tomi prioris libro 6. Macai cum esset , mutato repente consilio secum statuit ad eos Dominicanos adire qui tum Missionarios agebant in Sinis. Itaque Sinenſe regnum sub finem anni 1659. paulo post P. Sarpetrum ingressus est.

Exortâ persecutione anno 1665. Dominicani quatuor , inter quos P. Navarreta , cum Patribus Societatis comprehensi Pekinum primò , deinde Cantonem adducti sunt. Pekini cum esset ipse , ad R. P. Generalem Societatis Præpositum eam Epistolam quam hîc exhibemus , scripsisse se refert Tomo 2. ubi & illud addit , se Pag. 2.
 planè similes alias dedisse Cantone tum ad eundem , tum ad R. Ordinis sui Magistrum Generalem.

P R Æ F A T I O.

Renovatâ , quemadmodum vidimus, disceptatione de cultu Confucii ac progenitorum deque usu Sinicarum vocum in appellando vero Deo , P. Antonius à Sancta Maria cum P. Navarreta de his scribere pro se quisque instituerunt. Et ille quidem dubitationes suas misit ad P. de Gama Jesuitarum Visitatorem Macai tunc degentem : hic verò suas tradidit P. Pacheco eorundem Viceprovinciali qui Cantonenſi custodia cum aliis Missionariis detinebatur. Hoc scriptum est quod deinde P. Navarreta publicavit Tomo 2. Tractatu 6. sub Informationis nomine , sed multis additis , multis immutatis.

Aliquot è Sociis , atque inter alios P. Intorcetta , P. Brancatus , P. le Favre , respondere ad hæc dubia jussi. Primus responsionem suam absoluit P. Intorcetta. Duas concinnavit P. le Favre : fusiorem alteram qua typis recens edita est : alteram longè breviorē , quam compendiariam responsionem appellavit. Hæc statim P. Navarreta tradita illa non nisi post quatuor menses absoluta & Chirographo confirmata , videlicet mense Julio anni 1669. Breviorem illam P. Navarreta eodem Tractatu 6. fere totam representavit , unaque suam ipse subiunxit , sed auctiorem multo , nec parum diversam ab ejus autographo quod etiamnum asservatur.

Tom. 2.
pag. 357.
col. 2.

Patris Brancati responsionem apologeticam 25. Die Junii 1669. sibi traditam esse ait ipse Navarreta. Et initio quidem pollicitus fuerat suam vicissim responsionem prodituram : sed si quam inchoarat , necesse est mutato deinde

P R Æ F A T I O.

consilio supersederit. Quam enim tractatu 7. Tomi posterioris edidit, satis apparet scriptam non fuisse nisi postquam in Europam reversus erat.

Refert P. Sarpetrus ejusdem socius, cujus ille opera tum in textibus Sinicis interpretandis, tum in suis lucubrationibus describendis utebatur, P. Navarretam lectâ P. Brancati responsione dixisse, Abre camino : pesame no averlo sabido antes : idest, viam ille commonstravit : dolet mihi quod ea non prius cognoverim.

Addit Sarpetrus Navarretam perlectis Ritualis Sinici tractatibus earum ope notionum qua è P. Brancati scripto hauserat, ultro ad P. Viceprovincialem Jesuitarum adisse, & eâ quâ dictum est ratione cum eo transsegisse: factum istud die 29 Septembris 1669. qui dies Archangelo Michaëli sacer est.

Acta res erat primum inter eos vivâ tantum, quod aiunt, voce. At P. Navarreta, seu veritus ne quid iis quæ dixerat adderetur aut detraberetur, sive aliâ quâpiam causa, Declarationem suam scripto tradendam ratus, eadem die illam obtulit in Epistolæ modum. Quamquam enim eadem Domo ipse cùm PP. Societatis commoraretur, inter eos usus ille obtinuerat, ut videre est in iis quæ ultro citroque tunc temporis scripta extant.

Huic Declarationi subjunxit P. Navarreta exemplar articulorum aliquot de quibus inter Jesuitas convenisse aiebat in cœtu quodam anni 1642. apud urbem Ham-chau Metropolim Provinciæ Chekiam. Sed Exemplar illud non

P R Æ F A T I O.

nisi idiomate Hispanico exhibere voluit, causatus aliquid obflare quominus ipsum Autographum, quod penes se haberet Lusitanicâ linguâ conscriptum, posset ostendere.

Neque Societatis Provinciali neque alteri ulli Jesuitarum, qui tunc aderant, quidquam de illo cœtu innotuerat. Excusso quoque Tabulario in quo solent ejusmodi acta consultationum asservari diligentius, nihil repertum quod ad eam rem pertineret. Et tamen dicenti P. Navarretæ credere libuit quæ de his articulis narrabat. In quibus cum nihil appareret diversum ab eo quod fuerat semper ab Jesuitis usurpatum, existimabant P. Navarretam, qui in hac assentiri se profiteretur, subscribere pariter articulo Cantonienfi 41. quo constitutum erat omnino Alexandri VII. Decreto esse adhaerendum.

Dum excutitur tabularium ut diximus, ac de his deliberatur, dies aliquot abierunt: eo-que factum est ut Responsum P. de Govea quo P. Navarretæ Declarationem ratam habet dari non potuerit ante diem Octobris tertium. Posteriâ die scriptum utrumque à P. Sarpetro comprobatum: qui & aliquanto post Declarationi ipsius P. Navarretæ manu exarata subjunxit hæc verba. Fidem facio hoc scriptum esse manu Præsidis nostri R. P. Navarretæ cujus manum apprimè novi, quippe qui multa ab eo exarata descripserim, multasque ejus Epistolas acceperim. Datum in hac Domo Cantonienfi 25. Octobris 1669. Fr. Dominicus Maria à Sancto Petro Ordinis Prædicatorum.

Post eam transactionem non diu apud Sinas.

P. Na

P R Æ F A T I O.

P. Navarreta moratus est. Quippe die nona Decembris subduxit se, nemine conscio, ne Collegis quidem ac fratribus suis. Tantum inventa postmodum epistola in ejus cubiculo, quā monebat se Macaum abire ea mente, ut inde Siamum navigaret, in Europam remigraturus. Et verò profectus anno sequenti Siamum ad Berytensem Episcopum se contulit: in Hispaniam pervenit anno 1672. Inde Romam contendit anno 1673. unde regressus Madritum, Tomos edidit de rebus Sinicis duos, quorum postremus ante editionem absolutam sacræ Inquisitionis mandato suppressi jussus est. Paulo post Archiepiscopus Civitatis S. Dominici apud Hispaniolam insulam designatus, ibi mortuus est antequam sacro ritu inauguratus esset.

P R Æ F A T I O.

De R. P. Joanne de Paz.

part. 2.
pag. 160.
col. 2.

EX historia ordinis Sancti Dominici intelligimus P. Joannem de Paz è Conventu S. Pauli Cordubensis, postquam Philosophiam Hispali docuisset ad Philippinas insulas migrasse anno 1648. In titulo qui ejus responsis Manila editis anno 1686. præfixus est ita legitur, fuisse in illustri Sancti Thomæ Aquinatis Manilenfî Collegio, atque Universitate Philosophicæ cathedræ iterum, itemque Sacræ Theologiæ vespertinum, indeque quondam primarium lectorem: insuper Regentem studiorum, & semel ac iterum olim ejusdem Collegii, & Universitatis Rectorem, & Cancellarium Manilenfis nationis quondam etiam Vicarium Provinciale, Vicariumque S. Telme de Cavité.

Jam in Epistola nuncupatoria ejusdem libri ad R. P. de Monroy totius Ordinis Magistrum generalem, Dominicanus alter è Philippinis virtutem, ac prudentiam singularem P. de Paz ex eo commendat, quod cum totius sanctissimi Rosarii Philippinarum Provinciæ, pulchrum probitatis speculum exactumque sit in ea vitæ regularis exemplar Conventus Malinensis, ter rite canoniceque ejus fuerit electus in Priorem Et quamquam onus istud justis de causis humeris semel excusserit, bis tamen supposuerit eos ad portandum laborem, vir omnibus religiosæ vitæ numeris absolutus.

P R Æ F A T I O.

Pergit author Epistola in hac verba

Quot enim ex hoc vitæ ejus atque S. J. doctrinæ duplici pulchro fonte æstimationis ac commendationis apud omnes rivi profluxerunt, haud facile dici potest. Ipsum enim Capitula Ecclesiarum, Religiones, Communitates, Tribunalia, infimæ, mediæ, supremæque classis homines, in ambiguitatibus suis, maxime ad mores pertinentibus, ducem eligunt, doctorem consulunt, oraculum venerantur, & ad illud usque terrarum orbis velut effusum oleum nomen suum sic effudit, ut Venerabiles ipsi Episcopi, Sedis Apostolicæ delegati, Provicarii-que Generales, Notarii-que Apostolici Tunkinenses in aliquibus dubiis rebus consilium ejus exquirerent, datique doctrinam commendarent.

Denique ad calcem illius libri sic habetur. Impressum Manilæ anno Domini 1680. cum Licentia R. P. F. Baltazaris de Sancta Cruz, Commissarii Sancti Officii, ac Prioris Provincialis Provinciæ Sanctissimi Rosarii Philippinarum : & approbationibus RR. PP. Rectoris & Lectoris Theologiæ, Primarii Collegii Malinensis & Universitatis Sancti Thomæ Aquinatis : cum licentia etiam Ordinarii, ac tandem Gubernatoris Insularum, & approbationibus, quæ in hujus opusculi principio reperiuntur.

De D. Gregorio Lopez Dominicano Episcopo primùm Basilæo deinde Pekini Episcopo.

D. Gregorius Lopez primus è Sinis Religiosus extitit, primus Sacerdos, primus Episcopus. De quo quæ habemus dicenda, colligamus partim ex historiâ Ordinis Sancti Dominici, partim ex P. Navarreta Commentariis, partim ex iis quæ ab ipsomet Scripta ad nos pervenerunt.

Part. 2.

Pag 279.

280.

In historiâ quidem Philippinensis Provincia legimus D. Gregorium Lopez, quem gentis suæ decus atque ornamentum appellat, ortum esse in Fogan oppido provincie Fokiensis: baptizatus cum fuisset à P. Antonio de Sancta Maria Franciscano, dimissâ re familiari, quæ non modica erat, virgine item, pariter ut ille honesto loco natâ, quam parentum voluntate uxorem, vel potius more gentis desponsam habebat, omnibus ipsique adeo patriæ remisso nuncio, comitem se Patribus Franciscanis addidisse, ut in eorum Missionibus, Catechista munere fungeretur: quin etiam eos in ipso exilio persecutum esse, cum iis transisse in Philippinas Insulas, ibique in Collegium Manilense Sancti Thomæ à Patribus Dominicanis admissum, linguam Hispanicam primùm, deinde Latinam, postea Philosophiam didicisse, jam annos viginti ætate prætergressum: cum studiis operam etiamnum

P R Æ F A T I O.

daret, tantam de ejus virtute existimationem fuisse, ut ipsi Ordinis Præpositi, idoneum existimaverint, qui remitteretur in Sinas, pecuniam Missionariis alendis necessariam ad eos delaturus: persunctum hoc munere periculoso tùm sanè ac difficili, summa cum zeli ac prudentiæ laude, adjunxisse se ad P. Garciam Missionariorum ejus Ordinis antiquissimum, ejusque in Missionum laboribus adiutorem fuisse tam strenuum, ut jam tùm à Christianis Pater appellaretur non secus ac si unus ex ipsis Religiosis foret: præcipuas ejus partes fuisse in adificandâ ipsorum Ecclesiâ apud pagum Tinteu: quippe ad illud perficiendum opus & eleemosynas summâ diligentiam corrogasse, & in cœmendo solo, in congerendis saxis, materia, cœmentis, in operis urgendis, unum omnia præstitisse: inde sacro donatum habitu, rursus Manilam navigasse ut intermissum studiorum cursum repeteret, atque ad sacrum sacerdotii Ordinem se compararet; quo suscepto in Sinas prædicandæ fidei causa rediisse; in eo munere, tùm reliquis virtutibus quæ Religiosum hominem decent suorum nemini cederet, tum verò omnibus longè præstitisse, atque ad Apostolica munia fuisse aptiorem eo nomine, quod & linguam patriam calleret melius & civium suorum mores, instituta, errores atque abusus certius dignosceret: inde factum esse ut Sina & ipsi crederent omnia sua libentius, & illum longè pluris facerent.

Quantum in eo solo præsidu fuerit ad religionem Christianam vel fovendam vel amplificandam intellectum est maximè, toto illo quinque sexve annorum spatio cùm grassante persecutione

P R Æ F A T I O.

huic uni licebat peragrarè Provincias, & Christianis opem ferre, quod cæteri Missionarii vel carcere conclusi essent, vel continerent se latebris, è quibus non poterant nisi summo cum periculo erumpere.

Tom. 1. Ait P. Navarreta se, Romæ cum esset, autorem
pag 409. extitisse ut P. Gregorius Lopez Episcopus deligere-
n. 12. tur, ac facile crediderim Vicarios Apostolicos ab
To. 2. p. eodem primùm edoctas, ea dere & ipsos egisse. Cer-
645. tè in monumentis Dominicanis Romæ editis anno

1675. extat Relatio Navarretæ ad Sacram
Bag. 693. Congregationem de propaganda fide: in
qua de Gregorio Lopez testatur eum sacris stu-
diis probè excultum in Collegio & Con-
ventu Maniliensi, & ad negotia tractan-
da exquisitissimâ prudentiâ præditum esse.
Ibid. In Bulla verò Clementis X. anno 1673. mense
pag 697. Septembri data, qua P. Lopez Vicarius Apostolicus
appellatus est, laudantur in eo zelus, doctrina,
prudētia, dexteritas, integritas, caritas, &c.

Sed, qua erat animi demissione, se ad tantum
munus electum esse vehementer admiratus, sup-
pliciter atque enixè petiit à summo Pontifice, ut
ne sibi tantum onus imponeretur, cui longè se im-
parem esse sentiret. Verum S. P. Innocentius XI. ad
quem post Clementis mortem ea littera delata
fuit, P. Gregorium tanto digniorem eo fastigio
ratus, quanto ipse minus dignum se esse crederet,
iussit & quidem in virtute sanctæ obedi-
entiæ, ut cum Episcopatu munus Apostolici Vicarij
per sex imperij Sinici Provincias, præter Coreæ
regnum acciperet. Perlata sunt hæc mandata sub
finem anni 1681.

Fervebat eo tempore disceptatio de cærimoniis
in cultu Confucii ac Progenitorum adhiberi soli-

P R Æ F A T I O.

tis, Cujus instauranda controversia occasio nata fuisse creditur ex priore P. Navarrete volumine, quod paucis ante annis Madridi editum, & Manulam primum, atque inde in Sinas perlatum fuerat. Propterea P. Gregorio Lopez velut antiquissimo sui Ordinis apud Sinas Missionario & linguae peritissimo, Patriorumque rituum ac doctrina Sinica optimo aſſumatori, cura fuerat à Præpositis demandata, ut quidquid super ea re posset in libris Sinarum Classicis reperire, diligenter colligeret. Scripsit igitur his de rebus tractatum quem absolverat die 12. Decembris anni 1681. circa illud tempus scilicet quo Pontificia Bullæ ad Sinas pervenerunt.

Tum verò ipse adhibito fratrum suorum Dominicanorum consilio decrevit, statim atque sacro ritu inauguratus esset atque in possessionem de more venisset, Missionariorum cœtum ex omnibus Religiosis Ordinibus, cogere qui Missionem hanc procurabant: quo in cœtu re tota discussa atque agitata constituerentur primum quæ ad facti quæstionem pertinent: tum pars utraque suas informationes scriberet iis de rebus quæ venire etiamnum possent in controversiam, eaque informationes unanimi consensu Romam ad Sedem Apostolicam mitterentur.

Re sic constitutâ, ut intelligitur ex ejus litteris tum ad P. Philippum Couplet, tum ad Ordinis sui Magistrum Generalem, dum occasionem expectat in Philippinas transeundi, ut inde Siamum inaugurandus tenderet, non cessavit à diligenti librorum Sinicorum lectione, quo tractatum suum & accuratorem & locupletiozem, uti postea fecit, Romam posset transmittere.

Quid hujus libri seu tractatus occasione Mani-

P R Æ F A T I O.

la perpeſſus fuerit , narrat ipſe datis ea de re litteris tùm ad ſummum Pontificem tùm ad ſacram Congregationem de propaganda fide. Ac verifimile eſt non alia de cauſa contigiffe , ut cœtum Miſſionariorum, quemadmodum decreverat, reverſus in Sinas poſt conſecrationem ſuam, Siami peractam, cogere non potuerit.

Ut ut eſt , ſcriptum ſuum tunc retractandum & in meliorem formam redigendum ſuſcepit , uſus ad id opera R. Patris à Leoniffa Franciſcani , qui nuper Epiſcopus Berytenſis appellatus eſt. Is ipſe Gregorii tractatum latinè vertit ; quæ interpretatio Romam miſſa ſubſcripto tam Gregorii Lopez quàm ipſius à Leoniffa nomine anno 1686. menſis Auguſti die 18.

Porro tractatum hunc inſtar commentarii cujuſdam eſſe rectè dixeris, in quo ſincerè atque optima fide refert quidquid in libris Sinicis obſervarat, quod alterutri parti favere videretur: ſic tamen ut non diſſimulaverit quid judicaret ipſe , & quo ſenſu intelligi deberent ii librorum Sinicorum textus , qui contra ſuam Sententiam adduci poſſent.

Postquam Vicarius Apoſtolicus primum, atque Epiſcopus, ut aiunt, in partibus, creatus eſſet, ad Epiſcopatum deinde Pekinenſem tranſlatus eſt. In utroque autem munere vii reſtatutur is qui nuperam Dominicanorum Apologiam ſcripſit ,
 Pag. 365. Quidquid ſuarum partium fuit , cum ſumma pietatis ac prudentiæ laude ſedulo explevit , ac demum Nankini obiit magno ſui deſiderio relictò cum Miſſionariis omnium Ordinum, tùm vero Chriſtianis apud quos ejus memoria in benedictione eſt.

R.P.Fr.



R. P. Fr. DOMINICI
MARIÆ SARPETRI
TESTIMONIUM
DE LIBRO SINICO
PATRIS MATTHÆI RICCI, I
qui inscribitur Tien-chu Xe-y.

E Go infra-scriptus Fr. Dominicus Maria Sarpetrus ordinis Prædicatorum lector, cum sæpiùs atque attentè legerim librum Patris Matthæi Riccii è Societate Jesu, quem is Sinicè conscripsit, *Tien-chù Xe-y* dictum, hoc est, *Cælorum Domini vera ratio*, quo quidem libro potissimùm de Deo agit: testor quod dictus Pater materias, quas ibi tractandas suscepit, adèd doctè simul & feliciter exhaustit, ut Missionariis, qui post illum deinde in hac Sinensî vineâ laboraverunt, parum vel etiam nihil relictum fuerit circa dictas materias, quod dictus Pater partim explicitè fuscque, partim implicitè & compendio non sit complexus.

Testor item mihi crebrò venisse in mentem, quod dictus liber opus esset ejusmodi, ut sine revelatione divinâ aut speciali Dei auxilio non

2 *R. P. Sarpetri Testimonium.*

potuerit ab autore perfici. In quorum fidem
hiscæ manu meâ subscripsi. Ex *Quang-cheu*
Metropoli Provinciæ Sinarum *Quang-tung-di-*
ctæ. 9. Maij 1667.

Fr. Dominicus Maria Sarpetrus ,
aliàs à Sancto Petro testifi-
cor , ut suprâ ; & quatenus
opus fuerit , juramento con-
firmit.

F I D E S S E U T E S T I M O N I U M

R. P. Fr. DOMINICI MARIAE

S A R P E T R I

DOMINICANI,

De Praxi Missionariorum Sinensium
è Societate Jesu,

*Circa Confucium & Progenitores de-
functos.*

E Go Frater Dominicus Maria Sarpe-
trus, alias de Sancto Petro Siculus, ordi-
nis prædicatorum, olim in studio gene-
rali Sancti Dominici de Panormo, per susceptio-
nem tituli Lectoratus, ad lectionem Sacrae
Theologiae approbatus & in conventu S. Zittæ
ejusdem civitatis Panormi, Lector actualis Phi-
losophiæ, fidem facio omnibus & singulis;
præsentem litteras inspecturis

1. Quod cum ex mandato Superiorum meo-
rum Provinciæ Sanctissimi Rosarii Philippi-
narum ejusdem ordinis, ad hoc regnum Sina-
rum Evangelicus prædicator missus venissem;
& ex novo iterum Superiorum mandato;

quam potui diligentiam per octo annorum spatium adhibuissem , ut de Sinicarum sectarum superstitionibus certior fierem ; judico , praxim , quam Patres Missionarii Societatis Jesu in hoc regno Sinarum se fatentur sequi circa permissionem , seu tolerantiam quarundam cæremoniarum , quibus Sinæ Christiani Philosophum Confucium , & suos progenitores defunctos venerantur , esse non solum tutam (utpote a sacra Congregatione universalis Inquisitionis approbatam) sed etiam si principia præcipuarum sectarum expendamus , esse oppositâ sententiâ probabiliorem , & ad aperiendam Ethnicis januam Evangelii , maximè utilem , ne dicam necessariam.

Probabiliorem quidem : quia qui profitentur tres sectas Sinarum præcipuas , alii , idest , litterati ex magistri sui Confucii decreto , de rebus invisibilibus non disputare , nec bona præsentis vitæ quærere edocti sunt : & aliquid ab alio sperare , quàm à Cælo vivente , quidquid illud sit , vel cum eodem Cælo in omnibus sive prosperis , sive adversis non se conformare , nefas putant. Alii , id est , qui ex duabus sectis Idololatricis *fôe* & *táo* , alterutram profitentur , defunctorum animas , vel veluti quendam aërem dissipari vel in inferno ad tempus detineri , vel transmigratione quadam Pithagoricâ denuò renasci judicant (paucis tamen exceptis animabus , quas in *Fôe* , vel *Xifi* , *Sien* , converti dicunt , & in Deorum quasi numerum , vel immortalium hominum adscribi) adeòque tantùm abest , ut ab aliis se adjuvari posse credant , quod è contrario ip-

fos Idolorum sacrificulos ad suorum defunctorum animas adjuvandas sæpè vocent , ut per eorum scilicet suffragia citius , feliciusque renascantur.

Consultò dixi : *Si principia præcipuarum sectarum expendamus* , sive earum primariam institutionem ; nam si præsentis temporis status consideretur , nihil sanè certi determinari potest , quippe tantum infidelium cæcitas invaluit , ut nec ipsi se ipsos intelligant , adeoque rectè hac nostra ætate de Sinensibus dici possit , quot capita tot sententiæ. Utilem verò , quia cum omnes Sinæ prædictas cæremonias ad cultum obedientiæ filialis reducant , si omnino ipsis eæ interdicanter , malè sentient de nostrâ sanctâ lege ; quasi hæc prohibeat filios honorare parentes : quod erit in maximum missionis Sinicæ detrimentum , & fidei propagationi obstaculum : eò vel maximè , quia Sinenses , quamvis sint variis superstitionibus involuti , tamen si ipsis proponatur non debere defunctis aliquid numinis tribui , vel ab ipsis bona petere , aut sperare , vel gratis concedunt , vel ad credendum facillè inducuntur ; maximè si ex ipsis suarum sectarum principiis rationes ad hominem desumantur. E contrario , si ipsis dicamus , nequaquam illis licitum esse quidquam offerre defunctis eo modo (ut ipsi dicunt) ac si vivi essent , in grati animi signum , & filialis obsequii , cum maximâ difficultate induci possunt , ad hoc credendum : & si credant , tamen experiuntur quamplurimas difficultates , non sine magno subversionis periculo : quod eventus probavit , non semel , aut rarò contigisse.

2. Fidem facio , quod Patres Societatis Jesu , in hoc regno Sinarum , Christum crucifixum , non solum verbo , sed etiam multorum librorum voluminibus , Ethnicis annunciant ; & de Sacrae passionis mysteriis suos Neophytos diligenter instruunt , & in aliquibus residentiis adsunt sacrae Passionis Confraternitates erectæ ; & novissimæ persecutor sanctæ legis *yam quàm sieñ* dictus , hoc potissimum , contra Evangelii præcones opponit . quod scilicet hominem crucifixum , pro Domino cæli , & terræ venerantur : quod quidem ex librorum Patrum societatis testimonio comprobavit.

3. Fidem facio , & quatenus opus est , juramento confirmo , quod ad duo prædicta testimonia proferenda (sicuti & ad aliud , quod anno præterito , nono Maij protuli , circa librum venerabilis Patris Matthæi Riccii Societatis Jesu , *Tieñ chü Xe y* dictum) non alterius precibus vel suasu , sed solo veritatis amore impulsus fui : considerans enim quod dubia , quæ circa supradictas materias vertuntur , non sunt juris , sed facti (ut sacra Congregatio innuit) & facti circumstantiæ in rebus moralibus ad arbitrium pii , & docti viri dijudicandæ sunt , durissimum mihi visum est , actus illos , quos tot , tantique Societatis Missionarii (quorum ego , per trium annorum curricula cum ipsis degens , familiariter tractans , charitatem expertus , doctrinam , pietatem , fidei zelum , morum probitatem , ne dicam sanctitatem , optimè novi) ipsorumque tot alii , non parvi nominis prædecessores

res ; ac venerabiles Sinicæ missionis patres , quos , inquam , actus tot , tantique viri judicant , vel judicant esse politicos , eos supersticiosos esse tenaciter affirmare.

Sciens ergo , quod propter quædam dubia , quæ circa supradictas materias P. F. Joannes Baptista de Morales ejusdem Ordinis , & Provinciæ SS. Rosarii Philippinarum vir planè Apostolicus , zelo fidei ductus , proposuit sacrae Congregationi universalis Inquisitionis , anno 1646. quidam minus piè erga societatem affecti , cum in Europa , tum in Indiis promulgarunt , Missionarios Societatis in regno Sinarum , non prædicare Christum crucifixum ; insuper permittere Christianos suos idololatrare ; ne & ipse tacens consentire viderer cum illis , & ut tantorum Patrum famæ , eo , quo possum modo , satisfacerem , præsens judicium protuli : illud tamen subjiciens sanctæ Romanæ Ecclesiæ judicio certiori in cujus fidem has litteras dedi , & manu propria subscripsi. D. in hac domo Cantonienſi , in qua loco carceris , vel exilii pro causa fidei detinemur , die 4. Augusti anno 1668.

*F. Dominicus Maria Sarpetrus
aliàs de Sancto Petro , qui
supra.*

EPISTOLA EJUSDEM
 R. P. SARPETRI
 SIVE A SANCTO PETRO
 DOMINICANI,

Ad Sacram Congregationem de Propagandâ fide.

EMINENTISSIMI DOMINI.

Postquam vastissimum Sinarum Imperium per tot sæcula sancti Evangelii luce caruit, nunc tandem has Missiones æquis oculis aspicere videtur ille misericordiarum Deus, *qui vult omnes homines salvos fieri & ad agnitionem veritatis venire.* Quanquam enim ejus indulgentiam peccata mea præpediunt, tamen placuit ipsi notam facere potentiam suam huic genti quæ minus est ad Idolorum cultum quàm ad atheismum propensa. Itaque cum jam eò res devenissent ut propediem morti addicendus esset venerabilis Pater Adamus Schall è Societate Jesu, cæterique Missionarii in ultimam Tartariam ablegandi; tum insolito concussa motu terra tremuit ac cælo fulsere cometæ terribiles. Prætereà verò ea contigère portenta quæ nullum facerent dubium aliquid inesse prorsus insolitum ac supra naturæ ordinem; unde Ministris Evangelicis crescit

in

In dies spes illa fore ut brevi munera sua repellant atque messem colligant longè uberriam.

Portenta hæc qualia fuerint exposui satis eâ chartâ quam ad hanc epistolam adjunxi; cætera verò quæ ad hujus Missionis statum & eam quâ nunc premimur persecutionem attinent, Sacra Congregatio discere faciliè poterit sive ex iis relationibus quas Romam Societatis Jesu PP. misere; sive potius ex ipso Patre Prospero Intorcetta Siculo ejusdem societatis qui ob suam eximiam singularemque dignitatem ac præstantiam coram aliis ex utraque familiâ Religiosis electus est procurator qui non suorum modò, sed & omnium Missionariorum nomine Romam proficisceretur, cujus singulas virtutes si fusius hæc epistola perquerer, vereor ne vos longiori sermone detinerem; neque dubito quin ipso usu ac consuetudine vos ipsi quid de tanto viro sit existimandum pro vestrà prudentiâ judicetis.

Sed ecce dum hanc Missionem Deus tot beneficiis auget atque amplificat, videtur adversarius noster diabolus vires omnes ad eam disturbandam exercere, atque interurbationes plurimas quas hostis ille pestifer & excitavit jam pridem & etiamnum excitat, longè præcipua meo quidem judicio habenda est illa quæ oritur ex diversitate sententiarum inter Ministrs Evangelicos, quorum animos ac corda nulla diaboli vis distrahere potuit. Et sub hujus quidem Missionis exordium, priusquam tum ex sancto meo Ordine tum ex sancti Francisci familiâ Religiosi huc adve-

B



nissent , fuerat inter PP. Societatis aliqua contentio à Sinensium litterarum ambiguitate & Sinicorum interpretum in interpretando diversitate profecta. Sed quoniam tota disceptatio se inter ipsos continuerat, neque foras erat progressa , facile fecerunt Præpositi Societatis ut eam sedarent & expensis utrinque rationum momentis statuerent de totâ re, quod optimum ad amplificandam Dei gloriam esse videretur.

Est inter alia de quo rursus haberi quæstionem Dæmon hoc tempore procurat , scilicet de nomine *Xam-ti* , quo Deum Optimum Maximum Sinicâ linguâ appellamus , & de aliis nominibus quibus Angeli ac Spiritus atque hominis anima designantur & de quibus constitutum sapienter à Præpositis Societatis, fuit , ne qua mutatio fieret in libris jam editis, in quibus *Xam-ti* vox fuerat usurpata , sed ut eâ voce deinceps abstinere Missionarii nisi cum coarguendi essent Athei ex ipsorum principiis atque ex iis libris quorum authoritatem ac fidem agnoscunt. Equidem Patris Intorcettæ rogatu atque hortatu scripsi linguâ Hispanicâ quid eâ de re censerem , & scriptum meum Eminentissimis Vestris si libuerit, velim exhiberi.

Postquam ex aliis Ordinibus Religiosi penetrarunt in Sinas, ortæ contentiones & acriter fuerant , atque ut inter homines Instituto ac familiâ diversos , longè difficiliores ad componendum. Præcipua fuit ea quæ spectat ad honores eos , quos Sinenses exhibent progenitoribus & cuidam Philosopho morali

quem Confucium appellant; cuius tanta est toto regno dignitas atque autoritas, eam ut repudiare nemo possit, ne illi quidem Philosophi qui in alia prorsus omnia abierunt, & tam à Confucio quàm à se invicem dissentiunt. Et quia decidi ea controversia ac defini-ri non potest, nisi ex textu librorum qui apud Sinas classici vocantur, atque ex eorum auctoritate, qui eos libros commentariis illustrant, quorum verum sensum assequi ac certò comprehendere, ut mihi quidem persuasi ex conscientiae testimonio ac iudicio, non difficile modò, sed & impossibile prorsus est ob singularem Sinensium litterarum atque hujus linguae verborum ambiguitatem; Idcirco PP. Societatis id unum sibi faciendum esse duxerunt, ut id quod est maximè probabile sequerentur in hujus Philosophi doctrinâ & in eâ ratione quâ eam viri litterati hujus temporis accipiunt atque interpretantur.

Qui cum Athei vulgò sint, atque hanc insaniam audeant sibi laudi ducere, cultum merè civilem ac politicum volunt esse illud omne quod in colendo Confucio solent adhibere; quod verò exhibent progenitoribus, nihil aliud esse deservunt, quàm filialis obedientiae notam & testimonium. Neque verò videntur unquam voluisse, quantum potest ex eorum tum dictis tum scriptis existimari, vel Confucium evehere supra Doctoris dignitatem ac gradum, vel progenitores aliter quàm parentes atque authores vitae venerari; aut eos in Idolorum numero ponere; quanquam in iis colendis admisceant sæpè multa superstitiosa

atque etiam, ut venit inter homines vulgi, quædam Idololatriæ propiora.

Inde nimirum factum est ut tam Dominici nostri quam Franciscani solius præsentis temporis habitâ ratione satius eac tutius existimaverint omnia prorsus sine ullo discrimine tollere, ac Neophytis interdixerint omni cultu qui solet Confucio ac progenitoribus exhiberi; tum eâ de re sacram Congregationem generalis Inquisitionis adierint & consulerint.

Sed quoniam ea ratio parum erat accommodata ad promovendam horum miserorum infidelium conversionem, sua pariter postulata Societatis Jesu PP. ad sacram Congregationem miserunt. Atque ex peculiari Spiritus sancti lumine sacra Congregatio rejectis variis ritibus qui illiciti aut sunt aut videntur esse in Confucii cultu, illud permiscere quod civile tantum ac politicum haberi potest, quodque ut tale haberi volunt litterati Sineses, quantum potest ex eorum factis existimari; neque enim ullâ ratione adduci possunt ut profiteantur se quidquam à Confucio postulare, ne scilicet ipsius placitis ac dogmatibus videantur adversari. Jam quod ad progenitores spectat sacra Congregatio cæremonias quasdam quæ per se vel bonæ vel certè indifferentes esse videbantur, inter Christianos tolerari jussit, ut & ipsi pacem cum infidelibus habere possent, atque facilius infideles ad Ecclesiam quod est Dei regnum, adduci.

Sed quia ex usu Curiae Romanæ responsum hoc paucis omnino verbis contineri necesse

fuit, orta est quibusdam suspicio, nùm res prout hîc geritur exhibita Romæ atque ex veritate proposita fuerit. Atque ego quanquam mihi nunquam planè insedit ea suspicio satisque perspectum habui quanto studio ac zelo Societatis JESU PP. fidei securitatem prosequerentur, tamen non constitueram prorsus quid esset existimandum, subverebarque ne quid inesset erroris saltem involuntarii. Verùm ita providente Deo factum est ut in hanc Cantoniensem domum conveniremus ex tribus Ordinibus Missionarii, unde mihi datum est Societatis Patribus uti perquam familiariter atque eorum zelum ac peritiam perspicere. Igitur discussis iis quæ mihi scrupulum aliquem injece- rant planè cognovi atque intellexi quid sacra Congregatio vellet observari. Quare Patri Intorcettæ tradidi suffragium sive documentum Latine scriptum, quod sive in Indiis, sive in Europa posset exhibere, quoties conducere id arbitraretur ad obsequium Dei, ad Societatis propugnationem, atque ad obturandum os hæreticorum qui Societatem maledictis ac calumniis suis laceffere atque in invidiam vocare contendunt.

Cæterum quæ scripsi, meo solius nomine, non ex aliorum Ordinis mei Religiosorum sensu ac judicio scripsi. Neque enim ego sum in ulla Præfecturâ constitutus, & tam illi duo qui mecum hîc degunt, quàm alii tres qui in Fokien- sis Provinciæ latebris abditi manent, nondum sibi satis ad omnia sua dubia factum esse profitentur. Verùm ita fore confido ac mihi de bonitate divina spondeo, ut postquam

PP. Societatis responderint difficultatibus iis quas proposuit Superior hic noster (*is erat P. Dominicus Navaretta*) atque ipse perspexerit quàm verè totam rem, atque ut erat, P. Martinus ad sacram Congregationem retulerit, ita perfecta sit inter nos animorum sententiarumque consensio; quandoquidem P. Vincentius Prot Vicarius noster Provincialis in Imperio Sinensi, unus ex iis qui se latebris continent, ad prædictum Superiorem nostrum procuracionem suam misit, quâ pollicetur ratum se habiturum illud omne quod ipse statuisset ad bonum pacis, atque ad procurandam inter Evangelii Ministros in agendo concordiam.

Unus est cujus consensum dubito vehementer an nobis polliceri possimus. Is est Antonius de S. Maria, solus ex Franciscanorum Ordine qui nunc in Imperio Sinensi degat. Cum enim ille jamdiu vel absque socio vitam agat vel eum habeat socium qui ex obedientiæ atque humilitatis Christianæ præscripto ipsi assentiatur atque obtemperet in omnibus quicquid sibi sentiendum esse duxit, non tanquam opinionem probabilem sed tanquam fidei articulum intuetur; & quanquam in sententiæ suæ proponendis argumentis judicio utatur atque intellectu, cum tamen iis argumentis respondendum est, quæ contra opponuntur, jam non judicii, sed solius voluntatis motu ducitur. *Numquam*, inquit, *id faciam*, *numquam illud permittam*, atque aliquando contigit, ut cum ego ipsum monerem ne tam facile Patrem Martinum mendacii ac

fallaciæ accusaret, quin potius attenderet ad sanctæ matris nostræ Ecclesiæ bonitatem atque indulgentiam, quæ posthabitis Patris Joannis Baptistæ de Morales postulatis, ea tamen permisisset quæ ipsi Joannes Baptista de Morales, & Antonius de S. Maria prorsus toleranda non esse censebant: *atqui suscepit ille, de Qualificatoribus aut Inquisitoribus loquens, Si ea volunt concedere, mittant ex urbe Româ qui ea pradicent, certum est enim mihi potius à Missione discedere quàm ad id me demittam.*

Equidem sic existimo eum nimio quodam zelo abreptum ita locutum esse, atque hæc verba ipsi incogitanti excidisse; nota est enim mihi viri virtus atque eximia probitas; neque dubito quin iis pareat omnibus, quæ fuerint à Sacra Congregatione constituta. Verùm & illud mihi certum videtur, eum esse hominis animum, ut nisi Sacra Congregatio quædam permitti Neophytis expressè jubeat, nihil illis prorsus ipsis permittat; neque enim ignoro ipsum aliàs professum esse, nihil se permissurum, nisi quod fuisset ab Ecclesia distinctè ac positivè præceptum.

Quamquam ipsius virtutem atque Apostolicum zelum summâ observantiâ prosequor, liceat tamen hoc profiteri, eam agendi rationem videri mihi maximè nostris omnibus Missionibus nocere; neque admodum vereri ne qua subsit inimici fraus & fallacia. Neque enim Sinenfes Neophyti aut etiam infideles persuadere sibi possunt tantam esse posse inter prædicatores fidei sententiarum diversitatem, illæsâ atque illibata charitate, & cum alios

aliter loqui perspiciunt, similes nos arbitrantur Bonziorum suorum, qui idolorum Sacerdotes sunt & sacrificuli, quorum quisque quicquid collibuit docet. Unde contingit ut non solum scandalo sit nostra dissensio; verum etiam sanctæ legis nostræ veritas revocetur in dubium; atque utinam minor esset utriusque hujus incommodi pertimescendi causa.

Ac quasi P. Antonius de S. Maria suo zelo satis esse non duceret, quod tam acriter suam de Confucio ac Progenitoribus sententiam tueatur, jam instaurat ac renovat priscam illam de voce *Xam-ti* controversiam, quâ quidem in re parum sibi ipsi constat. Cûm enim id tamquam certum atque indubitatum ponat Sinenfes neque antiquos neque recentiores ullam agnovisse aut divinitatem aut spiritua-lem atque incorpoream naturam, non video quo pacto idem indubitanter asserere possit à Sinis Confucium ac progenitores adorari.

Quæstiones alias duas idem ille suscitavit; alteram de jejunatoribus atque abstemiis Sinenfibus, alteram de usu pilei inter missæ solemnia. Ac primum quidem non attingam quandoquidem eò res adducta videtur esse, ut ipso invito licet ac repugnante, una atque eadem inter Missionarios omnes agendi ratio fervetur. Neque enim ea res pertinet ad ea quæ sunt sed ad ea quæ fieri possent, quæ cum in singularibus quibusdam eventis posita sint, iis facile occurri poterit, ita ut nullatenus pax inter Missionarios, atque in agendo consensus disturbetur.

Jam quod ad pileum attinet, vellet P. Antonius

tonius de S. Maria nos omnibus Neophytis præcipere, ut nonnisi aperto capite in Ecclesiâ essent; nosque ipsi Sacerdotes contra summi Pontificis veniam & eas rationes quibus ad id concedendum summus Pontifex adductus est, nonnisi aperto capite Missam faceremus.

Ac primùm quidem si jubentur Neophyti aperto capite esse in Ecclesiâ, jubentur scilicet nullam Deo ac Domino nostro significationem honoris exhibere, si quidem constans est apud Sinas opinio atque omnium suffragio comprobata minus esse reverentiæ in aperiendo quàm in operiendo capite. Ita fert consuetudo, ita Sinensis urbanitas & politia postulant. Frustra tentet quispiam aliud hominibus urbanis atque elegantibus suadere. Ac si quis forte in aliam sententiam adduci videretur eum sibi ipsi vim afferre oportet & quemadmodum tum facimus, cum *captivamus* intellectum nostrum in *obsequium fidei* atque illi quidem qui illud sibi persuaderi sinerent & pauci omnino essent & Gentilium irrisum ac ludibria sæpius paterentur. Neque id tantùm verendum esset, posset enim fieri ut Gentiles hoc sibi fingerent, nos eo consilio advenisse ut ipsos ad novas urbanitatis leges instituere-
mus, ac mores nostros paulatim ac consuetudines in perversum aliquem finem induceremus in Sinas, quod si contingeret, levî profectò nec satis dignâ de causâ persecutionem in nos ipsi excitaremus. Hoc aded ex eo patet quod ipse P. Antonius de S. Maria cum neque imperare sibi posset ut Sinas suæ

bonæ fidei permetteret, sineretque ex usu veteri capite operto sacrificio Missæ interesse, & Gentilium tamen querelas & convicia sedare vellet, multos jam annos desiit sacramenta fidelibus administrare. Quasi verò tantum Religionis non sit in operiendo capite quantum in aperiendo, si fiat utrumque reverentiæ testificandæ atque honoris exhibendi causâ.

Sunt quidem tres quatuorve Societatis PP. qui morem hunc paulatim in Ecclesias nostras induci percuperent; sed quis non videt hoc pacto discrepantiâ eò induci ubi nihil æquè necessarium est quam par atque eadem agendi ratio? illi enim qui aperirent caput & pauci essent numero, ut jam dixi, & cæteros omnes haberent repugnantes, atque adeò in illud idem incommodum res tota recideret.

Nam quod ad Sacerdotem attinet minimè decet profectò eum solum capite aperto esse dum laici omnes caput opertum habent. Præterquam quod Tartari, penes quos jam summa potestas est capite raso solent esse præter cirrum quem gestant Maurorum Africanorum ritu; quem sanè ritum à Sacerdotibus nostris servari dum altari deserviunt parùm decorum atque honestum videtur. Hinc est quod quamquam P. Antonius de S. Maria Patri Joanni Baptistæ de Morales Romam proficiscenti dedisset in mandatis si bene memini, ut de eo ageret, noluit tamen ille cum Romæ fuit, tentare ut in eâ rō quicquam immutaretur. Neque verò tam facile foret, quam videatur

fortasse culpam , novum hunc usum atque consuetudinem inducere.

Cujus rei testem me optimum possum profiteri. Cum enim per calores æstivos hoc mihi indulgere voluissem ut capite aperto missam facerem quanquam & pauci essent in templo Christiani & quantum quidem memini , notis adhuc tempus esset, eâ re ita commoti sunt, ut mihi deinceps summoperè cavendum existimaverim , ne quid unquam simile committerem.

Atque hæc sunt quæ officii mei esse duxi ad sacram Congregationem referre , tum ut iis prout expedit possit occurri , tum ut si quid tale P. Intorcetta de P. Antonio de S. Maria ad Vestras Eminentias retulerit non minor ipsi fides habeatur eo quod Jesuita sit , quo nomine quanquam videatur in propriâ causâ ferre testimonium , nulla tamen debet esse de ejus probitate suspicio , neque minus tribui ejus auctoritati pondus.

Jam verò quidquid Eminentiis Vestris statuere libuerit etiam contra meam atque horum omnium PP. sensum , judicio vestro ac definitioni jam nunc adhærere me profiteor , neque dubito quin optimum illud sit habendum quod fuerit à Vestris Eminentiis definitum. Quas Deus ad multos annos in Ecclesiæ suæ bonum servet incolumes. Ex Cantonienſi domo quæ nobis exilii seu carceris locus est 12^o Nov. anno 1668.

Cùm utar ſcriptione minutissima atque ad perlegendum difficili , verebar ne Vestris Eminentiis molestæ meæ litteræ essent ; itaque

his annis superioribus ad Eminentias Vestras non scripsi, neque de Patris nostri Joannis Baptistæ de Morales morte retuli. Benedictus Deus in æternum cujus providentiâ factum est ad singulare Missionis hujus bonum ut hac in domo repererim qui hanc epistolam exscriberet. Certè id unum student Missionarii Sinenſes omnes, ut divinæ gloriæ amplificandæ ferviant, quanquam alii zelum atque austeritatem, æquitatem alii ac mansuetudinem præferant. Equidem omnia mea sensa perlibenter ad vestrum nutum ac judicium accommodabo, doceri me, & si quid erravero, coargui non invitatus patiar à vobis, quibus Christus Dominus noster Christique summus in terris. Vicarius hanc dedere provinciam ut per certissima quæque media sanctæ fidei nostræ propagandæ consuleretis. Quod pariter unum omnium votis omnibus expetere non desino.

EMINENTIARUM VESTRARUM

Humillimus atque obsequentiſſimus

*Servus F. Dominicus Maria de
S. Petro Dictus Sarpetri ex
Ordine FF. Prædicatorum,
Missionarius Sinenſis indignus.*



TRACTATUS

Reverendi Patris Dominici à Sancto Petro Dominicani, Missionarii Sinensis, seu brevis explicatio rationum aliquarum, propter quas Christianis Sinenibus liber relinquitur usus caeremoniarum, quibus Confucium & progenitores suos venerantur, quemadmodum permisit Sacra Congregatio Inquisitionis Universalis sub Alexandro VII.

Articulus 41. actorum illius congressus qui habitus est in hac urbe Cantonienfi inter Missionarios Ordinum trium viginti tres, planè sic habet: Circa caeremonias quibus Sina magistrum suum Confucium & mortuos venerantur sequenda omninò sunt Responsa Sacra Congregationis Universalis Inquisitionis à SS. D. N. Alexandro VII. approbata, quia fundantur in valdè probabili opinione, cui nulla contraria evidèntia opponi potest. Et quanquàm hîc Patres Societatis Jesu pro solitâ suâ modestiâ, atquè ut pacem, concordiam, & agendi consensionem inter Evangelicos Ministros stabilirent ac firmerent, habuerunt satis opinionem suam valdè probabilem dici, neque voluerunt dicere probabiliorem oppositâ; tamen illud ipsum mihi ex conscientiae meae dictamine facien-

dum jam dudum esse duxi, quò simul & hæreticos hujus temporis confutarem ac convincerem, qui videntur has nostras controversias Sinenſes cauſæ ſuæ utiles arbitrari, atque inde famam Patrum Societatis Jeſu labefactare conantur; & aliquos etiam Catholicos ab errore revocarem, qui vel invidiâ vel odio ducti, vel nimio fortasſe zelo, *ſed non ſecundum ſcientiam*, abutuntur iis quæ geruntur in hoc Imperio atque hæreticos imitantur ſive libellis famoſis ſpargendis in vulgus, ſive theſibus publicè propugnandis cum ſummâ injuſtitiâ contra ſanctæ hujus Societatis Patres, quibus tantum nos debemus Miſſionarii Ordinis Sancti Dominici, ſive ex charitate, ſive ex gratitudine, ne dicam ex æquitate ac juſtitiâ.

Eam ob rem miſi tunc temporis in Europam teſtimonium meum, quo affirmabam cum juramento uſum cæremoniarum earum, quibus Confucii & mortuorum memoria colitur, fundari in opinione probabiliori quàm uſum & praxim oppoſitam. Ac tum quidem aliqua tantum adduxeram argumenta, quæ mihi ſatis eſſe videbantur ad rem conficiendam; jam verò ſic exiſtimavi facturum me operæ pretium, ſi quàm breviffimè potero, clariùs tamen atque expreſſiùs propoſuero fundamenta eorum argumentorum quibus evidenter probatur ſententiam Patrum Societatis Jeſu eſſe probabiliorẽ eâ, quam ipſorum adverſarii tuentur.

Quod idèò faciam, ut collegis meis Patribus ex Ordine ſancti Dominici, qui huic Miſſioni excolendæ & diutius inſervierunt quàm ego

feci , & olim etiam præfuerunt , meam agendi rationem approbem ; sic enim mihi persuasi prorsus ipsos rectâ intentione duci ac zelo sincero ad maiorem Dei gloriam atque animarum salutem procurandam incumbere , denique nihil habere optatius , quàm ut eo quod verum ac rectum est percepto & cognito habeant *pacem ad omnes , maximè autem ad domesticos fidei.*

Scilicet ita confido fore , cum illi rationum nostrarum momenta perpenderit , ut non modò intelligant me ea quæ hic gesta sunt , rectè deffendisse , verùm etiam gaudeant id fecisse me , quod ipsi fortasse priores facere debuerunt , cùm huic Missioni præfuerint , cui nunquam ego præfui , spero denique operam eos duros , ut iis Legibus pareatur , quas P. Navarretta ex potestate sibi ab ipsis commissâ cum Patre vice-Provinciali Societatis eo animo sanxit , ut inter Ordinis utriusque Missionarios pax & concordia servetur , atque in eâdem agendi ratione consensio.

Duplex est apud Theologos *probabilitas* , alteram vocant *intrinsecam* , atque ea petitur ab iis argumentis quibus nititur opinio aliqua in *Morali* , alteram *extrinsecam* quæ ducitur ab autoritate & numero Catholicorum Doctorum , his positis sit.

PRIMA PROPOSITIO.

Probabilius est per se & intrinsecè cæremoniis iis , quas Sacra Congregatio sub Alexandro VII. Neophytis Sinensibus adhi-

bere permittit in honorem Confucii & mortuorum, quasque à se permissas Societatis Jesu Patres consentunt, cultum merè civilem ac politicum contineri; atque has cæremonias supersticiosas esse qui deffendunt, sententiam sequuntur longè minùs probabilem.

Dixi agere me de iis cæremoniis, pro ut eas à se permissas Jesuita consentunt; atque ita planè jam dixeram in eo testimonio quod juramento confirmatum in Europam misi. Ubi nominaveram *praxim quam Patres Societatis se profitentur sequi*: Quod idcirco feci, quia et jam factum esse novimus, & verò fieri potest interdum, ut aliqui ex nostris Neophytis sive ex inscitiâ, sive etiam malo animo, plus in eâ parte faciant, quàm per Jesuitas liceat, ac deinde factum suum tueantur atque excusent adductâ falsò praxi Societatis, atque eorum Christianorum quos Societas habet erudiendos. Id operæ pretium est diligenter à Patribus Dominicanis adverti. Quod nisi fiat, facile continget, ut in multos errores labantur & gloriæ Dei contrarios, & existimationi ac famæ tam Patrum Societatis, quàm Christianorum quos erudiunt.

Neque omitti debet hoc loco postremum illud argumentum, quod à consensione mutuâ & concordia servandâ petitur in iis quæ inter Patrem Navarretam & Societatis Viceprovincialem convenere, satis esse debere, ut exempla Patrum Societatis Jesu nobis sequenda proponamus, eorumque praxim imitemur, licet quoad theoriam aut contrarietas aliqua supersit, aut aliqua fortasse dubitatio.

Id

Id quod proposui, verum ut crederem ac certò judicarem, fecit potissimum ea sacrificii definitio, quam ex Divo Augustino desumptam nō fallor Divus Thomas adducit, atque alii postea Doctores omnes admisere. Et sanè si minor esset in litteris Sinicis seu potius in vocibus ambiguitas, si minùs varii minùsque instabiles in respondendo Sinæ forent, faceret hæc una ratio ut quivis Theologiæ non ignarus indè non opinionem modò probabilem deduceret, sed etiam iudicium planè certum, eâ nimirum certitudine quam Theologicam vocant.

Atque id ut ostendam, suppono primum illud interesse inter *signum naturale* & *signum ad placitum* seu *artificiale*, quod signum illud quod naturale dicitur deducit nos in cognitionem rei significatæ independentem ab institutione hominum: ita ut viso eo signo statim nascatur in omnium animis cogitatio seu idea rei significatæ; ut patet in fumo qui est Signum ignis. Signi verò quod artificiale est, significatio prorsus est arbitraria, pendetque à voluntate illius penes quem est illud instituere ad hoc ut significet illud ad quod significandum assumitur. Unde fit ut eam vim habeat tantum in iis locis & communitatibus, in quibus fuit *sufficienter promulgatum & communiter receptum*. Atque ut exemplum adhibeam evidens ac manifestum, capite esse aperto coram viro nobili, inter Sinas signum est honoris ac reverentiæ, secùs in Europa.

Suppono 2º distinctionem quam D. Thomas atque omnes Theologi ponunt inter re-

D

ligionem , pietatem , observantiam ; pariterque inter harum virtutum objecta & actus. Apud Theologos loquor ; quare frustra immorarer diutius in iis omnibus explicandis. Id unum postulo ut ad ea advertatur animus ; cum enim agatur hic de iis actionibus , quibus Sinæ reverentiam suam exhibent , necesse est unicuique virtuti tribuere quod suum est , ne pietatis filialis ac reverentiæ sive observantiæ actus malè misceamus cum actibus religionis ; Quod qui facit , cum de infidelibus res est , quod civile tantum est ac politicum , miscet cum eo quod est superstitiosum.

Suppono 3°. discrimen quod metaphysici ponunt inter rationem formalem *qua* & rationem formalem *sub quâ* ; seu inter terminum *qui* & terminum *quo*. Hoc scilicet percepto facilius intelligitur quid Sinæ velint in suo *Ci* & quomodo illud adhibeant sub utrâque illâ ratione formali , seu termino.

Hoc igitur præcipuè fundamento nixi Jesuitæ probant *Ci* Sinense , quo nomine complectimur cæremonias ac munera quibus Sinæ progenitores mortuos aut magistrum suum *Con-fu-xu* venerantur , non esse verè ac propriè sacrificium ; Et cultum quo eos colunt , religiosum non esse , sed tantummodò politicum.

Sacrificium est signum quo is cui offertur , supremus agnoscitur Dominus , vitæ ac mortis arbiter , atque rerum universalium conditor. Cultus religiosus est actus quo , is cui exhibetur , aut Deus agnoscitur , aut verè ac propriè

sanctus. Atqui non agnoscunt Sinitæ per suum illud *Ci* Confucium ac progenitores suos supremos rerum omnium Dominos aut verè sanctos. Ergo illud *Ci* neque sacrificium est neque religiosus cultus : & consequenter qui eo ministerio fungitur *Sacerdos* verè & propriè non est ; neque locus in quo exhibetur , est *templum* , neque mensa supra quam fit , est *altare* ; neque imago , ante quam offertur *idolum* verè & propriè dici debet. Cæterum cum Jesuitæ nihil horum dici verè & propriè posse deffendunt non fatentur tamen idcirco dici saltem aliquo modo posse. Sic enim loquuntur *in rigore* , ut aiunt , *scholastico* , adhibitis iisdem verbis , quæ adhibenda esse censuit Sacra Congregatio in iis responsis quæ dedit ad quæsitâ Patris Joannis Baptistæ de Morales. *Supposito quod mensa illa non est verum & proprium altare , sed quadam tabula atque alibi voces easdem usurpavit : non autem in vero & proprio altari.* Hæc enim omnia nomina tribuuntur tantùm iis rebus quæ ad divinitatem atque ad veram sanctitatem referuntur. Quod si quis Europæus ea quandoque adhibuit de illo *Ci* Sinensi , censendus est id fecisse vel ignorance vocum aliarum , vel ex aliquâ similitudine cum iis quæ in Europâ nominantur *Templum* , *Altare* , *sacrificium* , *Sacerdos* , &c. Illud voluit Sacra Congregatio : illud idem Jesuitæ deffendunt : Illud Pater Martinus spectavit in suis propositionibus : quod quidem fateor à me antè ignoratum fuisse , quàm huc venirem.

Atquè ut ad syllogismum nostrum rever-

tamur, satis constat negari non posse majorem, seu propositionem primam, quâ scilicet continetur definitio sacrificii, atque essentielle discrimen actus religiosi ab actibus aliarum virtutum. Neque minùs certa est altera propositio, saltem si intelligatur de *intentione explicitâ, directâ & formali*. Manifestum est enim neque litteratos, qui Confucio, neque filios qui progenitoribus illud Ci exhibent, ullâ ratione velle eos reponere in eorum numero quos appellant *Pu-sa foe*, vel eorum quos *Xing-sien*: neque eo cultu ipsis tribuere supremum rerum omnium dominium, quod ipsius *Xam-ti* proprium est; neque eos collocare ad dexteram aut lævam ejusdem *Xam-ti*, quasi ex eo loco sibi ferre possint auxilium: Quod existimant de Rege *Ven-Vam* & aliis quibusdam antiquioribus, quos sanctos arbitrantur.

Igitur in eo posita est difficultas, nùm eo ipso quod offerunt illud Ci, intelligantur hæc omnia quæ commemoravi superius, *tacitè saltem & indirectè velle, practicè & indirectè profiteri*. Hanc esse eorum mentem deffendunt Jesuitarum adversarii. Negant Jesuitæ, sententiamque suam probant argumentis validissimis, quibus nulla *profectò evidentia in contrarium potest opponi*.

I. Primum argumentum desumitur ex ipsâ signi arbitrarii naturâ, quæ in eo est, ut id unum significet ad quod significandum est institutum; nullamque significandi vim habeat aliam ab eâ quam recepit in primariâ sui institutione *ab habente potestatem instituendi, nisi*

quid mutatum fuerit ab habente consimilem potestatem, & fuerit hæc mutatio sufficienter promulgata, & recepta. Atqui ex quo illud *Ci* usitatum est in Sinis, nunquam institutum est ut significaret id de quo nunc agimus. Nam triplex *Ci* jam tùm à Regis *Xun* temporibus Sinæ distinguunt. Primum offerunt suo *Xam-ti* quasi supremo rerum omnium Domino; alterum spiritibus inferioris ordinis, quasi verè sanctis eâ sanctitate quam sibi fingunt; Tertium progenitoribus suis, quasi vitæ authoribus. Hanc triplicem rationem formalem *qua*, videre est in libro quem appellant *Xu-Kim*, neque apparet ex quo triplex illud *Ci* fuit institutum, novum aliquid constitutum fuisse, quo cæremoniarum harum essentielles differentiæ rationesque formales confunderentur. Ergo illud *Ci* absolute atque in se spectatum non est signum quo agnoscatur supremum rerum omnium Dominium in eo cui offertur; Ergo illud *Ci* quo Confucius & progenitores coluntur cultus religiosus censeri non debet.

Confirmari potest hoc totum 1°. ex eâ ratione quâ se & litterati in *Ci* Confuciano & posterii in *Ci* progenitorum gerunt. Nihil enim aliud quàm alteri doctrinam optimam Confucio, vitam atque institutionem progenitoribus debere se profitentur. Confucium ergo magistrum agnoscunt, progenitores verò parentes atque authores vitæ, & sub eâ solâ ratione formali venerantur: hoc volunt suo illo *Ci*, ac prætereà nihil significans, nihil testantur, nihil profitentur.

2°. Signum institutum ad rem aliquam significandam , eandem simul & ab re quâlibet aliâ distinguit. Tritum est enim illud apud Philosophos res per essentiam suam ab aliis rebus discerni, sive idem esse & constitutivum cujuscumque rei & distinctivum. Atqui valdè differunt apud Sinas idolum & quod idolum non est : cultus merè civilis ac politicus ; & religiosus cultus ; saltem ex quo idololatricæ sectæ in Sinas invecæ & propagatæ fuerunt , neque est quisquam apud Sinas tam rudis tamque ignarus rerum omnium , qui non egregiè calleat quibusnam rebus tribui debeat appellatio *Pu-sa foe* vel *Xing-Siem* , quibus non debeat. Sed hoc discrimen ut servant , non facit ipsum *Ci* , ità ut *Pu-sa* habeatur ille cui offertur ; non habeatur ille cui non offertur ; ergo ipsum *Ci* in se & præcisè ut *Ci* non facit ut habeatur inter Idola is cui tribuitur.

Tertiò. Atque hoc evidentiùs apparet ex eo idololatrarum usu de quo dicere omiseram in eo testimonio , quod in Europam anno proximè elapso misi. Cum enim *Ci* faciunt alicui defuncto simul advocant Bonzios sive *Tao-sus* qui defuncti animam eximant ab inferis. Non volunt ergò cum cui offerunt illud *Ci* esse jam in cœlo , vel evasisse *foe* aut *Xim-siem*.

Quarto. Illud idem manifestè probatur ex eâ appellatione quam Sinæ tribuunt suo *Ci* , cum religiosum cultum esse volunt. Tum enim appellant *Ki sù* vel *Ki-Ci* id est munus quo oblato aliquid postulatur. Itaque illud non habet omne *Ci* formaliter ut *Ci* ut aliquid

postuletur : ac proinde non est omne *Ci* præcise postulationis signum , atque id concedi potest ad summum , postulationem esse circumstantiam accidentalem ipsius *Ci* , vel certe partem subjectivam & speciem sub eo genere contentam. Sed qui indè velit effici omne *Ci* religiosum esse cultum , tam absurdè facit quàm qui ex eo quòd homo sit animal rationis particeps consequi velit , ad omne animal rationis usum pertinere.

Quintò. Signi proprium est , ut ad sui positionem rem significatam omnium spectantium animis ingerat. Atqui ipsum *Ci* non infert animo cogitationem divinitatis aut sanctitatis. Qui enim inter Sinas videt ab aliquo fieri *Ci* alicui defuncto , non continuò putat divinitatem sanctitatemque ipsi tribui aut similem eum idolis *Foe* aut *Xim-sien* putari ; non existimat continuo aliquid ab eo postulari : sed id scilicet unum existimat eum qui hæcæremonias usurpat secundum morem patriæ defungi eo ritu , quo gratum parenti animum amoremque testetur : atque indè est quod hunc virum appellant *hiao* quo uno satis ostenditur nihil eos amplius facere cùm suum *Ci* defunctis exhibent , nihil aliud velle aut profiteri.

Sextò. Quod quidem clariùs patebit , ex iis quæ sunt cum Imperator facit *yu-ci* in honorem alicujus defuncti , cujus insignia sint in ipsum officia ac bona merita quanquàm enim id Sinis vulgò persuasum est penes Imperatorem esse ut defunctum inter idola reponat, non ideò tamen existimant eo ipso quo Imperator

offert *ja-ci* alicui defuncto , velle eum inter idola coli atque haberi. Id adeò jam posueram additione his postremis diebus factâ ad eam testificationem quam propriâ manu signatam in Europam misi , quam additionem consulat qui plura eâ de re vult.

Denique si excutiantur omnes relationes ac proprietates signi à Logicis & metaphysicis excogitatæ inveniemus profectò nihil esse vel in *Ci* sumpto generatim ut sic & in communi vel in *Ci* proprio mortuorum , quo possit ad significationem religiosi cultûs determinari.

II. Syllogismi supra positi majorem propositionem probant præterea Patres Societatis ex politiæ Sinicæ naturâ. Eam enim Sinæ , ut habetur in libro *Te-Kim* ad imitationem cœli ac terræ efformatam esse voluerunt , atque ad motus , influxus , partiumque omnium inter se diversitatem ac subordinationem referri. Hinc nimirum factum est ut triplicem in Imperio constituerint Ordinem , Imperatoris qui nulli subsit ; præsit omnibus ; Mandarinarum qui ita populo præsent ut Imperatori subsint , denique privatorum hominum ac purè subditorum. Deinde triplex pariter *Ci* distinguunt. Primum quod *Xam-ti* supremo rerum omnium Domino Imperator tanquam supremus quoque Dominus offert : alterum quod geniis montium ac fluminum offerunt Mandarini tanquam & ipsi superni Imperatoris administri : tertium quod privatus quisque progenitorum suorum memoriæ consecrat. Atqui si privati homines supremum dominum ei omni tribuerent , cui *Ci* suum offerunt , facerent

facerent evidenter contra voluntatem eorum qui primi cæremoniæ illius authores fuere , politiæ Sinicæ naturam everterent , substitutâ republicâ , in quâ imperarent plurimi , nulli intra merè subditorum ordinem consisterent.

III. Sententiam suam ac propositionem Jesuitæ probant ex principiis illius sectæ quam litterati atque adeò Reges & totius Imperiî Mandarinî profitentur , sibi que à majoribus suis & regni conditoribus traditam esse certum habent. Nam illi & in cæremoniis *Ci* postulari quidquam non probant , aut alteri cuiquam quam soli *Xam-ti* supremum dominium Imperiumque tribui , & tamen filios volunt iisdem cæremoniis *Ci* ritè perfungi , quibus scilicet suam ergà parentes defunctos observantiam contestentur , idque & ipsi *Xam-ti* gratissimum esse , & rationis lumini maximè consentaneum doceant. Quare fieri omninò non potest ut omne *Ci* postulationem aliquam ipsorum iudicio complectatur ; nisi eorum magister Confucius fœdè ipse sibi pugnare dicatur & contradicere. Atqui Sinæ , apud quos ea litteratorum secta jam tot à sæculis viget , animadvertissent profectò pro suâ ingenii sagacitate , contradictionem illam , neque Confucium ejusque doctrinam tanti fecissent , neque ejus existimationem , in dies augeri & novis laudum accessionibus crescere paterentur. Itaque non est apud eos illud *Ci* cultus religiosi signum ac professio.

IV. Probatur illud idem autoritate li-

E

brorum *Kia-Li* & *Li-Ki* atque aliorum qui apud eandem sectam habentur & de cæremoniis agunt, præscribuntque ritum & illius *Ci* quod Confucio, & illius quod mortuis adhibetur. Comparatur enim utrumque cum iis epulis quibus honoris causâ viri nobiles excipiuntur, quorum scilicet ritus atque ordo libris iisdem præscribitur. Et verò si quid unquam hîc fuit immutatum circâ dapes in iis epulis apponi solitas, immutatum etiam fuit in iis quæ in ipso *Ci* apponuntur.

V. Deinde omnes libri qui de ritibus ac de ipso *Ci* agunt, sive quod Confucio, sive quod progenitoribus offertur, eo fine jubent offerri, ut his pro acceptâ vitâ, atque institutione, illi pro egregiis doctrinæ traditæ monumentis grates cum aliquâ honoris significatione persolvantur. Suum enim *Ci* vocant *hiao* aut *Pao-puen*, nihil verò uspiam extat quod exhibendo religioso cultui affino sit. Constat igitur litteratos atque omnes proinde Sinas in exhibendo *Ci* nullatenus de religione cogitare.

VI. Quin & argumentum Patres Societatis ex eo deducere possunt quod apud hujus ætatis litteratos multum grassetur atheismus. Atheos enim neque Confucio suo magistro neque progenitoribus cultum ullum religiosum exhibere patet. Longè illi absunt ab eo ut credant spiritus vel sumere quidpiam ex apposis cibus, vel adesse illis tabellis quibus defuncti nomen inscriptum est. Longè absunt ab eo toto fabularum insanarum genere, quod Bonzii qui *Tao-sus* dicuntur induxerunt, ut

vulgus rude atque imperitum errori manciparet, & quo cæremonias eas infecerunt quibus Mortuorum Ci continetur. Quæ enim esse potest consensio superstitionum harum cum atheorum errore, quo religio prorsus omnis aboletur? Itaque eas improbant & quantum possunt damnant ac prohibent suis in libris & scholis ut rationi suoque *Jü-Kiao* planè contrarias. Illud verò Ci de quo nunc agimus nullatenus improbant, nequè in antiquum ac legitimum illius tabellæ, de quâ dixi superius, usum invehuntur. Cùm enim esset olim in more positum ut adhiberetur infans cui ut vivæ imagini in defuncti locum substituto Ci offerretur, recentiores pro imagine defuncti tabellam nunc adhibent quæ sit ipsius defuncti loco; & quam parentibus si viverent etiamnum, exhiberent reverentiam, eandem exhibent illi tabellæ non eo modò tempore quo ille ritus absolvitur, sed etiam alio quovis: longè quippe facilius est tabellam præsentem habere cùm lubet, quàm infantem. Atqui athei qui sunt inter Sinas, morem hunc non accusant, sed & laudant, & ipsi sequuntur, quanquam atheismum suum sibi laudi ducunt. Igitur non existimant vel ipsum Ci vel illius tabellæ usum atque honorem ipsi habitum, ad religionem pertinere, sed tantum ad gratum animum sive filii erga parentem, sive discipuli erga magistrum hoc est ad cultum merè politicum ac civilem.

Jam eo posito quod Theologia docet, nimirum actionis alicujus bonitatem ac malitiam

moralem perì primùm ac potissimum debere à fine atque intentione agentium , hanc in-
 tionem suam cum soli agentes docere nos
 possint , debemus sanè iis dicentibus credere ,
 neque possumus , aiunt Patres Societatis ,
 contrarium absque temeritate aut erroris
 periculo judicare. *Semper enim unusquisque*
presumendus est bonus , donec appareat ma-
lus. Itaque si Doctores & litterati Sinæ tam
 antiquis Missionariis quàm recentioribus di-
 xere , quod eos dixisse constat , has voces
Xin-co & *Xin-quey* quas tùm usurpant cum
 orationem ad has tabellas dirigunt per me-
 taphoram usurpatas intelligi debere , non
 video cur iis non habeatur fides ; Nam & in
 re qualibet stari debet non rudiorum sed peri-
 tissimorum virorum existimationi ac iudicio ,
 & planè ridiculus censeretur , qui cum ad
 aliquod collegium se contulisset , ut expone-
 ret conscientiae casum aliquem , non consu-
 leret tamen eos quos constaret esse peritissi-
 mos harum rerum , vel ita consuleret , ut
 nollet respondentibus credere , iisque ne-
 glæctis ac spretis ostiarium aut coquum adiret.
 Sed nimirum hæc spectant ad probabilitatem
 quam extrinsecam vocant , quare his interim
 supersedeo.

VII. Denique sententiam suam Societatis
 JESU Patres librorum apud Sinas authen-
 tiorum textibus atque interpretum animad-
 versionibus adductis facile probant. Quæ
 omnia hic omitto recensere , cum nostri ex
 ordine sancti Dominici Patres ea sint habituri
 collecta in libris quos super eâ re Societatis

Patres ediderunt, quosque utpotè in ipsorum gratiam præcipuè scriptos ad ipsos proculdubio mittent. Verùm ut jam ad propositum meum revertar, cum vim eorum argumentorum pondusque perpendo & cum sententiæ contrariæ principiis conféro, quæ quantum possum intelligere, solo *materiali* cæremoniæ de quibus agitur, sive externâ actione nititur, & admixtione superstitionum aliquarum, quæ inductæ sunt ab Idololatris, suntque ex earum numero, quas intellexit sacra Congregatio, cùm ait *sublatis superstitionis*; tum equidem sic existimo, neque dubito quin idem sit existimaturus quicumque nullam opinionem præjudicatam admittet, & sincero veritatis cognoscendæ studio vehementiorem quemdam zelum prius temperabit, quàm ad hanc faciendam comparisonem accedet: sic inquam existimo sententiam Patrum Societatis esse longè probabiliorem oppositâ quia fundatur, ut cum Theologis loquar, in *formali* hoc est in specificativo & distinctivo actionum humanarum cùm e contra adversariorum sententia non fundetur nisi in materiali, accidentali & accessorio, quodque nullatenus pertineat ad quidditatem & essentiam, nullatenus sit distinctivum & specificativum.

Ubi notandum illud est, scilicet de rebus atque iis præcipuè, quæ ab animis hominum atque abditis cogitationibus pendent, existimari potius debere ex dictamine rationis quàm ex oculorum auriumve judicio. Placet id exemplum assumere quod Thomistis no-

stris valdè placiturum esse certò scio. Schola nostra vult dari resolutionem usque ad materiam primam in generatione & corruptione. Hoc ipsum Scotistæ pernegant, afferuntque species sensibiles & quantitatem corporis vivi & cadaveris, quas utrobique aiunt easdem esse, quia ad oculum esse eadem videntur. Sed nimirum respondemus unitatem & distinctionem numericam esse ejusmodi, ut de iis non debeat *ad oculum* judicari, sed referri ad mentem atque animum, cujus est de iis existimare. Id ipsum nunc agitur. Scotistæ personam suscipit ille divinæ gloriæ vindex atque æmulator præfervidus, cum ait; hos atque hos Sinæ in suo Ci ritus usurpant, qui *ad oculum* iidem prorsus videntur esse atque illi quos apud alias gentes adhibent idololatræ: Et Thomistas se gerunt Societatis Patres, cum respondent moralitatem actionum humanarum esse ejusmodi, ut de ea non debeat *ad oculum* judicari, sed referri ad mentem atque animum, cujus est de ea existimare. Statuat quilibet Thomista prudens, utrius partis argumentum ad rationem veram censeat esse propensius.

Erit fortasse qui objiciat inferendo judicio de bonitate aut malitiâ actionum humanarum attendi solere ad earum circumstantias; circumstantias autem in eo Ci Confuciano & defunctorum manifestè superstitionas esse, neque aliter posse existimari; quippe in Confuciano pecudem mactari, invitari atque advocari spiritum, ut adsit; effundi vinum, ipsi offerri sanguinem ac pecudis pilos, po-

steaque infodi ; verbis amplissimis ejus virtutem & laudes prædicari , cœlo ac terræ comparari , omnium quæ geruntur rationem huic tabellæ reddi , vocari eam sedem spiritus &c. alia etiam ad pompam ac magnificentiam adjungi , probari vino pecudem in Ci Confuciano mactandam ; certum præscriptum esse tabellæ modum certamque formam , & alia generis ejusdem permulta , quæ recensere sit infinitum. Atqui , dicet aliquis , omnes hæ cæremoniae si non sunt prorsus idololatricæ , certè habent eam superstitionem quæ *vana observantia* dicitur , ac proinde Ci Confucianum & mortuorum cultus merè civilis non est ; sed ab ingenio proficiscitur vel idololatrico vel superstitioso , ac proinde nihil probant omnia quæ in contrarium afferuntur.

Antequàm huic objectioni respondeam , probemque , quod hic unum mihi satis est , sententiam Patrum Societatis J e s u esse intrinsecè probabiliorem oppositâ , operæ pretium est hic monere circumstantias has omnes atque alias de quibus sæpè P. Joannem Baptistam de Morales , P. Ant. de S. Maria , & quosdam alios Ordinis mei Missionarios antiquiores loquentes audivi , Patribus Societatis ignotas minimè fuisse ; imò alias ab iis accepi , de quibus nihil inaudieram priùs quàm in hac domo versarer. Sed iidem affirmant istas circumstantias vel à se vel à suis decessoribus perpensas atque ad judicium revocatas fuisse : quibus id affirmantibus negare fidem non videor mihi nisi contra jus ac meritum posse : ii sunt enim quorum mihi spe-

etata virtus est ac probitas, & quinque sexve annorum familiari consuetudine comprobata.

Duo itaque cæremoniarum genera Jesuitæ distinguunt in ipso *Ci*: alterum genus quod à Bonziis sive *Tao-sus* additum atque assutum; alterum desumptum ex libro *Jû-Kiao*; & illas quidem superstitiosas fatentur esse: sed quoniam idololatræ nullam in administrando Imperio partem habent, Patribus Societatis non videtur fieri posse, ut illæ consuetudines quæ apud solos idolorum cultores obtinent, saltem extrâ ipsorum sectam, vim ullam habeant vel illius immutandi quod est jam ab initio constitutum, scilicet *ab habentibus potestatem*; vel derivandæ malitiæ in ipsum *Ci* præcisè spectatum, quod in eo positum est, ut mortuis quasi vivis ac præsentibus, cibi atque alia id genus offerantur in observantiæ ac grati animi signum.

Sed neque ipsi idolorum cultores intra suam sectam hoc voluere. Nam ita Sinicis antiquis cæremoniis sua superstitiosa per accidens addidere, ut non prohiberent tamen quominus ipsum *Ci* foret atque haberetur signum illius pietatis ac reverentiæ, quâ parentes mortuos filii prosequuntur. Nihil erit igitur reprehendendum si tollantur modò superstitiosa, quemadmodum sacra Congregatio jubet. Nam cæremonias quidem in libro *Jû-Kiao* præscriptas facile est ab omni superstitionis suspitione liberare, cum eâ intentione fiant, quæ civilis est ac politica, quæ procul abest à superstitione, quæ demùm eas vindicat huic virtuti

tuti quam scholaſtici pietatem filialem ſeu obſervantiam appellant , quia ſcilicet habent prorſus rationem eandem formalem *ſub quâ*. Itaque licet nobis eæ res vanæ eſſe videantur alio ſub cælo natis & ſaniora ac meliora edo-ctis , non eſt tamen cur illas damnemus quaſi pertineant ad eam ſuperſtitionis ſpeciem quæ *vana obſervantia* dicitur , quæ appellatio ex D. Thoma atque aliis Theologis non convenit niſi *actibus vanis per exceſſum in verâ religione aut vanis in falſâ religione*.

Ergò cùm certum ſit , aiunt Patres Societatis , conſtetque & rationibus ſuprà memoratis & diligenti perquiſitione ſæpius factâ , nunquàm litteratos Sinas ſeu veteres ſeu novos Confucio & mortuis cultum religioſum tribuere voluiſſe , conſequens eſt cæremonias illas à nobis tolerari poſſe , quamlibet futiles nobis ac vanæ videantur. Ita ſuæ ſunt cuilibet genti conſuetudines quæ vanæ propriè dici non debent ſi fuerint uſu continuo probatæ atque ab omni retro memoriâ repetitæ. Exemplum habemus in eâ conſuetudine quæ propria Sinenſium eſt , ut ſi quem excipiunt domi , priùs extremâ ſuæ manicæ orâ ſedile illud abſtergant , quo illum volunt conſidere , quæ ſanè conſuetudo non minus vana mihi ſemper eſt viſa , quàm eæ cæremoniæ quas ad ſuum Ci ſolent adhibere : ſed eam tamen accuſavit nemo , quia nimirum *eſt extra lineam religionis* ſive ad religionem non pertinet.

Nihilominus ut tutiora eſſent omnia , liberique ab omni metu & formidine animi forent , interdictum fuit Chriſtianis ne adef-

sent illi Ci quod bis per annos singulos Confucio solet exhiberi, quia scilicet huic adesse nulla lex jubet: Et Pater Societatis JESU Vice-Provincialis Præpositus eâ transactione quæ inter ipsum & Patrem Navarrettam facta fuit, recepit se interdictum prorsus ad eum modum qui habetur in eâdem transactione, quam, qui volet plura, consulat. Sed ne quis existimet eo sic interdictum esse, quasi sit superstitiosum, Patres Societatis eas rationes scriptis mandavere, quibus efficitur illud abesse ab omni superstitione; & librorum Sinensium testimonio, virorumque peritorum ac fide dignorum autoritate & responsionibus datis post diligentem positam in eâ unâ quæstione pernoscendâ curam, ostenderunt quis foret super eâ re litteratorum Sinensium animus atque intentio, & quantum ad ea omnia statuenda rationes politicæ contulerint.

Ea quibus Societatis JESU Patres ducuntur argumenta, deprompta sunt potissimum ex eo libro quem vocant *Li Ki*. Pater Navarretta Præpositus noster cum eâ de re legisset Patris Bramati librum, *atqui inquit, viam ille commonstravit mihi, doleoque vehementer quod ea non didicerim ac cognoverim prius*, ac perlectis ipsius *Li-Ki* tractatibus post ea percepta rudimenta quæ ex Patris Bramati libro hauserat, ultra ac motu proprio Patrem Vice-Provincialem adiit, habuitque eam de quâ dixi transactionem.

Sed & illud à fratribus meis Dominicanis diligenter adverti debet, sacram Congregationem liberum tabellarum usum reliquisse,

modo mensa non foret *verum ac proprium altare*,
 Quamquam P. Joannes Baptista de Morales
 exposuisset infideles sacra his tabellis facere,
 easque vocare *sedes animarum*. Quid igitur si
 certò jam compertum fuisset mensam hanc
 verum altare non esse; aulam non esse tem-
 plum; ipsum *Ci* non esse sacrificium; illam
 laudum prædicationem haberi prorsus hyper-
 bolicam ac plenam ostentationis, non verita-
 tis; tabellas sive inscriptiones eo esse loco quò
 esset imago defuncti; sedes animæ non appel-
 lari nisi fictitiè, nisi per metaphoram ac re-
 præsentationem; quòd verò coram illis eorum
 omnium quæ geruntur ratio reddatur id ita
 haberi atque accipi, quasi filii parentibus etiam
 defunctis eadem prorsus exhibeant officia quæ
 vivis exhiberent.

Jam ut objectioni allatæ satisfaciam, negari
 non potest attendendas esse circumstantias
 actionum humanarum; sed profectò inter alias
 longè præcipua est & cæterarum caput ac
 veluti forma, ea quæ agendi motivo & fine
 continetur. Quâ omissâ, si res in se tantummo-
 dò spectentur, actio prorsus indifferens erit,
 hoc est neque bona neque mala. Verbi gratiâ
 pecudum mactatio inter ipsius *Ci* cœremonias
 vel maximè reprehenditur: Quam tamen,
 si præcisè atquè in se spectetur, quis audeat
 idololatriæ condemnare nisi qui lanianos
 omnes dicere velit idololatrias? Ulterius igi-
 tur oportet inquiri finem illi mactationi pro-
 positum. Qui finis si honestus sit, honestam
 pariter actionem esse necesse est: Contrà si
 finis inhonestus, si ut is cui mactatæ pecudes

offeruntur , supremus agnoscat *Dominus* & vitæ necisque arbiter , consummatio est idololatriæ. Verum si is qui offert , hoc solum vult ostendere , daturum se libenter alteri has pecudes in escam si etiam nunc viveret , quis est tandem Theologus qui actionem hanc dicat idololatriæ affinem ?

Hoc idem potest dici de sanguine animalis ac pilis qui offeruntur , quæ actio si spectetur in se , sanè neque bona est neque mala ; sed ex solâ agentis intentione judicabitur an vana aut etiam superstitiosa sit. Atqui ego scriptum quoddam Sinicum quo *Ci* confucianum describitur , quodque nî fallor Ritualis cujuspiam fragmentum fuit , linguâ Hispanicâ donare à Patre Navarretta jussus , in eo sic reperi , pilos idèò offerri ut animal significetur esse integrum , *T-Cáo-civen* , sanguinem verò , ut idem animal hac solâ de causâ mactatum intelligatur , non morbo confectum , non allatum è macello , *T-Cad-xà*. Atque hæc duo velim adverti diligenter , tum responderi , quidnam tandem esset mali , si quis amico ad cænâ invitato pridie scilicet mactari juberet animal quod ipsi apponi vellet in cibum , atque ad ipsum animalis pilos ac sanguinem mitteret , his quas attulimus aut aliis ejusmodi rationibus ductus. Quæ pariter & de aliis ipsius *Ci* circumstantiis dicta possunt intelligi.

Quare Patres Societatis post diligentem curam in eâ re discutiendâ positam , cùm id comperissent nullum alium illi nisi politicum finem inesse , politicas pariter actiones , poli-

ticum & civilem cultum esse judicarunt ; quia tamen etiam post Inquisitionem diligentissimam mortalibus errare primum est ac labi, suam praxim non in certitudine Theologicâ, sed tantum in opinione valde probabili fundatam esse dixerunt.

Alterum illud objici potest, nimirum litteratos Sinas, recentiores atque horum posteriorum temporum, quanquam animis atheismo infectis, solere tamen interdum externas idololatrarum actiones imitari, sibi que ita persuadere quemadmodum à Patre Matthæo Riccio fuit annotatum, posse se ita ad idololatrarum mores accedere, ut à suis institutis non discedant. Deinde perspicimus facile hos litteratos nullam prorsus religionem sequi, nihilque nisi ex simulatione & hypocrisi facere. Unde fit credibile eos externam idololatriæ speciem non minus in Confucii ac progenitorum cultu servare, quàm in eo cultu quem idolis exhibent ad ea templa quæ *Miao* nuncupantur.

Respondeo tunc eos esse idololatræ, cum externo cultu idola venerantur, quia tum falsæ religionis cultum simulant atque imitantur ; Contrà vero in Confucii ac progenitorum cultu videri facere id quod ad alterutram virtutem moralem pertinet, nimirum *reverentiam* aut *pietatem filialem*. Scilicet in colendis idolis id se facere simulant quod nullatenus licet, quodque ipsorum libri ac scholæ improbant, tanquam repugnans atheismo, cujus professione gloriuntur. Contrà in *Gi* Confuciano & mortuorum quod se facere simu-

lant, si tamen simulant & non ex animo faciunt, non repugnat ipforum officio, ac tanquam rationi valdè consentaneum, in ipforum libris scholisque commendatur.

Atque hoc necesse est observari ab eo qui nolit has tres virtutes de quibus egimus, atque iis opposita vitia confundere, quemadmodum athei tres sectas contra magistri sui veterumque Doctorum sententiam confuderunt. Id facile perspectum habebit quisquis fuerit etiam mediocriter lectione Sinicorum librorum imbutus, quod cui non contigerit, is errorum non levium periculum incurret, continget enim sæpè ut etiam inter administrandum poenitentiae sacramentum idololatriam interpretetur eum actum, qui ne ad simplicem quidem hypocrisim pertinebit.

Potest objici 3°. Dæmonis fraus ac malitia, qui semper adorari voluit tanquam Deus, idque apud gentes omnes eodem prorsus modo consequi studuit: porro id consecutum esse per sacrificia: vehementer igitur esse perterritescendum ne idem sit autor cæremoniarum ipsius *Ci* nevè eæ veram idololatriam habeant velo pietatis obductam; quo faciljùs vel in errorem inducantur Sinæ vel etiam in eo detineantur.

Respondeo formidinem omnem aut suspicionem de sententiæ suæ falsitate non obstare quominùs eadem sit probabilior. Et verò quamlibet probabilis sit aliqua sententia, numquam tamen abest levis aliqua suspicio & formido partis oppositæ, nisi adsit certitudo atque evidentia. Jam in praxi quid se-

quendum esset egregiè docuit D. Paulus his verbis: *omnia probate, quod bonum est tenete*, atque inde est quod nos Missionarii sive antiqui sive recentiores hætenùs tam multa probavimus, ac tentavimus, tam multa sumus experti.

Idololatriam quidem Dæmonis fraude in hoc regnum invec̃tam gementes cernimus: verùm nulla invec̃ta fuit animalium in honorem Idolorum mãctatio. Bonzii enim qui sunt Dæmonis in idololatriâ stabiliendâ administri, suis diligenter mandant, ne ullum unquam animal mãctent, ullam vĩctimam cædant. Atque in posterum nefandum hunc errorem satis cavebunt Christiani, si fuerint diligentes in iis servandis quæ tum à sacrâ Congregatione tum à Vicario Christi præscripta sunt. Et spes est aliquando fore, ut Christianorum exemplo infideles adducti, è cultu politico ac civili defunctorum eximant illud quod Dæmonis atque ipsius ministrorum fraude sensim induc̃tum est, ac suum Ci pristinæ suæ ac primævæ formæ ac puritati reddant.

Quod si quis de Sacræ Congregationis intentione dubitet, quasi non sufficienter edocta fuerit, aut etiam falsò informata de his quæ in Sinâ geruntur, habeat sibi narrationem quam subjungo, idoneam sanè ad eum scrupulum eximendum, si modò sit bona fides & solius veritatis percipiendæ studium.

Cum primùm ad hanc (Cantoniensem) domum accessi atque etiam jam tum cùm essem Pekini, cumque eò tenderem, haberemque viæ comitem Patrem Ignatium de Aosta, qui Patrum Societatis in Sinâ Vice-Provin-

cialis fuerat, quique jam ex hac vitâ discessit ad perennem gloriam, sæpe mihi contigit ut dubitationem hanc meam dubitandique momenta in familiari colloquio proponerem, quod & rursus hic publicè feci in congressu Missionariorum ex tribus Ordinibus omnium, qui hic adfuerunt. P. Antonius de Sanctâ Mariâ hoc me sermonis argumentum posuisse lætatus est, & quanquam id grave Patribus Societatis accideret, neque sanè immeritò, fecerunt tamen & pro suâ modestiâ, ut dissimularent dolorem, & pro suâ charitate ut propositionem hanc seu libertati meâ, seu nimie simplicitati condonarent. Jam ad hanc dubitationem meam sic respondent, eum qui Romanæ curiæ rationes atque instituta noverit, suspicari non posse Sacram Congregationem responsa dedisse planè contraria responsis iis quæ prius ad quæsitâ Patris Joannis Baptistæ de Morales dederat, dedisse inquam sine ullâ investigatione & cæco prorsus modo post lecta tantummodò ea verba quæ ipsis responsis à Sacra Congregatione datis tanquàm à Patre Martinio profecta instar tituli præfiguntur.

Igitur Martinium hinc ita Romam discessisse, ut tractatus amplissimos secum haberet atque ingens volumen quo mores omnes & consuetudines Sinensium fide ac simplicitate prorsus religiosâ proponebantur, quantum innotescere potuerant longo eo usu temporis, quod Patres Societatis in hoc excolendo regno posuerant: tùm eos tractatus tradidisse tribus Qualificatoribus, ut patet ex cartâ quâdam, quæ in secretariatus archivio servatur

tur Patris Martinii manu exaratâ & consignatâ. Quin & me docuit Pater Intorcettra qui ejus tunc Romæ socius erat, cùm ad Cardinales & Consultores se conferret, ut ageret de his controversiis, quique nunc Romam hinc redit Missionis hujus procurator; ingens illud volumen de quo dixi venerabili cuidam ex nostro sancti Dominici Ordine seni fuisse traditum, ni fallor, Reverendo Patri Candido, Sacri Palatii tunc Magistro sanctæ memoriæ viro, qui illud ad tres menses detinuerit. Pater Martinus tractatus hos atque informationes amplas summâ fide in aliquod compendium redegit, quod Eminentissimis Cardinalibus exhiberetur: redegit autem idcirco quod tres Qualificatores, qui eos tractatus legerunt, sibi habebat adversantes. Re transactâ ac compositâ secretarius ex hoc P. Martinii compendio etiamnum fusiori, pauca illa quæ habemus verba selegit, unde quæ inserta sunt in sacre Congregationis responsis sunt *compendium compendii* sive ex P. Martinii compendio excerpta sunt à secretario Congregationis ipsius. Ibi habetur *Sinas superstitiosa quadam admiscere in colendis defunctis*, quâ de re consuli poterat ingens volumen illud, quo hæc omnia fusius explicabuntur. Illud verò quod secretarii fuit, non P. Martinii, *Sinas nullam defunctis divinitatem tribuere, nihil quidquam ab iis petere, nihil sperare*; Jesuitæ respondent quod & ego in conventu Lan-Kienfi respondi priusquam ullum ex Societatis Patribus vidissem, propositionem hanc indefinitam esse non universalem, veram quippe esse de vulgo

Sinensium, deque moribus gentis propriis, quanquam advertatur contrarium in aliquibus, qui eâ quidem in re à patriis ritibus ad externos deflexêre.

Similium propositionum exempla passim occurrunt in S. Scripturâ & Patribus. Ita quippe dicitur hebræos unum Deum adorasse, quod certè falsum dici non potest quanquam inter hebræos aliqui fuerint idolis colendis addicti. Ita dici potest Sinensibus, apud Europæos dæmonem non adorari, sed horrore esse, quamvis constet inter Christianos esse etiam magos & sortilegos qui dæmonem colant. Ita denique pronunciare licet Anglos hæreticos esse, Turcas Mahometanos, Japonés Idololatrias, quanquam & inter Anglos aliqui sint Catholici, & inter Turcas, Japonésque Christiani.

Nec satis video quid possit his exemplis opponi. Quanquam & Jesuitas ego monui, expedire ut eâ de re Sacra Congregatio certior fiat ad maiorem cautelam, & ne quid unquam scrupuli supersit. Itaque auditis eorum responsis de ipsorum tractatibus atque ingenti volumine Romam missis, mihi quidem cui satis perspecta est ipsorum virtus, ac divinæ gloriæ propagandæ studium, nullus restat de Sacrae Congregationis intentione dubitandi locus, neque esse jam potest iis qui bonâ fide ac bono zelo ducti illud idem dubitarent quod olim dubitavi.

Objici denique possunt quædam loca librorum authenticorum & commentariorum Sinensium, quibus probetur ipsum *Ci cultum*

esse religiosum quo aliquid à defunctis spectetur postuleturque , neque id refundi posse in aliquos ritus quos Sinenses ab idololatriis hauserint. Multos super eâ re textus collegere Antonius de Sanctâ Maria & Pater Navaretta; respondent Patres Jesuitæ suis in tractatibus atque ad eum modum respondent quo ii textus litteratis Sinensibus quos sciebant esse viros probos ac fide dignos propositi , ab iisdem explicati sunt. Sed quia dubitabit fortasse quispiam nûm ea explicatio contraria sit explicationi litteratorum aliorum , quos consuluerint ii qui hos textus adducunt , essent litterati ipsi cum litteratis conferendi , atque ad probabilitatem quam vocant extrinsecam rediretur , quod jam non agimus. Quare iis textibus omissis , notas quasdam adjicio quibus responderi facile poterit iis argumentis quæ ex suprâ dictis textibus deducuntur , aut deduci possent.

Primum. Non id volunt Patres Societatis omne *Ci* cultu merè civili ac politico contineri , nullumve esse , cui accedat aliqua postulatio. Nam & ipsi Atheos quosdam , qui hoc persuadere nituntur , confutandos sibi sumpserunt , atque ex receptis apud Sinas principiis deducunt illud *Ci* quod offertur supremo rerum omnium Domino *Xam-ti* , & Geniis ac regibus quibusdam quos ut sanctos olim Sinæ coluere , verè cultum esse religiosum ac sacrum.

2º Confucii defunctorum-ve cultum religiosum esse non inde probatur , quòd aliquis inter Sinas in progenitoribus defunctis colen-

dis eam spem habeat fore aliquando ut quidpiam consequatur boni vel à Cœlo, vel ab Idolo, vel à suo *fum-xiu*. Ita enim & Christiani sperant se consecuturos à Deo mercedem illius reverentiæ quam exhibent parentibus juxta illud effatum scripturæ *honora Patrem & matrem ut sis longævus super terram*. Atque ad hunc ferè modum Confucius dixisse fertur eum qui diligens esset in *Xam-ti* ac parentibus colendis bona omnia præ manibus seu ut loquitur, in volâ manus habere: dixit idem alibi, *ritu Ci defunctus sum: unde & bona recepi plurima*. Quod dictum, ed referri fortasse potest, quanquam ad alium sensum detorqueant Athei in libro *Li Ki*, quorum interpretationi credere necesse est, quia scilicet alii defunt interpretes. Verùm ut efficeretur defunctorum cultum religiosum esse non merè politicum, oporteret præterea ut aliquid ab ipso defuncto, cui offertur *Ci* postularetur, ut spes in eo reponeretur aliqua, ut hæc esset de illo existimatio, posse eum vel concedere bona quæ postulantur, vel ea certè suis precibus impetrare, tanquam sanctum atque ipsi *Xam-ti* gratiosum.

3°. Si contigerit in textibus aut commentariis Sinicorum librorum aliqua occurrere pugnantia quæ quidem ejusdem autoris esse constet, tùm decet, quod solet in scholis fieri obscuriorem locum ex clariori interpretari neque in obscuriori hære ac vim facere, licet is magis videatur ad zelum nostrum ac pietatem accommodatus, aut ad eum locum referre, quo suam ipse sententiam autor distinctius explicuit. Jam si de variis autoribus agi-

tur, idem ferri judicium debet ac de opinionibus duabus probabilibus, ea scilicet haberi probabilior, quæ magis est consona huic doctrinæ quam litterati sequuntur, quæque in scholis tradi vulgò solet. Ita si dubia sit mens D. Thomæ, eamque Thomistæ duo ita explicant ut alter alteri pugnet, illius explicatio præferri debet ac censi probabilior, quæ magis est accommodata ad principia scholæ Thomisticæ quam quæ minus cum ipsis coheret.

4°. Idem dici debet de responsis doctorum, à quibus obscuri alicujus textus explanatio quæritur.

5°. Si quid litteratis Sinensibus proponitur, qui verum cupit elicere, duo hæc advertat diligenter: primum, ut neutram in partem videatur animo propendere, sed ad habendam ipsis fidem omninò promptus ac paratus, quidquid illis responderint. Alterum ut palam fiat interrogandi causa & rationes utrinque proponantur, sine ulla ad partem utramlibet propensione, mora ac tempus concedatur ut maturius rem totam discutiant, expectetur etiam dum in eam unam privato studio incubuerint.

Asserunt Patres Societatis esse inter ipsorum Christianos Doctores aliquos litteraturæ Sinicæ peritissimos quorum industriam ac fidem hac in parte summopere probant. Verum sunt & alii quos vocant *Lavados* quos non facile consulunt. Duplicem hanc quam dixi cautellam postulat & natura Sinensium & agendi ratio ab iis usurpari solita. Nam si vir quispiam

inter Sinas litteratus nos ad partem alterutram propendere sentiat, periculum est ne respondeat potius id quod nobis acceptum fore sperat, quàm quod existimat verius. Deinde si cogitandi tempus non dederimus, sæpe fiet ut effutiat quidquid in buccam venerit, quidquid occurrerit primum, nullo facto discrimine inter litteratorum & Bonziorum iudicia. Quod sanè molestum non leviter accidit iis qui volunt ut usurpem verba Scripturæ, *distinguere inter lepram & lepram.*

6°. Sciendum & illud est, in libris ipsius Li-Ki multa de Bonziorum placitis aspersa fuisse. Notatum id à Patre Matthæo Riccio in libro *Xe-y* cujus hæc verba sunt: *Li-Ki yě xà tò yèu si xim iên etri y.* Atque id inter Doctores omnes Sinenses convenit clarèque habetur expressum in præfatione ad quosdam ipsius libros appositâ, ut videre est ad librum *yve-lim* & alios cujus rei causa ea est quod hoc opus vel omninò scriptum, vel certè editum & publicæ luci datum non est nisi postquam Doctores se ad Bonziorum placita atque doctrinam accommodarunt, ut Regibus idololatriis obsecundarent. Quare manifestum est adhiberi textum ejusmodi librorum nisi magnâ cautelâ non debere, discernique diligenter oportere ea quæ litteratorum sectæ propria sunt, aliis quæ ab impiâ Bonziorum *Tao-sus* sectâ desumpta sunt. Et quanquam deinde id egerint in commentariis suis, ut omnia quoad potuerunt, ad cultum civilem ac politicum referrent, seu potius inficerent atheismo, suspecti certè debent esse, quippe recentiores,

& qui non legerint antiquos illos commentarios, quos Imperatoris Ciu jussu concremarios esse constat. Quare adhibendi sunt tamdiu quandiu sibi ipsi suisque principiis constant, præcipuè cum nihil denique occurrat certius, nullus interpret antiquior habeatur.

Hinc est quod statim ab initio non dixi sententiam Patrum Societatis esse manifestam atque evidentem, quamvis solidis fundamentis innixam: sed probari pariter non potest oppositam sententiam ac praxim evidenter esse meliorem. Atque id est quod habetur in illo articulo congressûs à me suprâ citato; *Quia fundantur in valdè probabili opinione cui nulla contraria evidentia opponi potest.* Sit igitur sanè & opposita sententia probabilis. Certè Jesuitarum sententia in eo vincet, quod iis principiis innitatur quæ valdè sunt ad litteratorum Sinenfium doctrinam accommodata, quos quidem litteratos Sinæ omnes ipsique adeo Bonzii & Tab-sûs farentur Sinicorum rituum auctores primùm ac deinde perpetuò conservatores extitisse.

7°. Prætermitti non debet illud scilicet si quid mortuis defertur quod non deferatur vivis, non continuo reponi inter supersticiosâ debere. Nisi forte velimus ab omnibus gentibus & mandari terræ vivos quemadmodum mandantur mortui & funebres cæremonias omnes abjici, atque haberi supersticiosas, Prætereà ritus eos quibus mortui sepeliuntur, quia scilicet erga vivos non usurpantur, non jubet Ecclesia inter religionis actus numerari; sed inter opera quæ vocantur *misericordiæ*

corporalis ; atque in universum multa licet erga mortuos adhibere quæ erga vivos usurpari nefas est. Quæ *si per suffragii modum* aut invocandi ritu non fiant neque divinum aliquid aut sanctum defuncto tribuatur , dici non potest has cæremonias ad religionem pertinere.

Sed ut de una quâque cæremonia judicetur an ad cultum civilem pertineat, an ad religiosum , attendenda est intentio quâ adhibetur. Ex eo enim quod signa reverentiæ quædam erga mortuos usurpentur , quæ solent etiam adversus vivos usurpari , valdè probabiliter conjicitur , non tamen evidenter demonstratur cultum esse merè civilem. Pariter contrarium elici non debet ex eo quod mortuis exhibeantur quædam quæ vivis non exhibentur. De ritibus tamen Sinensibus operæ pretium est animadvertere , eos ritus qui ad Regum ac Mandarinorum etiam vivorum honorem adhibentur nobis Europæis nimios ac supervacaneos videri , sed non damnari tamen debere ut superstitiosos, quia in iis exercendis nullatenus Sinæ videntur de religione cogitare. Atqui idem prorsus debet esse iudicium de ritibus plerisque Sinensium erga mortuos , quos ita colunt ac si vivi essent. Et verò ejusdem ordinis sunt hæc quidem in re prototypum & imago ; neque debet obstare quod vana nobis esse videatur illa cogitatio , neque possimus quod illi faciunt , reverentiam hanc atque observantiam erga parentes diligentiores ac subtiliores interpretari.

8°. Addo præterea , cùm alicui tribuitur appellatio *Xing* , cultus religiosi signum certum

tum atque indubitatum non esse. Neque verò tantum eâ voce continetur sanctitas propriè dicta, qualem esse oportet eam de quâ agit sacra Congregatio in responsis ad Patrem Joannem Baptistam de Morales. Et verò *sanctitatem propriè dictam* intelligit eam quæ talis est in rigore Theologico, eam scilicet quæ supponit gratiam sanctificantem & amicos Dei ad cælum evehit, quò non pertingit virtus tantùm moralis, quanta quanta demum sit. Hujusmodi sanctitatem dicere possumus à Sinis attributam fuisse Regibus suis priscis *ven nam, chim tam* atque aliis quos etiam religioso cultu videntur fuisse venerati. Jam post Confucii mortem ejus discipuli & Doctores antiqui, diligenter illi parvum suadenti *ne res alterius vitæ vellent attingere*; quare non magnopere contenderunt ut sanctitatem ejusmodi vel ipsi tribuerent vel aliis virtute ac probitate insignibus; atque omisâ sancti appellatione id fategerunt ut illustrem ipsorum eruditionem atque ingenii præstantiam potius quàm virtutes morales prædicarent.

Quod vel ex eo satis apparet, quod licet antiqui Sinæ sanctos habuerint ac venerati sint Reges eos de quibus dixi, qui Confucii probitatem vel adæquarunt, vel etiam superarunt, primum tamen inter suos *Xing* locum Confucio concedunt, dum eum vocant *Chi-xing*; secundum, ejus discipulo *Mem-Cu* quem dicunt *Ja-xing* quem ut philosophiæ peritissimum fuisse nemo negaverit, ita facile fatentur omnes non maximâ virtutis laude floruisse, prorsusque esse indignum

qui cum antiquis illis regibus eâ quidem ex parte conferatur.

Atque hoc quoque tum perspicitur , cùm illi explicant primum hunc sanctitatis locum , quem Confucio tribuunt ; & secundum , quem Mencio. Sanctitatem quippe in eo volunt esse repositam , quod uterque doctrinam ipsis reliquerit ad annos seu generationes decies mille propagandam. Athei ac Doctores consecuti etiam audaciores hac in re fuerunt. Primum enim illud *Xing* sive sanctorum , ut placeat interpretari , genus , ex albo suo exemerunt : Antiquorum scriptorum textus ad sensus metaphoricos & tralatitios detorquent. Vocem ipsam *Xing* in commentario libri *Xu-xing* cap. 10 *fam* ad hunc textum , *Guel xim vâ ven* hoc glossemate explicant : *Xing-tum mim chi chim* , hoc est , vox illa *xing* appellatio est honorifica , quâ donatur qui novit ac percepit omnia.

Huic glossemati adhærent interpretes tum ad hunc locum tum ad alios similes : & autores libri *Sim li* expressiùs etiam notavere perfectionem illam quam vox *Xing* significat , positam esse in eâ ingenii sagacitate quâ omnia facile quasi naturâ duce & sine ullo studiû labore percipiuntur.

Quibus positis non dissentient Patres Societatis adhiberi vocem hanc posse ad veram sanctitatem connotandam : quippe nullam aliam in linguâ Sinicâ vocem occurrere , quæ sit ad illud significandum aptior. Neque eâ voce virtutem aliquam moralem significari negant , negant verò non patere

latius & ad nulla alia posse pertinere vocis hujus significatum. Hoc aiunt denique Sinas litteratos cùm suum Confucium vocant *Chi-Xing*, non id velle Confucium virtute eâ quæ in morum probitate sita est, vel Sinis omnibus vel etiam cæteris mortalibus antecelluisse, sed tantùm se ob doctrinam ab ipso traditam longè plus ipsi debere quàm cæteris Philosophis vel Sinensibus vel aliis; idque totum eò referri, ut eum magistrum agnoscant ac venerentur. Hoc Patres Societatis *Jesu* probant his argumentis quæ jam adduxi, atque aliis plurimis, quæ communi litteratorum hujus temporis testimonio comprobantur.

Suberit fortasse cuipiam scrupulus de cæremoniis ipsius *Ci* quasi qui eas frequentet, videatur hoc profiteri credere se, spiritus cibis appositis vesci posse. Qui scrupulus eximetur facile, si meminerimus quæ sit natura signi illius quod vocatur *ab instituto*, nempe ut nihil significet nisi id ad quod significandum ab instituente determinatum est. Unde si quis alio sensu & significatu usurpet, proprius ipsius erit error, neque ad alios ullatenùs pertinet. Itaque quamdiù constabit ipsum *Ci* non eo fine fuisse institutum ut significaret spiritus vesci dapibus appositis posse, non profitebitur hanc insaniam, qui eo ritu perfunderetur. Atqui litteratos à quibus ritus iste profectus est, & ad quos illius conservandi cura pertinet, numquam eum errorem in animo habuisse, conficitur evidenter tùm de litteratis horum temporum, siquidem hi professione atheismi gloriantur, tùm de anti-

quioribus ; quia longè abhorret ab his nugis ; doctrina ab iis tum alibi tradita , tum in libro præcipuè quem appellant *Li-Ki* quod qui perspicere voler, legat modò quid habeatur in iis libris de origine cæremoniæ quam vocant *Lium-Ti* quod verbum magis est ipso usu tritum , quippe correlatum verbi *Ci* ; ut omittam multos alios textus libri *Li-Ki* quibus probatur spiritus non vefci dapibus appositis , idque ab eorum naturâ quam longiffimè abefse.

Sed quorſum hæc omnia ? Nimirum ut id efficiam , ab eo *Ci* , cùm nihil contineat ſuperſtitioſum aut contrà fidem , facillimè ſeparari poſſe eas ſuperſtitiones , quas idololatrarum vel malitia vel inſcitia invexit , atque iis ſublatis , quemadmodum Sacra Congregatio jubet , nihil ſuperfuturum quod vel periculi quidpiam habeat vel ſcandali , ſed merum actum obedientiæ ſive obſervantiæ , more atque inſtituto gentis probatum , nullatenus Eccleſiæ Catholiciæ præceptis adverſantem , quæ ſcilicet ſe benignè accommodat quâ licet, ad omnium gentium mores , ut omnes *lucri faciat Chriſto*.

Et quoniam ſcandali facta eſt mentio , velim hîc annotari diligenter idcirco nobis Europæis ritum *Ci materialiter ſumptum* , ut ſcholæ verbis utar , idololatricum videri , quia ſcilicet aliis gentibus ſuperſtitioſorum atque impurorum ſacrorum materiam & ſubminiſtravit olim, & etiam nunc ſubminiſtrat. Apud Sinaſ verò , qui dùm *Ci* ſuum offerunt, nihil aliud volunt , nihil cogitant niſi ut ex more patrio ſuis progenitoribus honorem exhibeant , qui

ne fando audivère quidem de illis idololatrarum sacrificiis, quod tandem cuiquam scandalum oriri potest? quæ potest in eo ritu fingi species mali, præcipuè si quod jubet Sacra Congregatio, superstitiosa tollantur, quæ sensim irrepsère? atque hinc factum arbitror, ut dum eadem Congregatio notavit ea quæ tolerari poterant, omiserit hanc exceptionem *modo nullum sit scandalum*.

Viderunt quippe Romani Qualificatores in iis omnibus quæ Neophytis Sinensibus permittebant, scandali nullam ansam esse posse. Quare hoc totum pro suâ prudentiâ tacuerunt. Illud est quod vehementer velim adverti, ne Christiani jubeantur, ubi nihil necesse est, (neque verò video cur necesse sit) fidem expressè profiteri, quod non tam faciliè adducuntur ut faciant.

SECUNDA PROPOSITIO.

Quod spectat ad probabilitatem extrinsecam, dico sententiam Patrum Societatis JESU esse probabiliorē oppositâ. Id jam probavi iis scriptis quæ paraveram ad congressum nostrum Lan Kiensem antè etiam quàm Jesuitas vidissem; quod feceram nullâ aliâ re inductus quàm charitate, quæ profectò non finit in re tam gravi temerè damnari viros qui jamdudum in Ecclesiâ florent summâ pietatis ac doctrinæ laude. Jam verò lectis iis libris & doctis & piis quos eâ de re Soc. JESU Patres ediderunt, ipsisque Societatis Patribus cognitis, muneris mei atque æquitatis esse credidi hoc ipsorum

virtuti & laboribus in hac Missione toleratis tribuere, ut deffenderem, quod jam deffendum aggredior. Sed quia *comparatio*, quod aiunt, *omnis odiosa est*, profiteor non idèd me Jesuitarum sententiam amplecti, quod existimem alterum alteri ordinem præstare, aut Missionarios unius majori vel scientiâ vel authoritate valere oportere quàm alterius. Sic enim mihi persuasi cùm quis ad Missiones à Præpositis suis destinatur, non temerè, sed post multas longasque probationes destinari. Præterea perspecta mihi satis est tum fratrum meorum ex Ordine sancti Dominici, tum Patris Antonij de S. Mariâ Franciscani doctrina, cum zelo & virtute conjuncta: de Patribus verò Societatis J E S U qui hic adsunt, quàm honorificè sentirem, testimonium etiam interposito juramento dedi. Nam de iis qui ex hac vitâ discesserunt, testantur eorum scripta, id quod à Patre Brancato mihi dictum olim fuit, sententiam hanc amplexos esse sexaginta & ampliùs Societatis J E S U Sacerdotes, quorum aliqui publicè Theologiam in Academiis Europæis docuerant. Ut verò majorem probabilitatem eorum sententiæ tribuam his potissimum argumentis adducor.

Primò. Cum Societatis J E S U Patres in Imperium Sinense longè antè sint ingressi, quàm duorum aliorum Ordinum religiosi, credibile est eos plus valere usu atque experienciâ, meliùsque Sinensium mores atque instituta percepisse.

2º. Cum Societas in longè pluribus imperii partibus versetur, quam alii ex utroque Or-

dine Missionarii , facilius potuit existimare quid toti Imperio commune , quid singulis Provinciis proprium ac peculiare sit ; quid intrinsecum ipsius *Ci* ritibus , quid extrinsecum & aliundè accersitum.

3°. Longè plures Christianos erudiendos habuit : potuit igitur facilius quid verum esset à pluribus quærere & veriores proinde & tutiores informationes assequi.

4°. Patres Societatis longè majori semper fuere numero , quàm alii ex duobus Ordinibus etiam simul sumpti : cum igitur & *plus videant oculi quàm oculus* , & tutius sit aurium duarum quàm unius judicium , negari Societatis Patribus non potest majoris experientiæ laus, quæ est in oculorum auriumque testimonio posita.

5°. Cum denique inter suos Christianos habuerint aliquos Colaos aut Doctores litteraturæ famâ præstantes , qui Mandarinii fuerint , eorum ope Sinicam politiam , quam scilicet illi administrabant , totam pernoscere diligentius potuere , quam alii ex duobus Ordinibus Missionarii , quibus nunquam oblata ea facultas est. Ac Missionarios quidem inter se comparari utrorum plus valere debeat auctoritas minimè oportere dixi , Doctores verò Sinicos alios cum aliis ex eâ parte conferri nihil vetat , cùm à se invicem dissentiant.

Atque hæc , ni fallor , argumenta quinque sunt ejusmodi , ut eorum vel unum satis sit ad probabilitatem majorem , cæteris paribus , Jesuitarum sententiæ tribuendam. Quam vim si habent singula , quantò majorem collecta ha-

bitura esse censebimus? Cum præsertim nulla sit alia ratio inquirendæ qualitatis moralis Cæremoniarum harum Sinensium & de iis judicandi, quàm si à Sinensibus Doctoribus ac litteratis cognoverimus quâ intentione eas adhibeant, & qua ratione debeant intelligi quæ ipsorum majores libris mandavere.

Quærendum hoc unum restat, nùm Societatis JESU Patres eam in inquirendo diligentiam adhibuerint quam summam adhibere debuerunt, nùm qui postremi venêre in tantâ inquirendi facilitate, decessores suos nimis facile secuti sint, eorumque autoritati & exemplo plus tribuerint, quàm tribui veritas ac ratio pateretur; num ipsi illi decessores nullo adhuc usu rerum edocti aut per se lapsi sint aut ab aliquibus litteratis pseudo-Christianis in errorem inducti.

Quanquam illud est ejusmodi, ut hære in cujusquam animo non possit sine gravi injuriâ in Patres Societatis, quorum tantum est & tam illustre Divinæ gloriæ procurandæ studium, tamen ut hunc scrupulum eximeret, Pater Dominicus Gabiani procurator vice-Provinciæ Sinensis, atque hujus Cantonienfis domus minister, tractatum edidit de his controversiis, in quo veluti annumeravit Inquisitiones omnes tam intrâ quàm extra regnum Sinense factas, ab hujus Vice-Provinciæ Præpositis, atque à Missionariis universis, qui etiam exquisitâ sententiâ Doctorum ex Academicis Indicis, ex Macaensi, ex Lusitana ac Romanâ, comperere Doctores omnes in eo consentire, ut sententiam ac praxim Jesuitarum

tarum ab omni periculo remotam esse pronuntiarent.

Habet hæc enumeratio consultationes admodum quatuor & septuaginta , præter illas quæ factæ sunt à singulis Missionariis ; quo in genere filere non possum ipsum Patrem Brancatum eâ de re Panormum , quæ urbs mihi natalis est , scripsisse ad Patrem Franciscum Bardum , cujus unius sententiæ tanti ponderis apud omnes concives meos foret , ut opinionem suâ unius autoritate faceret probabilem. Is quippe & plures annos Theologiam docuerat in Academiâ Panormitanâ , & singularem laudem fuerat & famam consecutus tum apud omnes , tum præcipuè apud Dominicanos nostros præcipuo Doctrinæ D. Thomæ propugnandæ studio ; præterquàm quod & ejus gloria longe ultrâ Panormum transvolavit egregiis editis de Theologiâ Morali libris. Ille igitur ad Patrem Brancatum hunc in modum respondit anno 1637. *Legi iterùm atque iterùm quesita à vestrà Reverentiâ mihi proposita , quæ etiam communicavi cum Doctis Patribus , meaque sententiæ & illorum est, nullum esse scrupulum in honorando Confucio illis obsequiis & ceremoniis , cùm sit genus politica observantia. Et idem dicendum de ceremoniis Parentibus exhibitis , quamvis vana mihi videatur illa oblatio ciborum , sed nullo superstitionis vitio notanda. Hæc ille.*

Satis mihi quidem hætenus confirmasse videor quod secundum proposui. Verum id jam restat ut solvam illud quod solet objici, nimirum aliter sensisse quosdam atque etiam multos è Societate Jesu. Id adedò manifestum esse in

iis catechismis linguâ Sinicâ editis, in quibus sacrum missæ sacrificium & legis Mosaicæ sacrificia reddunt per vocabulum *Ci* atque ex lexicis quæ antiqui Missionis hujus cultores edidere, in quibus *Ci* prorsus idem esse volunt ac sacrificium; Et in explicando *Ci* Confuciano & defunctorum, sacrificii vocem adhibere. Unde fieri videtur etiam Patrum Societatis judicio *Ci* idem esse ac sacrificium verum ac legitimum.

Ad hæc Jesuitæ sic respondent mirum videri non debere quod inter populos recens ad fidem Christianam adductos quorum lingua voces nullas habet quibus religionis nostræ mysteria distinctè & specialiter explicentur, ea usurpentur verba quæ plus affinitatis habere videantur; sic enim planè sanctos Patres voces eas usurpavisse *Deus*, *spiritus* &c. præterea vocem *Ci* verum sacrificium significare cum refertur ad *Xam-ti* vel ad Idola, & foret veri sacrificii loco, si Deo exhiberetur, ex legis Mosaicæ ritu. Itaque vocem illam *Ci* per se ambiguum esse & indefinitam, quæ si referatur ad Deum, *latriam* denotare; *duliam* si ad inferioris Ordinis spiritus; cultum vero planè civilem, si ad progenitores mortuos. Idem omninò dici posse de latino verbo *adorare*, quod ubi de Deo agitur, *latriam* significat, *duliam* ubi de Sanctis, reverentiam verò atque observantiam dumtaxat si de Rege aliquo aut viro principe: hanc communem esse sanctorum Patrum doctrinam: Unde si contigit ut qui linguâ Sinicâ verum sacrificium quo Deus colitur seu Missam appellare voluit, ver-

bum *Ci* adhiberet , non continuò sequi omne *Ci* esse verum ac propriè dictum sacrificium , neque hanc fuisse mentem auctoris.

Ad alterum quod objicitur jam respondi scriptores Europæos , Jesuitas nimirum , neque enim alii apud Sinas Europæi scripsere , idèò verbum *Ci* per *sacrificium* reddidisse , quia & nullam habebant Europææ linguæ vocem , quæ esset propria , & quia *Ci* Sinicum accedere videtur ad illud quod Europæi sacrificium vocant. Neque verò necesse fuit id in lexicis annotari , cum ea digesta sint in usum Missionariorum Sinensium , quos omnes & Theologos oportet esse & eruditos. Atque ut demus aliquando contigisse ut aliqui Societatis *Jesui* Patres recens in hoc Imperium adducti , dubitaverint num tolerari hæ cæremoniæ possent , aut etiam eas nondum scilicet plane cognitæ ac perspectas improbaverint , certè negari non potest eos ipsos postea Societatis usum ac praxim esse secutos ; quare non tam quod olim dubitaverint , Societatis causæ nocet , quàm quod postea ad aliorum è Societate sententiam accesserint , evidenter probat id quod asserui , Societatis sententiam , si autoritas spectetur , esse longè probabiliorem.

Hæc sunt quæ ut scriberem impulit me fratrum meorum ex Ordine sancti Dominici bonum atque utilitas ; eos etiam atque etiam oro & obtestor , si Deum amant , si me ipsum aliquâ benevolentia & charitate complectuntur , ut & rationes has perpendant , & cogitent quàm necesse sit unam atque eandem

ab omnibus Missionariis iniri agendi ratio-
nem, & illud comprobent quod est actum,
& ea faciant rata, libenterque suscipiant, quæ
ipforum nomine Pater Navarretta cum Vice-
Provinciali Societatis Jesu pactus est, ut sci-
licet omnes Simus in unum & Dominus sit
cum omnibus nobis, quoniam ipse dixit *ubi
sunt Congregati duo, vel tres in nomine meo, in
medio illorum sum.* Atque ipsius præsidio &
Societate freti possimus resistere adversariis
dæmonibus, qui quanquam inter se pugnent,
in eo tamen consentiunt ut nobis bellum in-
ferant. Atque hæc quæ dixi omnia, Ecclesiæ
Catholicæ ac Præpositorum meorum judicio
& censuræ submissa sunt. In urbe *Quam-tum*
seu Cantonensi pridie cal. Octobris anno 1670.

*F. Dominicus Maria de Sancto
Petro ex Ordine fratrum Præ-
dicatorum.*

Testor hoc exemplum Hispanicum tran-
sumptum esse ex altero quod descriptum fuit
ex meo autographo. Actum in hac domo Can-
toniensi, pridie Cal. Octobris anno 1670.

*Frater Dominicus Maria de Sancto
Petro, qui supra.*



R. P. DOMINICI

NAVARETTÆ

DOMINICANI EPISTOLA

*Ad Reverendum Patrem Joannem Paulum
Oliva Prapositum Generalem SOCIETATIS JESU.*

REVERENDISSIME PATER.

DE communi sanctæ matris Ecclesiæ
fecunditatis gloria maxime congratu-
landum tibi, & pro filiorum tuorum
erga me, & Ordinis mei alumnos exhibitis
beneficiis, gratias agere operæ pretium duxi,
Reverendissime Pater, si quidem in filiorum
virtute, & sapientia, haud parvam patris
gloriam fulgere, & pia charitatis officia eo-
rum in nos, ex uno Paternitatis tuæ erga
Deum, & proximum amore, tanquam è co-
pioso fonte emanare nulli dubium est. Gratu-
lorque Reverendissime Pater quod venerabiles
filii tui, in hoc amplissimo Sinarum Regno verè
sunt, *tanquam lignum plantatum secus decursus aqua-
rum*, lignum sanè viride frondentibus vestitum
foliis, sub cujus umbra pro Deo lucratæ innu-
merabiles Ethnicorum animæ requiescunt;
lignum etiam ornatum floribus boni odoris
famæ, & conversationis, ac plenum fructi-

bus laborum, vigiliarum, assiduæ orationis, mortificationis, & prædicationis, & quidem quilibet eorum nominari potest arbor alta nimis, cujus rami alti, per contemplationem pertingunt Cælos, extensi, nunc per vivæ vocis animatam, nunc per ingenti librorum numero typis traditam divinæ legis prædicationem, totum hunc Sinicum orbem (de illo enim in præsentī dumtaxat loquor) replent, occupant. Ita ut meritò dici possit, in omnem istius novi orbis terram resonare voces eorum. Arbores istæ permagnæ secus decursum aquarum plantatæ frondescunt; quando quidem aqua (etiam in sensu horum infidelium) symbolum est sapientiæ, vel quia sicut aqua est clara & munda, ita sapientiæ nitor hominem reddit clarum, & mundum, juxta illud, *per sapientiam sanati sunt, quicunque placuerunt tibi Domine*, vel quia ut aqua de fursū veniens, terram rigat, fœcunditatem generat, sterilitatem tollit ac demum ardore solis rursū elevatur ad nubes, ita sapientia à Patre luminum descendens, fovet, rigatque mentes hominum, gignit, fœcundatque in Ecclesia virides plantas dantes in tempore suo uberrimos doctrinæ fructus, vincentes omnis saporis suavitatem; filii tui clari & mundi, clari ratione doctrinæ, mundi ratione vitæ, pleni superabundanter sapientiâ, & claritate; quidquid faciunt sapienter faciunt, prudenter disponunt, ac melle conficiunt charitatis: filii tui verè rigarunt aridum hujus magnæ Regionis desertum, semenque verbi Dei, ab eis satum, dedit fructum super millesimum,

non utique pinguedine terræ , sed solùm cura feminantis , & rigantis , ac Domini incrementum dantis : terra hæc , terra sterilis , & inaquosa , terra petrosa , & falsuginis , solum ex se proferens infidelitatis tribulos , ac insciitiæ spinas , at ubi filiorum tuorum super inundans advenit sapientiæ flumen , quot fructus germinavit numerare quis poterit ? Stellæ Cœli arenasque maris , si quis enumeraverit is animarum per filios tuos Ecclesiæ genitarum , utique numerum perscribet , non alius. Fluvius iste sapientiæ de sursum venit , ac iterum sursum ascendit , quia filii tui continuè , & instanter se moventes de contemplatione ad opus , & de opere ad contemplationem ascendentes , & descendentes , motum ut ita dicam conficiunt circularem , at motus iste mirabilis , proceras Filiorum tuorum arbores , non quatit , vel cædit , imò magis ac magis ipsas radicat & firmat , utpote sapientia illorum à Christo petra angulari , & fonte aquæ vivæ perennem ducit originem. Sunt itaque filii tui plantati secus decursus aquarum radicati , firmati , fundati in Domino Jesu , qui est sapientia Patris , radicati in ejus amore , firmati in ejus fide , & præceptis , fundati in ejus Societate , non minus re quàm nomine , quid mirum , si opera illorum non defluunt ? Quomodo omnia quæcumque faciunt non semper prosperabuntur ? Mundus , Caro , Dæmonia , etsi coacervatim præsentem , vel millies alias excitaverint persecutiones (haud temerè dicam) non prævalebunt adversus eos , nam virga , & baculus Christi consola-

tur suos, & percutit inimicos ipsorum, Filii quæ
tui etsi persecutionem perpeffi, magis in hoc
experunt congaudendum, quàm condolen-
dum, quoniam digni habiti sunt pro nomine
Jesu contumeliam pati. Gaude igitur Reve-
rendissime Pater, gaudeat, & ter, quaterque
beata Societas tua, & de alumnorum tuorum
contumeliis, ut de perceptis triumphis glo-
rietur, gratias agens Deo, qui tales tibi filios de-
dit, quique dignatus est ipsos pro dulcissimo
filii sui nomine propagando rapinam bonorum
suorum, carceres, ac contumelias ad mortis
usque sententiam cum gaudio sustinere. Quæ
autem, & quanta in ista persecutione sint
perpeffi, ipsimet in annuis Societatis Epistolis,
te certiorum reddunt. Me gratitudinis stimu-
lus de ipsorum erga nos studio, aliqua signi-
ficare compellit; & quidem non sine con-
scientiæ scrupulo; nam brevis epistola maximi
eorum erga nos amoris, benevolentiae, chari-
tatisque, non satis est, ut nec tantillum exa-
rari queat. Certè verba deficiunt, obmutescit
sermo, papyrus non capit singula eorum
circa nostrates exhibita beneficia propalare.
Solum referam quæ persecutionis tempore
oculis vidi, & manibus contractavi, & de his
quidem, haud satis; experimento certè pro-
bavimus, officiosos filios tuos nos ubique do-
morum prætereuntes excipere majori studio,
ac ipsosmet Societatis alumnos. Hic Pekini
degentes alunt, & foveant ut piissimi Patres;
adjuvant & favent ut charissimi Fratres;
amant & diligunt, ut fidelissimi amici; com-
patiuntur nobis plusquam Socii dilectissimi;
continè

continuè versatur inter ipsos p̃iissimā contentio & æmulatio ad exequenda circa nos officia pietatis. Non certè pingo, sed formo locum Elenæ : fateri beneficia possumus, effectus gratitudinis deest, adest, & semper aderit humilis subjectionis affectus. Certiorem facio tanti debiti Nostri Reverendissimum Patrem, ut vel ipse pro filiis suis satisfaciat. Te autem humiliter precor ut pro me, meisque sociis memor sis in tuis sacrificiis. Deus optimus maximus conservet, augeat annos vitæ tuæ, ac societatem amplificet ad maiorem Dei gloriam in curia Sinica, 4. Septembris 1665.

*Humillis Vestra Reverendissimæ
Paternitatis Fr. Dominicus
de Navarette.*

DOCUMENTUM TRADITUM

Reverendô Patri Antonio de Govea Societatis JESU Vice-Provinciali Sinensi à Reverendo Patre Dominico Navarette Præposito Dominicanorum qui propter fidem in carcerem missi sunt Cantoni anno 1669. Latinum factum ex Hispanico.

Reverende Pater , Ea de quibus hodie cum Paternitate vestra egi , non dubito quin ultro ad Reverendum Patrem visitatorem deferat. Quare faciendum mihi esse duxi , ut illa eadem scriberem , nimirum in iis quæ ad mortuorum tabellas , cæremoniasque funebres pertinent , nos omnino ac nullâ re prorsus immutatâ adhæsuros , iis quæ à Patribus Societatis vestræ statuta olim fuere , in eo congressu quem habuerunt in urbe *Ham-theou* mense Aprili anni 1642. de Confucio verò permissuros ea quæ vestri permittunt , sublatis nimirum solemnibus duabus , quæ Patribus Societatis non probantur. Atque ut appareat nos spiritu charitatis duci , atque in eâdem esse sententiâ videtur operæ pretium ea referre singula , de quibus jam convenit inter nos.

De nominibus Sinicis *Xam-ti* & de spiritibus , quoniam delata res est ad R. P. Generalem vestrum , atque , ut arbitror , etiam ad Sacram Congregationem de propaganda fide ,

expectabimus responsum , atque interea sequemur illud, quod apud vos est constitutum; si vobis visum fuerit aliquod immutare , & nos pariter idem immutabimus , vel omittemus de eo loqui , vel ita certe loquemur , ut nulla ex nostro sermone perturbatio consequatur. Jam si qua in posterum nova difficultas oriatur , nihil ante statuetur quam ad eum delata fuerit , qui Vice-Provincialis munus in Sinis obtinebit , atque ita fiet , ut æquâ utrinque gratiâ , res omnes & prout viros religiosos decet , componantur. Paternitatem vestram Deus optimus servet diu incolumen , in uberes hujus Missionis fructus. Actum die 29. Septembris an. 1669. Paternitatis vestræ servus humillimus.

Dominicus Nayarette.

EXEMPLUM EORUM, QUÆ
statuta sunt inter Patres SOCIETATIS
JESU in urbe ham-teheou primaria
Provincia Che-kiam Aprili mense anno
 1642.

QUæsitum est de iis quæ ad mortuos spectant; de eo quod *Tiao* vulgò dicitur; de solemnibus apud Sinenses verbis ac ritibus, officiosisque salutationibus post amicorum mortem usurpari solitis. Patres censuerunt nostri omnium muneris esse Catechumenis clarè ac dilucidè res quasdam exponere, quas abusus & superstitiones esse manifestè constat, verbi gratiâ. 1°. Idolis offerre vota & preces. 2°. Ante mortuorum feretrum sortiri. 3°. Eorum auxilium implorare, vel sibi vel liberis ac nepotibus suis, aut eam de mortuis opinionem suscipere, posse eos nobis opitulari. 4°. Credere mortuorum animas interesse tabellis iis, quibus eorum inscripta sunt nomina, non Paradiso vel inferis. 5°. Cibus iis offerre quibus ipsorum animæ vesci, aut ciborum odorumve nidore pasci credantur. 6°. Monetam ex aurata papyro, atque alia ejusmodi incendere, sic quasi prodesse ea possint iis, qui ex hac vita excessêre.

Et quoniam his omnibus errores manifesti continentur, quos ex animis hominum evellere nostri officii est, sedulò curabimus ut intelligant per nos nihil ipsis aliud licere,

quam ! ut salutationes & cæremonias adhibeant merè politicas ac civiles , quæ idèò sunt institutæ ut debita parentibus observantia eodem ritu etiam mortuis exhibeatur , quo exhiberetur viventibus , ut Sinarum libri testantur , *Sii sù jù vam sù cien*. Quantum ad eas salutationes spectat , quæ testandi doloris causâ post amicorum mortem adhibentur , Patres censuerunt eas posse tolerari , quales nunc usurpantur , suntque hætenùs toleratæ. Fuere , qui dicerent eas tolerari scilicet tandiu debere quandiu fieri non posset aliter , & si quæ esset dubitatio enitendum esse , ut quoad liceret Sinenses ad mores Europæorum , atque instituta traducerentur.

Jam cæremoniam illam quæ *Ciao* dicitur⁴ est quæ in eo posita ut verbis consolatoriis addantur odores & cerei , & tam mortuus quàm ejusdem propinqui more patrio , capite scilicet ad tertam demisso salutentur , communis Patrum sensus fuit nihil in ea esse quod debeat Christianis interdici , pristinamque ejus tolerandæ consuetudinem posse retineri neque tamen defuere qui censerent cautè id à nobis potissimum usurpandum esse , viderique longè satius , cum præsertim à Christianis fuerimus invitati , eorum domos accedere atque ibi precibus ad Deum orationibusque recitatis demortui propinquos solari verbis , doloremque testari nostrum ; tum si pauperes atque egeni sunt , aliquid ipsis eleemosynæ loco largiri , vel pastillos cereosve vulgares , quos ante imaginem aliquam piam incendant ad exorandam in mortuos clementiam Dei.

Utile imprimis erit inter eos qui deinceps ad fidem Christianam accedent, eam induci consuetudinem, quæ jam in multis Ecclesiis obtinet, ut scilicet Christiani doceantur, ubi quis è propinquis, parentibusve decesserit, vel imaginem aliquam piam, vel certè crucem, aut sanctum Domini nostri Jesu Christi nomen imponere illi mensæ, super quam odores incenduntur, & ante quam solent Sinæ corpora, honoris causâ, ad terram demittere.

Quæsitum est præterea num expediret aliquas vulgaris catechismi partes exponere paulò fusiùs, ac visum est illud præstari debere ad ea verba *Tien-chù Kiao yao*, quemadmodum animadversum est ab iis patribus qui in borealibus hujus Imperii partibus versantur. 2°. Ad ea verba, *descendit ad inferos*, plura & explicatiora de Paradisi gloria dicenda. 3°. Addenda præterea de novem illis modis quibus alienorum peccatorum particeps esse quis potest, & de duodecim qui dicuntur Spiritus sancti fructibus, quæ habentur in catechismis Europæis, qui ad nos linguâ Lusitanicâ scripti deferuntur.

Placuit præterea unam ab omnibus atque eandem iniri rationem in numerandis septem ætatibus mûndi, eam scilicet quæ est Romani martyrologii, juxtà declarationem & approbationem Theologorum Romanorum ad nos missam anno 1640. Tum quia talis est usus Ecclesiæ; tum quia calculus ille magis ad Sinicorum annalium calculum accedit: Quare libros jam editos emendari quantum opus fuerit, atque ad hoc decretum accommodari,

ne si parùm in tantâ re concordēs nos esse Sinae videant, occasionem inde sumant accusandæ fidei Christianæ. Porro annorum mundi ratio hæc habetur in Romano martyrologio ad 25. Decembris, qui dies est Jesu Christi Domini nostri natalis.

Anno à creatione mundi 5199. a diluvio 2957. ab ortu Abrahami 2015. à Moyſis temporibus & Israëliitarum exitu de Ægypto 1510. à Davidis regis unctione & inauguratione 1032.

Atque hæc extant in ipſo textu authentico, Lusitanicâ linguâ scripto in cujus rei fidem subscripsi in hac Cantonenſi domo die prima Octobris anni 1669.

Er. Dominicus Nayarette.

*RESPONSUM REVERENDI
Patris Antonii de Govea SOCIETATIS
JESU Vice-Provincialis Sinensis ad su-
periora scripta duo Reverendi Patris
Navarette Prapofiti Superioris Domi-
nicanorum.*

Reverende Pater, Tradidit mihi paternitas vestra cartam quamdam ipso Archangeli Michaëlis festo die, quem sibi faustum ac felicem Missionarii Sinenses gratulari debent, atque aptum ad pacem inter ipsos concordiamque certo stabiliendam. De nobis quidem hoc possum Paternitati Vestrae polliceri, gratissimum nobis & jucundissimum atque optatissimum accidisse quod tam religiosè ac piè decrevit de ea ratione sequendâ, quam Societatis Jesu Patres jam ab annis octoginta sequuntur in Sinensibus ad Christianam fidem adducendis. Ita nimirum dum separatur pretiosum à vili, cultusque legitimus ac soli Deo debitus à superstitione & idolatriâ discernitur, apertus est gentilibus omnibus aditus in Ecclesiam; quod fieri profectò non potest nisi in cæremoniis Sinensibus atque institutis, id quod merè civile est ac politicum ab omni superstitione seponatur. Hæc omnia Paternitas vestra suâ illâ nunquam satis laudandâ declaratione complectitur; continentur enim omnia ferè, vel ea certè quæ sunt necessaria, maximè, honoribus iis qui Confucio

&c

mortuis exhibentur ; de cæteris nihil est quod singulatim agamus , quandoquidem nulla est de iis inter Ordinem vestrum Societatemque nostram controversia.

De eo congressu quem inter Societatis nostræ Patres in urbe *Ham-tcheou* mense Aprili an. 1642. habitum esse Paternitas vestra testatur , nemo est nostrum qui aliquid inaudierit , Pater Ferrari qui in illa urbe degebat illo eodem anno atque etiam mense , nullum ejusmodi congressum fuisse confirmat. Sed fieri facile potuit , ut Patre Ferrario digresso , reliqui Patres quatuor de iis rebus agerent inter se veluti familiari colloquio , non celebri solemnique congressu. Unde nimirum contigit ut neque per vice-Provinciam jam tum ab eo tempore Pater Vice-Provincialis , quidquam eo de congressu promulgaverit , neque illius Archetypum in Archivio Provinciæ servatum sit , neque de illo denique quicquam ad nos famâ atque auditione pervenerit.

Cæterum quandoquidem congressum illum Paternitas vestra laudat oportet eum saltem inter privatos fuisse celebratum ; & quoniam quæ in eo statuta sunt iis se adhæsuram profiteretur , pergratum illud nobis & perjucundum accidit , nihil enim in isto instrumento continetur , quod non tum à nobis tum ab antiquis è Soc. nostra Missionariis fuerit factitatum. Quippe ea permisimus quæ civilia & politica esse visa sunt , superstitiosa verò rejecimus , sive in salutationibus officiosis post amicorum mortem ; sive in iis tabellis , quibus mortuorum inscripta sunt nomina , sive deni-

que in honoribus exhiberi Confucio solitis.

Hoc nimirum fuit controversiæ totius caput, hæc dissentiendi occasio : nam cætera quæ in ea deliberatione acta sunt, vocari jam non possunt in controuersiam. (*Sequuntur quæ pertinent ad calculum annorum à creatione mundi.*)

De verbo *Xam-ti* quæsitum olim fuit liceretne illud adhibere ad verum unumque Deum appellandum. Erant sanè argumenta utrinque probabilia satis, & qui nomen istud adhiberi debere censebant, Alphonfus Vagnoni, Julius Aleni, Didacus Pantoja, Rodericus Figuero, eam erant inter Missionarios Sinenses eruditionem adepti, liceat hoc bonæ reliquorum veniâ dicere, ut nemini cederent. Nihilominus P. Andreas Palmeiro visitator, vetuit primùm in virtute sanctæ obedientiæ, deinde statuit antiquato præcepto, sublatâque severitate legis, vetuit tamen ne quis è nostris, vocem illam *Xam-ti*, sive in libris scribendis, sive in orationibus, exhortationibusque habendis ad populum, adhiberet. Adque id hætenus cautum est diligenter. Verùm quia R. Pater Antonius à Sancta Maria negotium nobis voluit super eâ voce facessere, & revocato Patris Longobardi, quod suppresseramus, Patris Matthæi Riccii atque aliorum è Societate nostra Missionariorum libros eo nomine reprehendit, quòd eam vocem *Xam-ti*, pro Dei nomine usurpari posse deffenderent, quidam è nostris sibi faciendum esse censuerunt, ut librorum Sinensium adducto testimonio, verum Deum eâ voce appellari posse comprobarent.

Quod spectat ad solemniiores cæremonias

adhiberi solitas in aula quæ Confucii dicitur , ut vel levissimum superstitionis periculum speciemque fugiamus , servavimus ea quæ servata à Patribus nostris accepimus , ut earum usu prorsus interdiceremus Christianis , veta-remusque etiam ne iis interessent.

Denique quod ex congressu habito in urbe *ham-ctheou* , Paternitas vestra refert de quibusdam catechismi verbis paulò fusiùs explicandis apud Cathecumenos , paremus iis , quæ Sacra Congregatio respondit ad dubium decimum tertium P. Joannis Baptistæ de Morales , in hæc verba.

Tertiodecimo quæritur utrum Catechumenis paratis jam ab baptismum suscipiendum debeamus ministri declarare & apertè & in singulari docere esse illicita sacrificia , & omnia supradicta , quamvis ex hoc sequantur inconvenientia , scilicet desistere à susceptione Baptismi , persecutiones , mors , vel exilium Ministrorum Evangelicorum ?

Censuerunt Ministros Evangelicos teneri docere sacrificia omnia præterquam soli Deo , esse illicita ; cultum dæmonum & Idolorum esse relinquendum , & quæcunque ejusmodi cultum concernunt , censuerunt esse falsa , & fidei Christianæ repugnantia ; ad singularia verò descendendum , prout in Catechumenis ingenii promptitudo , aut ruditas exiget , aliisque circumstantiis , consuetudinibus , ac periculis perspectis. Cantoni 3. Octobris anni 1669.

Paternitatis vestræ. servus humillimus Ant. de Govea.

L ij

*DECLARATIO REVERENDI
Patris Dominici à Sancto Petro vulgò
Sarpetri de precedenti R. P. Navarette
Præpositi sui scripto , data Patri Ant. de
Govea Soc. JESU in Sinarum Imperio
Vice-Provinciali. Latina facta ex Hispanica.*

REVERENDE PATER.

Accepi cum ingenti gaudio , sensuque pietatis R. Patrem Navarettam Superiorem meum de iis controversiis de quibus inter nos actum est, & benè jam sentire, & sanctè , præclarèque statuisse ; Quamquam enim ille non retulerit ad me quod nuper decrevit sive meam nimiam fortasse illius rei cognoscendæ cupiditatem , studiumque compescere voluit , sive aliud sapienter est secutus, quod equidem quale sit ignoro ; illud mihi satis est ad solatium, quod eam epistolam , te ostendente , legerim quam ipse scripsit etiam apposito nomine. Profiteor itaque , & promitto coram Deo & Jesu Christo Paternitatì vestræ & cæteris Patribus me servaturum ea diligenter quæ Præpositus ille meus , eo scripto pollicetur , tum quia sic eum velle intelligo , simulque R. Patrem vice-Provincialem qui professus est illud se ratum habiturum esse quod P. Navarette statueret , tum quia id mihi persuasi , plurimùm id valere ad sanctissi-

mæ fidei nostræ propagationem , ad firmandam inter Missionarios ex utroque Ordine concordiam , atque ad ea tollenda scandala , quæ ex praxi contrariâ nata sunt , tum quia praxim hanc , & rectissimam esse , ex rationis meæ ac conscientiæ sensu judico & intelligo consentaneam esse vel Capitulorum nostrorum generalium decretis , vel epistolæ quæ est typis edita R. P. nostri Generalis ad Missionarios Sinenfes, vel consiliis ac mandatis R. P. Francisci à Paula Commissarii sancti Officii qui tum Provinciam nostram administrabat , vel iis quæ ex majori suffragiorum numero statuta sunt in congressu habito in urbe *Lan-Ki* inter omnes quotquot eramus in Sinis ex Ordine sancti Dominici Missionarios , tum denique quia rem illam & expetivi summo-peré , & enixè postulavi scriptis litteris ad R. P. Generalem nostrum & ad Eminentissimos Cardinales de Propaganda fide. Actum in hac domo in urbe *coïan-chéou-fou*. Die Octobris 4. an. 1669.

Fr. Dominicus Maria de sancto Petro,



QUÆSITA
A MISSIONARIIS
TUNKINENSIBUS
DE CULTU CONFUCII,

CUM RESPONSIONIBUS
R. Patris de Pa^z ex Ordine
Sancti Dominici.

1^o. **N**on defunt etiam in hoc regno templa dedicata Confucio, ^a cujus templum, domum sanctam, vel domum sancti vocant. In his ergo omnes litterati, ac laureati bis aut ter in anno debent convenire. In his etiam ipsi Confucio offeruntur sacrificia, ad modum, quo Romæ anno 45. à R. P. Joanne Baprista de Morales fuit propositum. Quæritur an liceat fidelibus litteratis concurrere ad hanc functionem, non assistendo sacrificio, cum peragitur, sed ut peracto sacrificio se prosternant, & absque illo prorsus errore Confucium venerentur ut magistrum?

Ad primum respondetur, ^b quod finito sacrificio, quod fit Confucio, cui litterati Christiani non assistunt, licet eisdem litteratis simul concurrere cum cæteris litteratis infidelibus, & reverentiam exhibere Confucio, pro-

a fol. 197. b fol. 198.

strationē ante ipsum factā, dum tamen nihil sperent, vel petant ab eo, & faciant ibi publicam protestationem, quod illum venerantur præcisè ut magistrum in animi grati signum doctrinæ ab ipso acceptæ, & quod nihil ab eo sperant accipere neque credunt ipsum habere divinitatem aut potestatem tribuendi bonum aliquod. Antequam hæc resolutio ratione ostendatur, advertendum est, quod si Confucius in regno Tunkini communiter ut Deus haberetur, aut ut idolum, aut potens hominibus auxilium aliâque bona præstare, neutiquam esset licitum reverentiam aliquam ei exhibere; quia quælibet veneratio aut reverentia ei à Christiano exhibita esset approbatio quædam divinitatis, ei à gentilibus attributæ; omnis enim reverentia quæ exhibetur ei, qui ut Deus in eodem regno communiter colitur, præsumitur divinitatis titulo facta. At certum existimo quod in regno Tunkini Confucius non colitur ut Deus communi gentilium acceptance. Hanc assertionem colligo ex eo quod in Regno Sinæ in quo floruit Confucius, ejusque doctrina in majori fuit, ac est, veneratione, & ex quo ad Tunkinum regnum, aliâsque vicinas Provincias emanavit, non attribuitur Confucio divinitas, aut potestas aliqua superior, communi hominum, ibi habitantium, existimatione. Hoc mihi constat ex variis relationibus Religiosorum nostri Ordinis, in Regno Sinæ assistentium.

In primis referunt, quod Christianos facientes protestationem coram gentilibus, quod

non credunt in Confucio divinitatem , aut potestatem aliquam , sed illum præcisè venerantur ut magistrum , audiunt Gentiles sine indignatione. Si in Regno Sinæ communiter existimaretur , “ Confucium habere divinitatem aut potestatem , humana superiorem ad eis auxiliandum , absque dubio Gentilium perturbatio oriretur , ex eo quod in publico hujusmodi potestas vel divinitas denegaretur Confucio , sicut contigit Ephesi ; cùm enim audissent Gentiles Divi Pauli doctrinam , negantis , esse veros Deos , quos gentiles venerabantur , tota civitas irâ , ac indignatione ferbuit. *Act. 19. Repleti sunt irâ , & exclamaverunt , dicentes : Magna Diana Ephesiorum.* Si Gentiles Sinæ ut Deum haberent Confucium , vel ab eo bona , vel auxilium sperarent , credibile non est , ut ita patienter ferrent , ut coram eis ei divinitas , omnisque potestas denegaretur. Hæc ratio efficacior redditur , si attendatur , quod Sinæ Christiani regulariter non audent negare Confucio reverentiam , quæ ei tanquam magistro exhibetur , timentes murmurationem & indignationem Gentilium , & ne forsan ob hanc causam eis gradus denegetur , & non timent ei denegare divinitatem , omnemque potestatem ad auxiliandum eis. Hæc enim ratio urgenter probat , quod in regno Sinarum , vel lege regni vel generali acceptione exhibetur Confucio reverentia , tanquam magistro , quam omittere nequeunt absque gravi notâ animi ingrati ac inobedientiæ legibus regni. Et simi-

a fol. 199.

liter

liter ostendit, quod nec communi acceptatione, nec lege Regni datur Confucio cultus religiosus, neque divinitas, neque potestas aliqua ei attribuitur. Deinde referunt nostri Religiosi in prædicto Sinæ Regno habitantes, quod cum quidam Christianus coram pluribus infidelibus protestationem fecisset, se reverentiam exhibere Confucio præcisè ut magistro, nullamque agnoscere in eo divinitatem aut potestatem, infideles protestatione Christiani ad risum excitati, dixerunt: *Forſan aliquis noſtrum Deum exiſtimat Confucium, aut in eo potestatem hominibus auxiliandi fatetur? Homo fuit ſimilis vobis, & illum ut magiſtrum veneramur ob excellentem doctrinam ab eo nobis relictam.* Etiam referunt prædicti Religiosi, quod Christianus literatus, non aſſiſtens ad faciendam reverentiam conſuetam coram Confucio, reputatur à Gentilibus, non ut irreligioſus, neque ut infidelis Sinicæ ſectæ, ſed ut ſuo ingratus magiſtro. Huic additur fundamento quod infideles literati Sinæ ſunt Atheiſtæ, exiſtimantes, nullam rem eſſe, nullamque aliam potestatem præter id quod oculis videtur corporeis, ſicut olim dicebant Saducæi Act. 13. *Saducæi enim dicunt, non eſſe reſurrectionem, neque Angelum, neque Spiritum.* Cum hac credulitate compati nequit, quod ſimul credant, Confucium jam mortuum, vel ejus Spiritum habere potestatem illis auxiliandi, vel quod ſperent, ſe aliquid accepturos ab eo: at qui ſpecialiter Confucium venerantur, templumque ejus vel aulam ingrediuntur, prædictam reverentiam facturi, ſunt ipſimet literati; hinc colligitur

quod Confucius non est communiter ut Deus in Regno Sinæ acceptatus, neque ei potestas aliqua attribuitur; si quidem illi, ad quos pertinet eum venerari, in eo non agnoscunt divinitatem, aut aliquam potestatem. Atque hic Reverendus Pater Pazius objicit sibi quod fuerat in objectione positum, nempe sua esse Confucio templa, ipsi offerri sacrificia, unde consequens sit Confucium idolum esse, nec licere proinde Christianis ipsum ullâ prostratione, aut alio cultu externo venerari. Duplex erat hujus difficultatis solvendæ ratio.

Prima si dicatur, satis ex his quæ suprâ sunt allata manifestum fieri Confucium idolum non esse, ac proinde neque locum eum in quo solus colitur, templum, neque cibos ipsi appositos sacrificium verè dici debere: altera etiamsi contrarium constaret, tamen infidelium superstitionem obesse Christiano non debere, qui nullatenus est ejus particeps, imò qui eam sibi non placere seque alienissimum esse ab ea profitetur, neque impedire quominus ille Christianus venerari Confucium ex gentis suæ ritu possit, atque erga illum eo munere perfungi, quod totum in civili cultu ac politico positum est.

Quamquam primum videbatur primam illam responsionem adhibere, præcipuè iis jam positis quæ Pazius antè probaverat, non aliam tamen hic adhibuit, quam secundam: quod idèò fecisse credi potest, ne illud inficiaretur, quod erat à quærentibus positum.

Itaque iis hoc assentitur & concedit, cibos atque alia quæ Confucio apponuntur sacri-

ficiū dici debere , quod quidem ita probat offerri non licere ut tamen nihil velit inde contra solutionem suam deduci, sed ipsum audiamus.

Quamvis ^a infideles literati prædicta sacrificia Confucio faciant , non illum existimant esse Deum , ut sacri Evangelii Ministri , qui in Regno Sinæ assistunt , communiter asserunt , videlicet , literatos infideles Atheistas esse , nullamque agnoscere Deitatem aut potestatem in Confucio ; quamvis neque in idolis , neque in Confucio credant esse aliquid divinitatis . . . Dicentes quod Confucius homo fuit , sicut cæteri homines , qui jam defunctus omni caret facultate

Deinde constat, quod illa reverentia , quæ fit Confucio ab illis qui gradum accipiunt , non excedit ex natura sua limites reverentiæ politicæ. Et quidem , si eam facientes , protestatione fidei Catholicæ denegent ei aliam quamcumque venerationis causam , concedentes ei reverentiam , ^b quæ ei debetur ut magistro , Infideles non contradicunt , quin potius protestationem approbare solent ; ergo reverentia politica , quæ exhibetur Confucio, fixa & stabilis apud omnes habetur ; superstitiosa verò , quâ sacrificia offeruntur , ficta , accessoria , atque instabilis est. Ex quo ulterius colligitur , quod sacrificia , preces , & similia ad Confucium , superstitiosa sunt & mala , sistèque addita. At reverentiæ , quæ tanquam magistro exhibentur , politicæ , & potest Christianus literatus eas facere , factâ

^a fol. 202.

^b fol. 203.

prædictâ protestatione. Et hoc est valdè conforme determinationi sacrae Congregationis sanctæ Inquisitionis Romanæ approbatæ ab Alex. VII. Decernitur ibi, posse permitti Christianis, ut cæremonias erga suos peragant defunctos simul cum infidelibus, ablati tamen superstitionis. Supponit ibi, cæremonias & actiones, quæ erga defunctos fiunt, esse ex se cultum politicum; eique accessisse introductione Gentilium aliquas superstitiones. Hoc enim proponebatur in quæsito, quod sic erat: *Num cæremonia, quæ sunt ex Philosophorum placitis circa defunctos, Christianis permitti possint, prohibendo quicquid supersticiosum accessit.* Et sacra Congregatio respondit, *posse tolerari; Sinas conversos adhibere dictas cæremonias erga suos defunctos, etiam cum Gentilibus, sublatis tamen superstitionis.* Simili modo poterit permitti, ut faciant Christiani erga Confucium solitas cæremonias sublatis superstitionis, quæ accesserunt. Et quidem superstiosa, quæ circa Confucium sunt, sunt sacrificia & preces, quamvis externæ tantum sint; quibus sublatis, aliæ cæremoniæ, quæ cultum tantum politicum indicant, Christianis permitti possunt.

Alia efficaciori ratione ostendi potest, quodd, non obstante quod infideles faciant sacrificia Confucio, potest esse licita reverentia, quæ ei tanquam magistro fieri solet, supposito quod in Regno non sit communis opinio, quodd Confucius aliquid numinis habeat. Hæc ratio fundatur in quadam sacrae Congregationis de Propaganda Fide determinatio-

ne approbata ab Innocentio X. Quæsitum
 15. tunc sacre Congregationi propositum sic
 habebat: *In multis templis idolorum illius Regni
 invenitur una tabella deaurata, & collocata super
 unam mensam, vel altare, & omnibus ornamentis
 candelarum, rosarum, odoramentorum munita &
 ornata, qua in tabula scriptum est: Vivat Rex Si-
 narum ad multa annorum millia & ante præs-
 tam tabellam mos est inter illos idololatrias sacrificare
 bis vel ter in anno, & facere genuflexiones in honorem
 & reverentiam illius. Queritur, si Ministri Christi
 Domini possimus in nostris Ecclesiis collocare hujusmo-
 di altare cum tabella & circumstantiis prædictis,
 & hoc ante altare, ubi Sacerdotes Dei sacrificant
 oblationem immaculatam? Et respondit sacra
 Congregatio: Exclusis sacrificiis, & altari verè,
 & propriè dicto, cetera quæ redolent tantummodo
 cultum civilem, aut possunt ad illum reduci, permitti
 posse.*

Notari hic oportet quod cultus, qui ex
 priori gentilium intentione prædictæ tabellæ
 exhibebatur, politicus est; si quidem ordina-
 tur ad Regis vivi honorem & diuturna ejus
 vita desideratur. Et quamvis sacre Congre-
 gationi propositum fuit in quæsito, quòd
 Gentiles faciunt prædictæ tabellæ, sacrificia
 illicita & superstitiosa, annuit, posse permitti,
 ut cultum seu reverentiam exhibeant hujus-
 modi tabellæ, dummodo sacrificia non agant,
 neque in altari verè & propriè dicto collocent.

Ex quo infertur, quòd cultus, qui datur
 Confucio tanquam magistro per exhibitio-
 nem reverentiæ, potest Christianis permitti,
 cum politicus ex natura sua sit, seu ad poli-

ticum reduci possit : & ex eo quod Gentiles ei offerant sacrificia , non censentur impediri Christiani à cultu politico Confucio exhibendo: Et quidem sacrificia accessoria ab infidelibus addita , non constituunt in ratione templi , vel altaris domum vel mensam in quibus offeruntur ; quia cum dicta sacrificia addita sint accidentaliter cultui politico more Gentilium , qui omnibus actionibus miscent superstitiones , inde est quod cultum politicum non impediunt , neque rationem templi , & altaris verè & propriè aut absolutè constituunt , sed fide & respectu illius sacrificii , quod tunc superaddunt cultui politico.

F I N I S.



14



EPISTOLA


ILLUSTRISSIMI DOMINI
GREGORII LOPEZ

A D

R. P. PHILIPPUM COUPLET

Societatis J E S U Procuratorem
Sinarum tunc Romæ degentem.

QUamquam & locorum distantia me plurimum à R. V. Paternitate disjungit; & per diu est, ex quo suavi ipsius & gratâ consuetudine frui non licuit; non potest tamen animus cum eâ sæpè non adesse. Et verò Pat. V^z me proximum faciunt vincula charitatis illius quâ me complecti jam dudum & fovere dignata est. Ac cæteris quidem in rebus longè me imparèrem atque inferiorem esse sentio, sed amorem certè amore compensabo. Quare obsecro ut quoniam id unum jam possum, levem hanc memoris animi testificationem tultro recipiat. Erit mihi per jucundum & summi solatii loco, si Paternitatem vestram cognovero & sine ullo incommodo iter confecisse & pervenisse feliciter eò quò



2 *D. Gregorii Lopez*

est delegata, & res eas, quas expetebat fuisse consecutam.

Ac licet indignus ego sim, cujus precibus id tribuat Deus O. M. Tamen ut flagitem facit & mei ipsius cura & ratio mihi impositi muneris, & patriæ meæ charitas, multò autem magis ardor ille qui me R. P. vestræ conjungit, meque cum ipsa cor unum efficit.

Nuper accepi à Sacrà Congregatione admissam non fuisse renunciationem meam. Quare quamquam jam & ipsâ ætate confectus & omni ex parte muneri tanto impar, Divinâ ope fretus & merito obedientiæ, & tot Missionariorum auxilio, quorum laboribus excolitur hæc Domini vinea, humerum oneri subjeci & ad iter me accinxi; Neque aliam ob rem jam in urbe Cantonienfi commoror, nisi ut hinc in urbem Manilam navigem, atque ibi sacro ritu inaugurer. Simul etiam ad viros peritos referam multa quæ me dubium ac sollicitum habent, & aliquid si possum, elemosynæ nomine ad victum vestitumque meum corrogabo: Neque enim ignorat R. P. vestra nihil mihi esse vel à civibus meis vel ulla alia in re præsidii.

Postquam fuero inauguratus, atque in possessionem, ut sit, venero, decrevi Missionarios cogere in concilium, quò puncta controversa iterum discutiantur, atque ego deinde quam diligentissimè fieri poterit, & ex omnium suffragiis, referam prout debeo, ad sanctam sedem Apostolicam at-

que ad Sacram Congregationem , atque ego quidem eam ob rem jam ab anno & amplius libros litterasque Sinicas summa curâ & labore versare & scrutari non desino, textus excerpo , puncta ipsa conféro ut clarius ac certiùs conficere possim informationes , atque in eo de quo dixi , concilio deliberare. Ita futurum spero ut id statuatur ac decernatur quod maximè erit opportunum ad Prædicationis Evangelicæ praxim, quam uniformiter ab omnibus servari perquam necesse est. Quidquid autem effecero dabo operam ut R^z V^z P^{ti} innotescat, quam Deo juvante spero ad nos adjuvandos huc brevi redituram. Id unum postulo ut multos secum adducat operarios , eosque & zeli ferventis & multæ doctrinæ , qui huic Domini vineæ jam amplæ labores suos impendant. Et quamquam non dubito quin id V^z R^z Paternitati summæ curæ sit , tamen patriæ meæ charitas facit ut illud eò magis urgeam, quod video plurimos operarios ob immensum laborem hic quasi paucissimos fore.

Hoc anno 1682. in urbe Fōgañ , quæ mihi natalis est , orta est persecutio , quæ à levibus initiis profecta potuit grassari longiùs, atque ad omnes trium familiarum Religiosos pertinere : verùm sedata demum est , & plus utilitatis attulit quam damni. Egregiam in ea re navavit , operam R^{us} admodum Pater Dominicus Gabiani , vice-Provincialis Sinarum , qui tum erat in fō cheũ sũ ; Neque parùm profue-

4 *D. Gregorii Lopez Litteræ*

runt ad reducendam tranquillitatem litteræ Patris nostri Ferdinandi Verbiest ad novum Proregem. Ita extinctus est ille ignis qui fortasse missione tota conflagrasset. Pro eo munere ac beneficio non modò per litteras gratias egi ut debui, prædictis patribus; sed etiam R. P. V^z ago habeoque maximas. Neque me afficit tantum illud quod ad me spectat, sed etiam quod eo quasi novo vinculo spero firmam ac stabilem fore pacem & charitatem mutuam inter familias tres Religiosas, ad quas Missionis hujus amplificandæ cura pertinet. Jam nihil aliud occurrit, nisi ut R. P. V^{am} obsecrem mei ut sit memor in suis Sacrificiis & orationibus. Deus te R. Pater mihi servet incolumem, atque huc reducem feliciter ac lætum videre largiatur. Cantoni Die 10. Novembris anni 1682. Paternitatis Vestræ admodum Reverendæ Servus atque amicus observantissimus.

FR. GREGORIUS LOPEZ.



EX EPISTOLA

D. GREGORII LOPEZ

Electi Episcopi Basilitani ad Reverendum admodum Patrem Magistrum Generalem Sacri Ordinis Dominicanorum, Latinâ factâ, scriptâ Hispanicè.

EA re constituta (*debere nimirum ipsum Oblatam sibi Episcopi & Apostolici Vicarii dignitatem admittere*) visum est primum in id incumbendum esse , ut iniretur pax & concordia , animorumque consensus inter Societatis Jesu & Ordinis Nostri Missionarios , super controversiis & scriptis , mittendisque ad Curiam Romanam informationibus , de iis quæ dicuntur Sinensium Doctorum , progenitorumque templa. Placuit igitur eos, ex ordine utroque Missionarios qui diutius in Sinis egissent , ac me potissimum & origine Sinensem , & proVectum ætate & per annos 40. in his Missionibus exercitatum , & caracterum Sinensium librorumque , quos vocant Claficos , & harum omnium rerum peritiâ atque usu probatum , scribere separatim informationes nostras , & manifesta , ut scilicet haberi posset , quid esset in iis rebus certissimum ex omnium consensu-

6 *D. Gregorii Lopez Litteræ.*

quod ubi mea subscriptione firmassem, res tota deferretur ad Sanctitatem suam, quæ statueret quid potissimum sequi deberemus, atque ita finis imponeretur his disputationibus quæ non sine ingenti scandalo & animarum plurimarum damno, grassabantur. Atque ut id exequerer quod statutum fuerat, ego hunc in me laborem suscepi, & rem tantam eò diligentius tractandam mihi esse duxi, quò propius ad me pertineret, cui curam aliorum esse creditam intelligerem. Verùm aliqui Religiosi Nostri Ordinis, nuper ex Europa, ad hanc Missionem adveſti, juvenes scilicet atque imperiti, nullo usu rerum, nullâ hujus linguæ scientiâ, quâ ne nunc quidem loqui didicere, libros verò classicos legere atque intelligere multò minùs, unde illius linguæ addiscendæ labore ac difficultate detriti, alius ex hac Missione discedendi concilium cœpit, alter etiam discessit. Igitur illi ubi cognovêre, me in aliquibus alienum esse ab iis quæ aliqui ex nostro Ordine censuerant, & scriptis etiam libris ediderunt, quamquàm ad id solo veritatis amore fuerim inductus, nihilque proposuerim, quod non & rationibus firmis probaverim & usu ac consuetudine & classicorum autoritate librorum, & earum rerum narratione, quæ in luce publica atque omnium oculis erant gestæ, &c.



EPISTOLA

D. GREGORII LOPEZ

Episcopi Basilitani Vicarii Apostolici per Sinas ad S. D. N. Innocentium XI. Latinè Scripta.

SANCTISSIME PATER.

JAm dudum Sanctitatem Vestram , anno nempe præterito , certiorum feci , quatenus acceptis Apostolicis mandatis , ad Episcopatum Basilitanum & Vicariatum Sinarum Apostolicum pertinentibus , licet imbecillis , senior & tanto muneri impar , obedientiæ succubueram jugo , & quâ fretus causâ , in hanc Manilensem civitatem devenissem , ut in Siamum , ubi de meâ consecratione agi debet , proficiscerer , & quem obicem invenissem apud Auditores hujus Regiæ Prætoriae Philippinarum. Post autem his superatis , auspice Deo , fortiùs contra me apud Religiosos Ordinis mei expertus fui obstaculum : Frater enim Antonius Calderon hujus meæ Provinciæ SS. Rosarii Provincialis acri contra me percitus æstro , eo quod existimet me dissentiri aliquibus P. P. Ordinis mei opinionibus , circa controversias quæ in Sinis continuò discutiuntur , & in Curiâ hac disputantur , meque suffragari aliis opinionibus Missionariorum So-

8 *D. Gregorii Lopez Litteræ.*
 cietatis J E S U (circa quod latè diffu-
 sèque notitiam impertior Emin. Card.
 S. Congreg. de propaganda fide, & iidem
 S. V^z referent.) Hanc ob rem præfatus
 Provincialis verbis me indecoris affecit, &
 meum in Sinas reditum huc usque frustra-
 vit; me quasi vinctum detinens, in quo-
 dam Ordinis mei Conventu, à quo clami-
 evadens in hunc confugi Ordinis Eremita-
 rum Sancti Patris Augustini. Mihi insuper
 fuerat comminatus; præfatus Ordinis mei
 Provincialis, si alieno fretus auxilio in Sinas
 conarer reverti, exuendum me prius fore ab
 illo habitu meæ Religionis & simul à se
 revocandos esse Manilam omnes Religio-
 sos Missionarios mei Ordinis in Sinis degen-
 tes; idcirco humiliter Sanctitatem vestram
 supplex exoro, ut de me provideat quate-
 nus ei visum fuerit ad majorem Dei & San-
 ctæ Romanæ Ecclesiæ gloriam, & obse-
 quium. Vale incolumis, Sanctissime Pater;
 in Jugi Fœlicitate Manilæ X. Kal. Ju-
 nii 1684.

SANCTISSIME PATER

Sanctitatis Vestræ Opt. Max.

Humiliter Sacris pedibus Provolutus
Fr. Gregorius Lopez, Episcopus Basi-
litanus, Vicarius Apostolicus Nan-
chinensis & Coreensis:

EPISTOLÆ



EPISTOLA

EJUSDEM D. GREGORII LOPEZ
Episcopi Basilitani &c. ad Eminentissi-
mos Cardinales sacrae Congregationis de
propaganda Fide, latinè scripta.

*Eminentissimi ac Reverendissimi Domini S. R. P.
Cardinales Sacrae Congregationis de pro-
paganda Fide.*

GRave nimis & imbellibus meis hu-
meris procul dubio impar onus,
quod Sanctissimus D. N. Innocen-
tius XI. mihi ineptissimo committere dig-
natus est, me licet indignum in Episcopale
fastigium Basilitanæ Ecclesiæ exaltans, si-
mul cum Apostolico Vicariatu sex opu-
lentiorum, & præcipuarum imperij Sinici
regionum nempe Nankin, Pekin, Xamfi,
Xienfi, Honang, Xantung, cum vastissimo
Regno magnæ Coreæ; quorum Apostoli-
cas has patentes Romæ denuð expeditas
anno M. DC. LXXIX. die 12. mensis
octobris, apud Sinas suscepi sub mense de-
cembri anni M. DC. LXXXI. per manus
D. Illustrissimi D. Ludovici Laneau Epi-
scopi Metellopolitani & Vicarii Apostolici
Nankin, & Siam, ardentem me æstuat &
compellit ut Reverendissimis Vestris Emi-
nentius exactam impertiar notitiã de meo

omni qualicumque eventu, & de cæteris omnibus quæ mihi acciderunt, ex insidiis Satanz & spoliatoris Zabulon maximè dolentis opimam utique prædam apud Sinas è faucibus eripi, quibus jam dolet apropinquare regnum Dei.

Acceptis jam prædictis litteris Apostolicis & consistorialibus, in quibus Sanctissimus Dominus & Pater D. Papa enixius mihi injungit & præcipit, ut talibus nequaquam renuntiem dignitatibus imò acriter urgens, & comminans me rationem Deo redditurum de omni eventu & detrimento Sinicis animabus ob meam renitentiam emerfuris, humiliter cæcâ fretus obedientiâ succubui oneri, in Domino confidens multiplici virium panopliâ, & sedium suarum assitricè sapientiâ me muniendum fore, ut talibus valerem armis cataphractus in Sinas prodire, aëreas potestates & diabolicas phalanges debellaturus. Quapropter omnes supradictas litteras, imprimis exhibui ante meum Ordinarium Præsulem, scilicet Vicarium Præsulem apud Sinas Provinciæ meæ Sancti Rosarii insularum Philippinarum Patrem Fratrem Petrum de Alarcon, qui consilio inito Patrum Religiosorum Ordinis magis propinquorum, & ob itinerum diuturnitatem consultis per litteras absentibus, visisque diplomatibus Apostolicis unâ cum mandato Reverendissimi P. Fr. Joannis Thomæ de Rocaberti mei Prædicatorum Ordinis Magistri Generalis præcipientis P. Provinciali prædictæ Provinciæ Sancti Ro-

sarii, quod mihi Socium assignet Doctum
& Theologum, congruumque stipendium
pro utriusque alimonia constituat, omnes
unanimiter mihi Suffragantes cum prædic-
to Patre Vice-Provinciali, in meum reli-
querunt arbitrium, acceptionem Episco-
patus. Accepravi utique hoc importabile
onus, quod maximè gravatum est super
me: & iisdem comitiis, Patres Congregati
constituerunt ut illicò proficiscerer in civi-
tatem Manilensem. Procinctus itineri, li-
cet eâ parcimoniâ & tenuitate, quæ paupe-
rioribus Missionariis esse solet, deveni per
Provinciam Canton in Macaum urbem di-
tioni Lusitanæ subiectam, & unicam por-
tam in Sinarum Imperium, in quâ necesse
fuit occultum me manere, & clam habitu
Sinico cum aliis Sinis Mercatoribus navem
ascendere: nunciatum enim mihi fuerat no-
viter ex Goâ Orientalis Indiæ Metropoli ur-
gens advenisse mandatum Proregis Lusita-
norum, ut si forte aliqui Episcopi, vel Vi-
carii Apostolici ab hac Sacra Congregatione
de Propaganda Fide, & maximè in Sinas
demandati, Macaum appulerint, protinùs
apprehenderentur & transportarentur in
Goam. Quapropter cum impossibilis tunc
mihi aditus in Siamum pateret, ubi circa
meam consecrationem agi debebatur, nac-
tus occasionem Manilam accedendi, unâ
cum Patre Fr. Petro de Alarcon, qui relic-
tis sibi commissis Religiosis quibus præerat
apud Sinas, se mihi Socium obtulit, in lo-
bo P.Fr. Francisci Lopez Socii mei nupè

defuncti, simulans meum obsequium Manilæ peracturum, in navem ascendi illuc appulsuram. Tandem jam fructus Manilano littore, ab omnibus tam Ecclesiasticis quàm Sæcularibus unanimi applausu susceptus fui, & honoratus, & magnis favoribus prosecutus; & meam destinavi mansionem in quodam conventu mei Ordinis extra muros Manilæ in pago mercatorum Sinarum, quod ab Hispanis Parjan nuncupatur. Ex tunc autem Præfatus Pater Fr. Petrus de Alarcon qui ut me perderet è Sinis comitatus fuerat, extendere contra me cœpit funiculum insidiarum suarum diabolicum, superfeminans zizaniam ut Filios Matris meæ Provinciæ Sancti Rosarii meos adversarios constitueret, & cunctis viribus moliebatur, ut Manilæ detinerer, & ut consecratio mea & meus præcipuè in Sinas reductus in perpetuum differretur. Scripsit super hæc prædictus P. Fr. Petrus de Alarcon Patri Provinciali hujus Provinciæ Sancti Rosarii Fr. Antonio Calderon, objiciens in me quoddam Patribus Societatis JESU in Sinis essem affectus, & assentirem eorundem Patrum aliquibus opinionibus & judiciis circa controversias, cultus, Politicæ, Religionis, & Idololatriæ, Sectarumque literatorum, æstimantes inani cenodoxiâ, dedecus, & detrimentum esse meo Ordini me Sinam genere & consequenter eruditorem illis characteribus & idiomate & in libris Sinarum classicis expeditiorem cunctis Europæis, callentem, & Eucleantem,

immensum caracterum pelagus , & genuinam , & eorum hieroglyphicam significationem magis penetrantem extra eorum chorum psallere , & in multis Patrum Societatis J E S U opinioni suffragari , cum amicior Platone debeat esse veritas , cupientes me Septuagenarium veteranumque Sinicæ Missionis ministrum similibus controversiis per annos quadraginta versatum , Tyronum sequi doctrinas & quasi vento circumagi & non animarum augmentum tantummodò quærere. Forsitan illos ad hoc impulerat libellus controversiarum nuper à me expeditus , mei Prælati semel atque iterum præcepto editus , in quo satis dispallescere studui , prædictos PP. Missionarios mei Ordinis in multis torquere & exterminare sensus characterum sapientiæ Sinicæ , sensu litterali & translatione seipso & alios inaniter seducendo , & in abyssum lubricarum ambagum se implicantes , & similiter in multis aliis dissentio opinionibus Patrum Societ. J E S U , studens & insudans , ut utriusque Religionis Patrum opiniones concordarem & in luculentam redigerem consonantiam , ut succedentia scandala de gregis Dominici medio tollerem , & unanimi doctrina ad Amussim hærentes , nos utique exhiberemus in conspectu gentium sicut Dei ministros & fideles dispensatores multiformis gratiæ suæ. Hoc tantæ contra me inimicitiae fomittem ministravit , ut me Religiosi mei Ordinis detraherent , & velut Ethnicum &

Publicanum detestarentur, molientes contra me & supplantationem meditantes.

Post autem Manilam venit P. Provincialis adhuc spirans minarum, & exacerbationum in me, & cum primum eum vindicandi causâ adfuissem, indecorosis contumeliosisque verbis, magno imperio, & mecum personaliter alloquens, me quasi subditum & lethali crimine noxium & reum objurgavit, corripuit, & exprobavit; imprimis me interrogans quare absque sua licentia Episcopatum susceperim? Quare pileo clericali & viridi galero Episcopabilibus insigniis uterer? Ad primum respondi me SS. D. N. Papæ & Reverendissimi P. Magistr. Generalis præceptis invitum; Episcopatum suscepisse: quibus ille addidit sequentem sententiam me scilicet minime unquam in Sinas reversurum, non tantum quasi Episcopum, sed nec quasi particularem Missionarium; si autem alieno fretus auxilio in Sinas conarer reverti, me prius ab eo habitu Religionis exuendum fore, & insuper revocandos ab eo esse Religiosos omnes in Sinis Missionarios commorantes. Quibus auditis, dolenter obmutui, considerans jactam fuisse aleam meæ perditionis, & me contemplanis alienigenam, senem, pauperrimum, & omni destitutum auxilio, alienum fratribus meis qui desiderabant supplantare gressus meos, impediennes & parvi pendentis Litteras Apostolicas & mandata R. P. Magistr. Generalis Ordinis mei, reposui, in spem meam

in Domino & licet derentus, & invitus manere decrevi in prædicta civitate Manilensi, ex qua jam dudum de iis omnibus SS. D.N. Papæ & vestris Eminentissimis litteras direxi tam per novam Hispaniam quàm per Siam, per manus Reverendissimorum Episcoporum Heliopolitani, Metellopolitani, & Argolitani, conferens præsentis æstus meos & labores ut SS. D. N. & Eminentissimæ vestræ de me desolatissimo prout eis visum fuerit providere dignentur.

Insuper autem patienter ferens exterminium & violentam captivitatem meam, manens in prædicto conventu *deparjan*, adhuc expectavi, an fortasse comitiis Congregationis intermediæ dictæ meæ provinciæ densæ meæ desolationis tenebræ clarescerent. Sed proh dolor! una sola mihi cuncta salus fuerat nullam sperare salutem in filiis hominum, in quibus non est salus: indurata quippe fuerant corda fratrum meorum celebratâ enim intermediâ Congregatione, sub die 22. aprilis labentis anni 1684. violentius in me moliri videbatur, magisque bacchari, timui tribulationem, tempestatem. Judicia enim habui probabilia, actum fuisse à Patribus Congregationis, me in remotiorem hujus Manilanæ insulæ septentrionalem regionem (quæ Cagayan) ab illis esse relegandum exulemque ire impotem humani auxilii omnique solatio & spe præcipuè in Sinas revertendi destitutum, ut tædio senioque consumptus diem obirem, & quem inimicum meæ religionis temere

16 *D. Gregorii Lopez Epistola.*

arbitrabantur, de medio tollerent, nec occulta mihi fuit hæc crudelis Patrum sententia : quamobrem præcepto D. N. Salvatoris inhærens delitescere constitui, & nactus occasionem, evanui ab oculis eorum & sub præsidium & tutelam Doctoris D. Didaci Calderon & Serrano confugi, qui nunc temporis primus Auditor est hujus Manilanæ Prætoris Audientis Catholici Regis Hispaniarum, à quo benignè susceptus & consolatus, reque meâ in Audientia cum sociis coajutoribus peractâ in hunc alium conventum sancti Pauli Manilensis Ordinis PP. Eremitarum S. P. N. Augustini depositus & asservandus traditus fui, in quo continuis horum piorum Patrum favoribus, quoad usque meus in Sinas reditus disponatur, seu prope diem expecto minimè differetur auxiliantibus ad hoc exequendum Patribus Provincialibus Religionum & maxime P. Provinciali Ordinis sancti Augustini F. Josepho Duque qui præcipuè me in hac expeditione adjuvat. Valete in æternam fœlicitatem Illustrissimi Patres uti desidero & S. R. E. interest. Zanilæ III. Idus Junij M. D. C. LXXXIV.

EMINENTISSIMI DOMINI

Vestrarum Dominationum

Humilis & addictissimus servus.

Frater GREGORIUS LOPEZ.

Episcopus Basilitanus Vicarius.

Apostolicus Nankin, & Corien.

EXPER

EXCERPTUM.

Ex tractatu Illustrissimi ac Reverendissimi D.D. Gregorii Lopez Ordinis Sancti Dominici, Episcopi Basilitani & Vicarii Apostolici Nankini & Coreæ.

Priusquam ea quæ ad rem nostram pertinent excerpam ex tractatu, quem vir ille ac tantus D. Gregorius Lopez in hujusmodi controversias edidit; existimavi consentaneum esse, eas hîc referre rationes, quibus nituntur ij, qui Sinensium cæremonias improbant. Contendunt nempe eas superstitionibus cultuque nefario referas esse, hisque maximè de causis.

1. Aiunt nomine *Ci* donatas esse solemnes illas cæremonias quæ in Confucii, majorumque memoriâ celebrari censuere. Porro vocem *Ci* reddendam esse Sacrificii nomine.

2. Ritus illum, ante Confucii, majorumque tabulas, carnes animalium & ferica offerendi, cereas candelas accendendi, urendi thura, demittendi ad terram capitis, verum esse Sacrificium, quod ipsis operatur.

3. Vocari *Miao* locum illum, in quo Confucio mortuisque honores hujusmodi exhibentur, nihilque aliud nisi templum hac voce adumbrari.

4. Præscribi in Ritualibus publicis certas preces, quibus indigenæ postulent à Confucio & majoribus concedi sibi secundam va-

letudinem, divitias, prosperum in suscepi-
tis rebus exitum, &c. Unde patet eos pro
numinibus aut saltem pro Sanctis ha-
beri.

5. Denique imbuisse Sinensium animos
hanc opinionem, ut existiment Confucii,
majorumque animas, in iis tabulis, coram
quibus peraguntur hæ ceremoniæ, præ-
sentes adesse, quasi eò se hoc tempore si-
sterent.

Hæ sunt præcipuæ eorum rationes, qui
negant eos, qui Confucio, mortuisque ex-
hibentur honores, civilis esse tantum ob-
sequii ac meræ urbanitatis.

Verum è tractatu quem hanc in rem
scripsit D. Gregorius Lopez Basilitanus
Episcopus quinque propositiones licet
erueret, quibus eæ quas modò reruli ra-
tiones penitus convellantur.

I. PROPOSITIO.

Vox *Ci* cum idem sonet ac convivium,
quo quis excipitur cum celebritatis aliquo
apparatu, nullatenus probat solemnes cæ-
remonias quæ in Confucii mortuorumque
honorem institutæ sunt, Sacrificium ap-
pellandas esse.

In Præ-
fat. not.
1.

Probat hanc propositionem Illustrissimus
D. Gregorius Lopez sequentibus verbis,

„Doctör celeberrimus *Chū vñen Kuñg* in
„suo libro seu rituali à se composito *Kialì*
„dicto ait quod Doctör *Kāōxi* refert quæ-
dam verba alterius Doctöris *Ho hieū nuñ*.

cupati , declarantis quo tempore quibus-
que in oblationibus utendum sit voce ac
literâ *Ci*. Sunt autem quæ sequuntur. *Yeu* “
Seng yen Ci , *vû Seng yve cien*. Et sensus “
eorum est ; quod si in oblationibus offe- “
runtur animalia , hujusmodi oblationes “
vocantur *Ci*. Sin autem , quod accidit in “
oblationibus minus solemnibus , dicuntur “
Cien. “

Item in Rituali Sinico , cui titulus “
Liki tomo 2. *Kiven ul xe ù fang ki ty San xe* , “
Confucius ait. *Ka xe ly chu iin chin Kucy*. “
Che ke ci , *chu iin pachy*. Id est , Si Dominus “
domus invitans aliquem seu faciens con- “
vivium alicui personaliter serviat invitato “
dicti convivii tempore , aut ministret eden- “
da , certè hujusmodi convivium (*ci*) accep- “
tum erit invitato. Si verò invitans invitato “
personaliter ea non offerat vel ministret , “
absque dubio tale convivium non erit (*ci*) “
acceptum hospiti. Adeòque hîc acceptum “
aliquid habere seu delectari de aliquo di- “
citur *ci*. “

Itaque ex suprà dictis colligitur ipsam “
vocem seu litteram *ci* nunc verbum nunc “
nomen agere. Dum autem verbum agit , “
nunc offerre , nunc *acceptare* significandi “
vim habere. “

Item deducitur ipsam vocem seu lite- “
ram *ci* in sua ratione formali indifferentem “
esse ad aliquid superstitiosum vel non su- “
perstitiosum significandum. Unde non be- “
ne explicabitur si dicatur quod *ci* signi- “
ficet tantummodò *Sacrificare*. Prout verum “

„ non efflet dicere quod eadem litera *ei*
 „ numquam accipiat ad significandum ve-
 „ rum sacrificium.

„ Cum igitur in præsentī tractatū ipsam
 „ vocem *ei* benignè Lector, invenies, sub
 „ nomine *Sacrificiū* vel ad *Sacrificare* signifi-
 „ candum acceptum, noli tibi suadere me
 „ certò sentire eodem in loco ipsum ejusmo-
 „ di significatum habere. Ego enim indiffe-
 „ renter hīc utor his terminis, *Sacrificare*,
 „ *offerre*; *Sacrificium*, *oblatio*, non magis huic
 „ inhærendo quam alter, nisi ipsa materia
 „ quæ pertractatur talis sit, ut ex ipsa ma-
 „ nifestè colligi possit, juxtà ea quæ suprà
 „ dixi, tunc significare verum sacrificium
 „ vel tantum offerre, politicamque oblatio-
 „ nem.

II. PROPOSITIO.

Quæcunque Confucio mortuisque offe-
 runtur, ea non sunt sacrificium, sed meræ
 urbanitatis officia.

Probat hanc propositionem Illustrissimus
 D. Gregorius Lopez sequentibus verbis.

In Præ-
 fat. not.
 3.

„ Miraberis utique, pie Lector, eo ipso
 „ quod leges in hoc tractatū ritus & cære-
 „ monias, quibus Sinenſes suos defunctos
 „ venerantur eiſque ſerviunt, difficileque
 „ cenſebis eas ordinem ſphæramque poli-
 „ ticarum ex ſuâ inſtitutione non excedere,
 „ niſi hīc aliud notandum, ad te cautum
 „ reddendum inferendo judicium ſuper his,
 „ præmittam.

Audies enim in dictis ritibus cæremo-
niisque celebrandis passim immolari car-
nes tum coctas tum crudas, offerri vina,
animalia occidi, redolere incensa, odo-
res varios cremari, musica instrumenta
resonare, prostrationes fieri, jejunia præ-
mitti, quæ omnia prima facie superstitio-
sa & in ordine religiosi cultus numerari
videntur. Quare ut nonnisi rectum judi-
cium ferre possis, scito prius te ritus Si-
nicos, quibus se invicem Sinenses, dum
adhuc in hoc sæculo degunt, excipiunt
& honorant, novisse aliquantulum esse.
Ubi licet excessum reperias, politicum
tamen quod agitur, exceptis perpaucis,
esse, saltem ex institutione, dices.

Item scire te oportet in legem transisse,
omnibusque Sinensibus fuisse probatum
sequens Confucii dictum *sû sù jû sù seng* :
sû vuang jû sù chûn. Hoc est, servien-
dum est defunctis eo modo quo vivis.
Quod bis repetitur diversis verbis.

Itaque notandum quartò quod moris
est apud Sinas invitanti invitatis, præ-
cipuè in conviviis solemnioribus, quos-
dam cibos delicatiores, vinum & *cha*,
quæ est potio in Sinis usitata, propriis
manibus reverenterque offerre. Item in
honorem hospitem animalia quædam oc-
cidi & hoc juxta gradum ac dignitatem
invitantis & hospitem, ut videre est in
libris *liki*, conviviique tempore odores
cremari, musicam adhiberi, prostrationes
verò inclinationesque profundæ inter Si-

„nenses honoris causâ communiter fiunt,
 „tùm inter æquales , tùm ab inferioribus
 „erga superiores.

„Et quamvis jejunia in honorem vivo-
 „rum non sint , in usu communiter , neque
 „lege præscripta , non defuere tamen anti-
 „quitùs , qui dum Imperatori tributa sol-
 „venda parabant , jejunia quædam præmit-
 „terent , in ejusdem Imperatoris honorem.
 „His enim ritibus putaverunt Sinenfes uni-
 „tatem , concordiam ordinum , pacemque
 „facilius servari posse.

caput
 §. num.
 14.

„Nota quod antiquitùs dum adulti vivi
 „convivio se se excipiebant , panni serici pe-
 „tiam in disco argenteo super mensa col-
 „locabant , hospiti eam offerendo ; ut ita
 „eum ad edendum bibendumve move-
 „rent. Quæ causa est hujus ritus etiam in
 „oblatione *ci* erga magistrum defunctum
 „frequentandi , ut id impleatur quod dici-
 „tur serviendum esse defunctis quasi vive-
 „rent.

caput 1.
 §. 4.
 num. 11.

„In *Lún jû* dicit Confucius seu *Kung sù*
 „*chù* , *ci jû Chay* , id est , oblationem de-
 „functis faciendam esse tanquam si præ-
 „sentes forent seu vivi. Hæc verba explicat
 „quidam Confucii discipulus dicens Ma-
 „gistrum suum quando defunctis offerebat
 „id totâ pietate totoque ex corde factitasse ,
 „utque ad eam pietatem se se excitaret ,
 „solitum esse eos , tanquam præsentem vide-
 „ret aut eorum vocem audiret , sibi ima-
 „ginari ; & quia pridem jam defuncti erant ,
 „eorum interdum memoriam revocabat.

Epistola.

23

In eodem exponit quâ pietate filii ho-
norare debeant parentes suos vivos, quâ-
que eos defunctos terræ mandare & se-
pultis oblationes seu *ci* facere juxta unius
cujusque dignitatem.

ibidem
nu. 12.

In Libro *Liki* capite *ram kum* dicitur
homini vitâ functo nullas ultra vires su-
peresse in ordine ad ritum: sed vivos seu
superstites ne ejus obliviscantur, ante-
quam cadaver humo obruatur, ei offer-
re res adinstar convivii valedictorii. Ca-
davere jam humo obruto iterum ei alia
offerunt, nec unquam offerentes vide-
runt vitâ functum rediisse ad edenda ea
quæ ipsi oblata sunt. Interim ab antiquo
ad hæc usque tempora nunquam hæc of-
ferendi cæremonia interrupta est *ci* dicta ad
conservandam defunctorum memoriam.

Caput 1.
§ 1. 1. n.

Explicando hæc verba Doctor *Chin ho*
sub imperio *sing chao*, inter alia dicit:
Quis unquam vidit defunctum aliquem rediis-
se ad edenda sibi oblata? neque fit hac obla-
rio nisi ad declarandam seu conservandam
gratam memoriam ejus principii, à quo quis
genitus est; & hac fuit intentio Regum anti-
quorum, qui eam instituerunt.

ib. n. 2.

In eodem capitulo iterum dicitur. Ri-
tus *ci* fit ab offerente ut is muneri suo satisf-
faciat. Absit ut credatur aut putetur vitâ fun-
ctum eo frui sit enim solum ad declarandum
honorem, quem in suo corde defunctis habet.
Quæ verba eadem ferè glossa explicat dic-
tus Commentator.

ib. n. 3.

In eodem libro *Liki* Capite *chutung* dici-

ib. §. 2.
num. 4.

„tur, idèd solùm fieri *ci* ut suppleat vicem
 „obsequii, quod viventibus parentibus ex-
 „hibebant, alendo eos propter pietatem
 „quam in corde suo habent filii erga pa-
 „rentes. Idem dicit Commentator dictus
 „Ing. xy.

ib. n. 5. „In eodem capite dicitur quomodo ma-
 „ritus ac uxor debeant facere *ci* & quod
 „obedientes suisque parentibus obsequen-
 „tes faciendo *ci*, certò accipient bona
 „aliqua, non mundi, sed quæ sequuntur
 „quasi naturaliter ex ipso *ci* videlicet bo-
 „nam famam, concordiam, pacem, &c.
 „Quia tempore faciendi *ci* consanguinei
 „simul conveniunt, & hoc ipsum videtur
 „esse motivum amoris mutui pacisque in-
 „ter eos augendæ confirmandæque.

cap. 4. „In Libris *Liki* tomo 2. capite *tang ki*
 nu. 50. „Confucius ait. Gubernium gerens uti Im-
 „perator, honorando senes præbebit exem-
 „plum subditis obsequendi parendive ma-
 „joribus. Item dixit: oblationis tempore
 „adhibendo substitutum, seu xy in proa-
 „vorum aulis, adhibendo eorum tabellas,
 „ostendet subditis quod & ipsi habent cui
 „vel quibus serviant. Instaurando proavo-
 „rum aulas reverenterque peragendo quæ
 „spectant ad oblationem, instruet subditos
 „de recolendâ proavorum memoriâ, qui-
 „bus, cùm viverent, obedientiam debebant,
 „quæ omnia ad detinendos subditos insti-
 „tuta fuere, id est in dictâ obedientiâ. His
 „tamen non obstantibus subditi parentum
 „suorum obliviscuntur.

Ex

Ex his patet, quæ è tractatu Illustrissimi D. Gregorii Lopez exseripsimus, Sinenſes cum eas de quibus egimus cæremónias instituere, eò ſpectaſſe tantum ut pacem & concordiam in familiis retinerent; teneriſque puerorum animis debitam erga parentes obſervantiam gratosque memoris animi ſenſus inſpirarent.

Et verò dum tantos maioribus etiam deſunctis honores à Patre exhiberi advertit natus, pronum eſt ſanè ut quaſi ſpontè ſua debitam patri obſervantiam cæteraque pietatis officia ultrò ac volens præſtare allueſcat.

Par eſt etiam de ſubditis erga Principem ratio. Neque enim ægrè adducentur ut Imperatoribus pareant, eorumque ſe ſubſciant legibus; ubi viderint Reges ipſos ſuas etiam talis officii implere partes; eoſque maioribus ſuis ipſique Confucio Summorum legum conditori ſuos honores perſolvere.

Conſanguinei denique cum certis temporibus ad exolvenda hæc officia convenire ſeneantur, ſit ut unâ tum colloquantur, ſalutent ſe invicem, redintegrent amicitias, undè alitur non parùm atque augeſcit inter familias concordia.

III. PROPOSITIO.

Locus ille, in quo prædicti honores Confucio mortuiſque exhibentur; aula eſt, non templum.

Probat hanc propositionem Illustrissimus
D. Gregorius Lopez sequentibus verbis.

in præ-
far not.
2.
„ Quod ad literam seu vocem *miao* quæ
„ in ordine secunda est, quod supra dic-
„ tum vocabularium Sinicum in illius ex-
„ plicatione sic dicit *miao che mao ye fang*
„ *fue sien jen chy jung mao ye*. Hoc est,
„ littera seu vox *miao* significat aspectum,
„ effigiem, apparentiam seu figuram ex-
„ teriorem hominis seu alterius rei, adeo-
„ que subdit, ipsa vox seu litera *miao* vi-
„ detur significare quandam figuram exte-
„ riorem, effigiem seu aspectum homi-
„ num defunctorum; id autem impro-
„ priè seu metaphoricè dici certum est.

„ Item in libro *Xu ting*, ubi de pala-
„ tio Imperiali antiquorum Imperatorum
„ fit sermo, dicitur quod eo tempore in
„ dicto palatio novem salæ seu aulæ re-
„ periebantur, hoc enim indicant hæc
„ verba *fuen goey kicu kiu*, inter quas una
„ dicebatur *ching yang miao*, ubi ipse Im-
„ perator quiescere seque recreare solebat.
„ Quapropter prædictæ vocis & literæ *miao*
„ varius deducitur usus....

„ Illud autem scias velim *yuen miao* seu
„ aulam ad cultum Confucio seu *kung* præf-
„ tandum dedicatam, non omnibus aper-
„ tam esse ut quacunque horâ vel die il-
„ lam quisque pro libito ingrediatur sive
„ recreationis causâ sive ad cultum ali-
„ quem exhibendum, prout omnibus ido-
„ lorum templa ingredi licet; sed tantum

statutis temporibus iis, qui ex ordine
sunt litteratorum.

Illustrissimus hujus Imperii, quod 715.
abhinc annis cæpit, autor & doctor *chu-* cap.
by, quem Rex titulo *vuen kung*, quæ est §. 1.
tertia post regem dignitas, decoravit, 30.
commentatus est istos libros, quos ini-
tio dixi haberi in Sinis quasi canoni-
cos, & commentarius ejus est summæ
authoritatis, quem literati omnes se-
quantur in suis litterariis certaminibus,
eo quod optimus magistri sui Confucii dis-
cipulus habeatur.

Ejus opus est *kiali*, quod est Rituale ib.n.31.
hujus regni. In hoc libro vocat aulas de-
functorum *Tsu-tang* quod explicans com-
mentator quidem *Liuxi hoe jun* dictus citat
aliud autorem contemporaneum magis-
tri sui *chu vuen kung* nominatum *chin-y* di-
centem. Antiquitus vassalli nullâ in digni-
tate constituti non habebant *miao* seu au-
lam defunctorum, sed in domibus suis
privatis faciebant *ci* seu oblationem.

Postea dictus Doctor *chin-y* dixit posse
tales vassallos habere aulas suorum de-
functorum, modò non eas vocarent *miao*,
sed solum *Ing-tâng*, id est aula umbra
repræsentativa proavorum defunctorum.
Postea idem ipse judicavit non esse tam
idoneas has duas voces easque immutavit
vocans eas *Su-tang*, quæ voces seu literæ
in substantia idem significant, quæ postea
chu vuen kung approbavit.

„Nota de duabus vocibus *Tsu-tang*, vo-
 „cem seu literam *tsu* non significare aulam
 „seu templum proavorum, quia etiam hu-
 „jusmodi aulae dedicantur hominibus insig-
 „nibus adhuc viventibus & has aulas vo-
 „cant *seng-Hu*.

IV. PROPOSITIO.

Constat Confucium aut progenitores
 pro numinibus à Sinensibus non habe-
 ri; à quibus nec petunt quidquam nec
 sperant.

Probat hanc propositionem Illustrissimus
 D. Gregorius Lopez sequentibus verbis.

cap. 3. „In eodem libro *Liki* tomo 5. *kien ty xe*
 §. 2. „capite *Liki* hæc habentur. *Kium che iye*
 „*ci su co ku*, &c. id est, author ipse qui
 „Rituale composuit dicit: in oblationibus
 „seu Sacrificiis, *ci* non esse petendum ali-
 „quid seu non esse effundendas pre-
 „ces

„In Rituali *Cheuly* dicto, quod hac de
 „causâ legi, tomo 3. cui titulus *chun kuon*,
 „ubi expenduntur declaranturque ea om-
 „nia quæ ad præfatos oratores seu cære-
 „moniarum magistros spectant, nullum
 „verbum inveni directe, manifestè clarè-
 „que indicans in oblationibus proavis fa-
 „ciendis, utendum esse precibus.

„Refert Historia regni sub Imperio pri-
 „mo *Han* Regem *han-kao chu*, dictique
 407 r. „Regis ultimos abnepotes & his remo-
 22 55.

tiores prædictum Confucium titulo *kung* " seu ducum dignitate donasse. (*Quod cer-* " *tè fuisse omnino ridiculum, si pro numine vel* " *Sancto apud Sinas haberetur.*

Nota quod opinione mea vox *Xing* " non significat hic (ubi de Confucio) *San-* " *ctum*, sed sapientem, seu valde sapien- " *tem*. Ad quod breviter demonstrandum " dico ipsum *mem-chu* habere titulum *jo* " *xing*, quod est secundus sapientissimus : " & tamen nem-o dicet hunc pro sancto " haberi : Ergo in eodem sensu, quo in- " telligitur *xing* de *mem chu*, intelligen- " dum quoque est de Confucio. " ibid. n. 60.

Item alios inferiores ac secundæ sapien- " tiæ vocant *tien*, non autem *xing*, Docto- " res autem vocant *tien-ju*; atque sensim " ita attollunt titulos Sapientum ac Lite- " rariorum nullâ sanctitatis mentione facta : " Ergo in eodem sensu quem dant titulis se- " cundi sapientis & sequentium, intelligen- " dus est titulus primi sapientis Confucii, " ne extra lineam gradationis seu Ordinis " sapientiæ prolabantur. "

Mandavitque præfatus Rex ut secun- " dâ lunâ veris, secundâque autumnii of- " ferrentur Confucio capra, porci, panni " serici, vinum, fructus, & ut etiam Re- " ges Imperatoresque Confucio se se incli- " narent. Cujus rationem alio in libro red- " didit; estque quod Rex Confucium ma- " gistri loco habet, atque ita se se ei incli- " nat. Cum interim, si eum Reguli loco "

„haberet ut cæteri Reges, qui eum hoc ti-
 „tulo decorarunt, non posset se ei Impe-
 „rator inclinare cum *vuang* seu Regulus
 „Imperatore sit inferior. (*Qua ratio ni-*
hil probaret, si pro Sancto Confucius habe-
retur.)

cap. 5. „Quantum ergo ad illud, quod caput
 §. ultim. „est in hac controversia *ci* seu oblatio-
 mea o- „num proavis defunctis offerendarum, vi-
 pinio. „delicet, utrum vivi ab eis sperent bona
 „aliqua, petantve! Dico quod cum lego
 „libros Sinicos, quamvis textus aliquos
 „invenerim, qui primâ facie id videntur
 „affirmare, prout suprâ dixi, tamen inf-
 „pecto contextu antecedentium ac conse-
 „quentium, commentatorumque exposi-
 „tionibus, reverâ non invenio textus, qui
 „id manifestè doceant vel asserant. Diffici-
 „liores autem suprâ jam referendos cen-
 „sui, ex quibus etiam nullus saltem com-
 „munis ritus exorandi proavos deduci
 „posse videtur, sicut etiam inde vel ex
 „aliis libris, classicis saltem, deduci ne-
 „quit quod Sinenſes proavis suis divini-
 „tatem aliquam attribuant, excepto uno
 „vel altero de quo suprâ, &c. (*Sed iis*
etiam respondit.)

„Idemque dico in ordine ad eorum def-
 „censum fruitionemque oblato-
 „rundem in tabellis præsentiam seu assi-
 „stentiam. Nihil enim horum omnium cer-
 „tò seu firmiter credebant antiqui, jux-
 „tâ ea quæ in libris vidi.

Confucium quod attinet, dico non tantum veteres sed & modernos ac praesentes nequaquam ab eo petere aut sperare quidquam; exceptis qui supra, & nonnullis ludimagistris, infimae notae hominibus, qui ad parvulos animandos, Confucii nomen in charta descriptum eis proponunt, eosque huic se inclinare jubent, ingenium à Confucio eis conferendum dictitantes.

In urbe quoque *Fochou* audiivi à paucis annis nonnullos tanquam haereticos Sectae *Tao*, coepisse idolum Confucio ponere, ab eoque bona petere eique libellos supplices scribere, & hos comburere cum aliis, quos idolis scribunt, coram quibus eos libellos simul omnes comburunt.

V. PROPOSITIO.

Falsum est in hanc opinionem Sineses venisse ut existiment progenitorum defunctorum animas praesentes in tabellis adesse aut eò se sistere, dum ipsis honores, de quibus egimus, exhibentur.

Probat hanc Propositionem Illustrissimus D. Gregorius Lopez sequentibus verbis

Libro *liki* capite *kioli* dicitur aedificandum esse aulam defunctis, ibique tabellam collocandam.

cap. 4.
nu. 43.

“

„ *Pehutung* , qui floruit sub imperio
 „ *Han chao* dicit : Causa faciendi dictam ta-
 „ bellam est , quia cùm anima seu spiritus
 „ defuncti invisibilis sit , aliquid visibile
 „ requiritur ad excitandam memoriam pa-
 „ rentum in filio , ubi cor filii conquiescat
 „ seu innitatur ; Ad quod respiciat , cujus
 „ aspectu consoletur. Tabella ergo sit ex
 „ ligno , quia arbor homini similis est , in
 „ eo quod principium habeat , è quo nas-
 „ citur ; itemque finem. Scribitur nomen
 „ defuncti ut posteris constet , cujus sit ta-
 „ bella.

ibid.
 nu. 46.

„ *Hui-xin* sub Imperio tertii *Han* dicit
 „ tabellam esse debere quadratam , conf-
 „ tantem è duabus , quarum una alteri
 „ commissa sit. Imperatoris tabellam esse
 „ debere unius pedis ac quatuor digitorum
 „ longitudine , Reguli verò pedis tantum :
 „ & unicuique adscribendam esse digni-
 „ tatem quam habet. Hæc tabella est ima-
 „ go spiritus. Filii enim pii sepulto paren-
 „ te non habent ubi cor eorum conquies-
 „ cat ; ideoque faciunt tabellam ut ei ser-
 „ viant.

Ibid.
 nu. 48.

„ *Chin-hô yuangie* Sub eodem Imperio
 „ hac de re agens dicit ; hoc totum fit ad
 „ manifestandam pietatem filiorum seu re-
 „ verentiam filialem , imaginando quan-
 „ dam similitudinem , seu tanquam ibi ad-
 „ essent proavi , atque ita à rege usque ad
 „ infimum Mandarinum suas singuli ta-
 „ bulas habere debent ad inscribendum

xingo

Xingo cy, id est locus sive sedes spirituum.

Liber *Kiali* seu rituale dicit quod in anteriori parte tabellæ hoc modo scribendum sit, videlicet, N. Mandarinini, hujus vel illius ordinis &c. *Xin-chou*.

Doctores autem *Hia-xin*, qui suprà, explicans illam vocem seu litteram *chu* dicit: *chu che xin Siang ye*, hoc est, id quod *chu* dicitur, (subintellige hic) idem est ac imago spiritus seu defuncti: adeoque suprascripta formula scribenda in tabella facit hunc sensum: Imago Spiritus N. Mandarinini, &c.

Ex dictis videri potest quod defunctorum tabellæ non semper seu ab omnibus dicantur vel inscribantur *Xin gocy*, id est, locus seu sedes spiritus, sed quod etiam à multis inscribantur ut suprà *xin chu*, hoc est, imago spiritus.

Chu vuen kung dicit ipsos *kuey-xin* seu spiritus non esse aliud quàm demitti, attolli, intrare ac respirationem. . . . Dicet aliquis: Si non dantur spiritus, quomodo dicuntur debere proavi defuncti? (ait) Respondeo id tantum dici ad movendum, & quia tantillum superest de eorum spiritu. Sicut v. g. quando ex arbore desumptus ramus aut semen, plantatur aut feritur, licet sicceretur truncus, adhuc dictus ramus plantatus crescit, & semen latum nascitur seu germinat; & hoc quia sicci

„ illius trunci quædam adhuc virtus re-
 „ manet in ramo & semine , quali arbor
 „ illa adhuc extaret. Filius ergo offeren-
 „ do parentibus , si ex corde ac reveren-
 „ tur celebret hujusmodi ritum , videbi-
 „ tur parentum spiritus adhuc aliquantulum
 „ in filio remansisse. Si vero ille non ex
 „ corde aut irreverenter peragat , nullate-
 „ nus videbitur spiritus dictorum paren-
 „ tum in filio remanere. Quare totum es-
 „ se spiritus defunctorum consistit in cor-
 „ de filii.

FINIS.

Retro-scriptum nostrum tractatum de
 cultu à Sinensibus exhibito defunctis ac
 Magistro Confucio primum sub Superiori
 formâ data à nobis tunc Missionarium a-
 gentibus confectum , nec-non post suscep-
 tum à nobis Episcopale ac Vicarii Aposto-
 lici munus , de nostro mandato & se-
 cundum dictamen , mentem , voluntatem-
 que nostram , per R. P. Fr. Joannem Fran-
 ciscum à Leonissa Ord. Minorum Stricteris
 Observantiæ , nostrum Notarium Apostoli-
 cum ac Provicarium Generalem , in me-
 liorem formam redactum & auctum , &
 propria ejusdem manu latine scriptum , &
 signatum , nostro etiam manuali signo sigil-
 loque , in horum & in ipso contentorum
 omnium fidem , muniri volumus. Datum

Epistola.

35

in Ecclesia Societatis J e s u in Oppido
Xang hai Provinciae Nankini 18. Augusti
anni 1686.

Fr. GREGORIUS LOPEZ Epif-
copus Basilitanus & Vicarius
Apostolicus Nankini, &c.

Sigillum.

De Mandato Illustriss. ac Reveren-
dissimi D. D. Episcopi Basilitani qui suprà,
Fr. Joannes Franciscus à Leonissa, Ord. Min.
Strict. Observantiae Notarius Apostolicus ac
Provicarius Generalis, &c.



INDEX

FACTORUM ET RERUM de quibus agitur in his tracta- tibus.

TESTIMONIUM luculentissimum R. P. Fran-
cisci Maria à S. Petro vulgo Sarpetri Ordini
Prædicatorum, de libro Sinico P. Matthæi
Ricci è Soc. Jesu. pag. 1.

Ejusdem testimonium pro praxi Patrum Soc. Jesu
quam non modò tutam sed oppositâ probabi-
liorem asserit, & necessariam. p. 4. & 5.

Controversiam de cultu Sinico difficilem reddit am-
biguitas litterarum & verborum Sinicorum,
itaque prudenter factum à PP. Soc. Jesu,
ut quod maximè probabile esset, sequeren-
tur. p. 11.

Sacra Congregatio illud in cultu Sinensi permisit
quod civile tantum & politicum est. p. 12.

Missionarii Dominici, Franciscani & Soc. Jesu
simul conveniunt ad statuendum quid in hoc
cultu sacra Congregatio permiserit. p. 13.

Unus Franciscanus omnem sine discrimine cultum
Confucii tollit, & pertinaciæ damnatur à
R. Patre Sarpetro. p. 14.

I N D E X.

Apud Sinas operto quàm aperto esse capite honorificentius est. p. 18.

Opinionem PP. Soc. Jesu circa cultum Confucii oppositâ intrinsecè probabiliorem probat R. P. Sarpetrus ut sua, inquit, conscientia faciat satis. p. 21.

Per suum Xi Sina non agnoscunt Confucium ut supremum Dominum, neque ut Sanctum, nec progenitores ut Sanctos, sed tantum ut vitæ authores, quibus observantiam & grati animi significationem debere se proficiuntur. p. 27.

Per Ci Sinicum, nequidem tacitè & indirectè cultum Religiosum significari probatur septem argumentis, quibus nulla evidentiâ in contrarium ab Adversariis, opponi potest. p. 28. & seq.

Triplex Ci distinguunt Sina: primum offerunt suo Xam-ti: alterum spiritibus inferioris Ordinis quasi Sanctis: tertium Confucio & progenitoribus de se benè meritis. p. 29.

Triplex Ci apud Sinas institutum juxta triplicem ordinem politia Sinica. p. 32.

Olim in cultu progenitoribus exhibito adhibebatur infans velut defuncti viva imago; Nunc loco infantis tabella ponitur. Et neutri plus reverentia exhibetur quàm parenti vivo exhiberetur. p. 35.

Objicitur circumstantias Ci Confuciani & defunctorum manifestè supersticiosas esse. p. 38.

Respondetur sacram Congreg. sublati supersticiosi, liberum reliquisse Tabellarum usum, & quidquid ad cultum civilem & politicum pertinet. p. 42. & seq.

I N D E X.

- Quæ sit intentio Sinarum quando in Cì Confuciano & progenitorum pecudes mactant, & sanguinem ac pilos animalis offerunt.* p. 44.
- An timendum sit ne hæc pecudum mactatio apud Sinas Idololatriam inducat.* p. 46.
- An sacra Congregatio fuerit fideliter informata de his quæ in Sina geruntur?* p. 47.
- Sinas nullam defunctis divinitatem tribuere, nihil ab iis petere, nihil sperare. Propositio est indefinita & non universalis.* p. 49.
- Nota aliquot necessaria ad intelligendos textus librorum authenticorum Sinensium, quibus videtur probari Cì Confucianum & progenitorum religiosum esse.* p. 51. & seq.
- Quomodo consulendi sint litterari Sinenses circa textum aliquem obscurum.* p. 55.
- Sententia PP. Soc. Jesu est magis accommodata ad Doctrinam litteratorum Sinensium, qui sunt authores Sinicorum rituum.* p. 55.
- An sit certum cultus religiosi signum appellari Xing seu sanctum apud Sinas. Et quæ sit propria significatio hujus vocis.* p. 56. & seq.
- An qui cærimonias Cì frequentat videri debeat credere Spiritus vesci cibis appositis.* p. 59.
- R. P. Sæpètrus sententiam PP. Soc. Jesu extrinsecè probabiliorè probat quinque argumentis.* p. 62. & 63.
- An PP. Soc. Jesu diligenter inquisierint num quod esset in sua praxi Idololatriæ periculum?* p. 64.
- Consulti Doctores ex Academiis indicis, Macaensi, Lusitanâ, & Romanâ ab hoc omni periculo remotam esse pronuntiant.* ibidem.
- An aliqui è Soc. Jesu aliter senserint, cum Missæ Sacrificium in Catechismis Sinicis per vocabulum*
f ij

I N D E X.

- Ci appellaverunt ?* p. 66.
- R. P. Sarpetrus suos Patres Dominicanos obtestatur , ut suas pro Jesuitarum sententiâ rationes aquo animo perpendant.* p. 67.
- Elogium Missionariorum Soc. Jesu à R. P. Navarretta Dominicano in Epistola gratulatoria ad R. P. Joannem Paulum Oliva Soc. Jesu Prapof. Generalem.* p. 69.
- R. P. Navarretta Dominicanus significat se adhaerens statutis PP. Soc. Jesu in urbe Antheon factis.* p. 74.
- Exemplum hujusmodi statutorum R. P. Navarrette subscriptione firmatum , ubi quid tollendum sit , quidve retinendum recensetur.* p. 76. & sequ.
- Responsum R. P. de Govea Soc. Jesu Vice-Provincialis Sinensis ad Superiora duo scripta R. P. Navarretta Prapofiti Superioris Dominicanorum,* p. 80. & 81.
- An liceat nomine Xam-ti verum unumque Deum appellare?* p. 82.
- Ministri Evangelici tenentur docere Sacrificia omnia praterquam Deo esse illicita.* p. 83.
- Declarat. R. P. Sarpetrus quanto suo gaudio R. P. Navarretta ejus Superior statutis à PP. Soc. Jesu circa cultum Confucianum &c. adhaerit.* p. 84.
- Idem declarat praxim PP. Soc. Jesu sibi videri relictissimam , & decretis Capitulorum sui Ordinis , & Epistola sui Generalis consentaneam.* p. 85.
- Quasitum à Missionariis Tunkinensibus an liceat Litteratis & Laureatis Christianis cum infidelibus Litteratis convenire ad cultum solitum Confucio exhibendum.* p. 86.
- Respondet R. P. de Paz Dominicanus licere finito*

I N D E X.

- Sacrificio , modo nullam in Confusio Divinitatem & potestatem humanâ majorem agnoscant.* p. 86. & seq.
- Idem R. P. de Paz probat in regno Sina nullam in Confusio Divinitatem aut potestatem humanâ superiorem agnoscî.* p. 87. & seq.
- D. Greg. Lopez Episcopatum non accepit , nisi ex obedientia SS. Papæ Innocentii XI.* p. 2.
- D. Greg. Lopez decernit cogere concilium Missionariorum ad discutienda puncta controversa, ibidem.*
- D. Greg. Lopez testatur Litteras P. Verbiest Soc. Jesu multum profuisse ad sedandam persecutionem exortam in urbe Fôgân.* p. 3.
- Statuitur ut Missionarii Dominici & Soc. Jesu suas separatim informationes mittant Romanam.* p. 5.
- Huic consilio adversantur aliqui recentes Missionarii Dominici lingua & rituum Sinicorum ignari.* p. 6.
- Inaugurationem D. Greg. Lopez P. Provincialis Ordinis S. Dominici idem conatur impedire , quod Patribus Soc. Jesu suffragaretur.* p. 7.
- D. Gregor. Lopez malè & indecorè tractatus ab eodem P. Provinciali clam cogitur divertere apud Patres Ordinis Eremitarum S. Augustini.* p. 8.
- D. Greg. Lopez apud R.R. Cardinales Sacra Congreg. per Litteras conqueritur , quod Patres sui Ordinis ejus inaugurationi se opponant.* p. 11.
- P. Provincialis Dominicanus D. Greg. Lopez increpat quod absque sui licentia Episcopatum accepit , & Episcopalibus insigniis uteretur.* p. 13. & seq.

I N D E X.

- D. Greg. Lopez benignè suscipitur à PP. Augustinianis & præsertim à P. Josepho Duque eorum Provinciali.* p. 16.
- Rationes quinque ob quas Adversarii improbant Sinensium caerimonias.* p. 17.
- Refutantur totidem propositionibus D. Gregor. Lopez Episc. Ordinis S. Dominici.* p. 18. & seq.
- 1^a. Propositio : Vox Ci convivium celebre & cum apparatu significat, non autem Sacrificium.* p. 18.
- 2^a. Prop. Quaecumque Confucio mortuisque offeruntur, ea non sunt Sacrificium, sed mera urbanitatis officia.* p. 20.
- 3^a. Prop. Locus in quo honores Confucio, mortuisque exhibentur aula est, non templum.* p. 25.
- 4^a. Prop. Constat Confucium aut progenitores pro Numinibus à Sinensibus non haberi, à quibus nec petunt quidquam, nec sperant.* p. 28.
- 5^a. Prop. Falsum est Sinenses existimare progenitorum defunctorum animas præsentem in Tabellis adesse, aut eò se sistere, dum ipsis honores, de quibus agitur exhibentur.* p. 31.

F I N I S.

Errata corrigenda.

Pag. 6. lin. 8. novissimæ. *lege* novissimè.

Pag. 19. lin. 23. meam. *lege* meum.

Pag. 83. lin. 15. ab basptismum. *lege* ad baptismum.


In 2^a. Parte.

Pag. 9. lin. 6. S. R. P. *lege* S. R. E.

Pag. 20. lin. penult. inferendo. *lege* in ferendo?

Pag. 34. lin. 4. reverentur, *lege* reverenter.





ADDENDA

Ad paginam 85. post declarationem R. P. Sarpetri.



EXCERPTA

*Ex Navarreta Tomo 2. de rebus Sinicis
Pagina 2. col. 1. num. 1.*

Quis me unquam de Societate loquentem audivit nisi summâ cum laude & honoris significatione? nonne Pekino ad R.P. Oliva sanctæ illius familiæ Generalem litteras dedi quibus commemorabam quot & quantæ essent ejus filiorum virtutes, qui labores in vinea Domini inter Sinas excolendâ, quanti fructus ipsorum operâ collecti; aliaque ejusmodi eximia & plane singularia? Ad hæc prædicabam quâ benevolentia, quo amore, quâ charitate complexi essent Missionarios tum ex S. Francisci, tum ex S. Dominici Ordine quorum omnium testes appello PP. Societatis quotquot jam in Sinicâ Missione versantur. Nonne postea Cantone quâ in urbe per annos quatuor eâ concordia viximus quâ Germanos fratres eodem patre, eadem matre natos decet, alteram Epistolam ad eundem R. P. scripsi, alteram item ad R. P. nostrum Generalem:

quâ in utrâque referebam , quam multa ac præclara essent Patrum Societatis in nos omnes merita ? His omnibus nihil verius.

Ex his apparet minimè fictas esse litteras quibus P. Navarreta Jesuitarum Sinensium virtutes , labores Apostolicos , laborumque fructus , charitatem , in ipsum ac suos prædicat , iis planè contraria quæ scriptis deinde libris toto orbe vulgavit.

Pag. 6. col. 1. num. 1. Mihi quidem libri Sinicè à Patribus Societatis editi non bene tantum , sed optimè scripti videntur : laborem laudo , eruditionem admiror , grates ago quàm maximas : illos de nobis optimè meritos sincerè professus : quippe cum sine ullo labore nos Franciscani ac Dominicani illic nacti simus quæ usui nobis essent ubi res posceret.

Hinc rursùm apparet quantum fidei mereatur P. Navarreta , ubi de Sinensibus Jesuitis sic loquitur quasi præ illo & quibusdam ejus sodalibus vix tirones forent in linguâ litterisque Sinicis.

Pag. 11. col. 2. num. 1. Dubitari non potest quin ex illâ diversitate sententiarum inter Missionarios Sinenses plurimum boni existerit. Inde enim effectum est ut multis in rebus quid verum sit perspectum haberetur , & dubitationes multæ tollerentur. Ita jus positivum apud Neophytos promulgatum est tanquam legis vim ac robur obtinens : Ita nos Franciscani & Dominicani didicimus nunquam PP. Societatis permisisse Christianis ut interessent solemnibus illis sacrificiis , quæ offerre magistro suo Confucio litterati solent : quanquam hi Patres , saltem plerique veram

sacrificii rationem in iis ritibus cærimoniisque inesse non agnoscant.

Pag. 369. col. 2. num. 14. Ex eo quod P P. Societatis prædicta sacrificia non permittant, P. Brancatus apologiæ suæ fol. 5. pag. 1. Societatis Missionarios ab eo longe abesse ut superstitiosum quidquam permittere in animum inducant. Sed nihil horum asserere necesse fuit, ut ad *informationem* meam responderet. Probari semper debet quidquid bonum atque honestum est. Quod in eâ re sequuntur PP. Societatis, valdè consentaneum est Apostoli præcepto, 1. Thessal. cap. 1. *Ab omni specie malâ abstinete vos.*

Pag. 391. col. 2. num. 14. Illa verò nequitia (*Jesuitarum*) fuit, quod tam multis annis tacerint se solemnia Confucii sacrificia non permittere : Quod si essent professi, certum est malorum ingentium occasionem fuisse tollendam : ego quidem certè cauteriatis hujusmodi conscientias mirari satis nequeo.

Pag. 451. col. 2. num. 3. P. Didacus Morales (è Societate Jesu) Apologiæ suæ lib 2. cap. 4. num. 8. planè sic habet. *Altera responsio est. PP. Societatis, quemadmodum jam diximus, Christianis suis non concedere ut offerant Confucio neque carnes, neque sericos pannos &c. multò verò minus ut rerum hujusmodi reliquias servant. Hoc ipsum est quod ait P. Hurtadus Vice-Provincialis post factam diligentem rei totius Inquisitionem. Unde Christiani à nobis ritè edocti, in confessione peccatorum peragendâ, religioni ducunt vel levissimum quid reticere quod contra istam suorum pastorum prohibitionem admiserint : Hæc P. Morales. Ad*

quæ ego me superius respondisse dico. Addo jam plurimum debere nos ob id rectè factum PP. Societatis : debituros verò amplius, si ante hos 30. annos fecissent nos eâ de re certiores.

Tria quadam ex his manifesta fiunt. Primum, est notum fuisse persuasumque P. Navarreta Sinenses Jesuitas nequaquam indulsisse Neophytis ut solemnibus illis Confucii carimoniis sub aquinoctia interessent : proinde mendacium esse ubi contrarium discretè asserere non puduit. Alterum est scivisse illum quoque non novam sed perpetuam hanc ab initio existisse Jesuitarum responsionem : quippe quam in Apologiam P. Morales jam anno 1641. editâ legeret : adeoque novum esse ipsius Navarreta mendacium, cum fingit non ante illum annum 1669. hac defensione usos esse, eoque prættextu cauteriatam illis conscientiam exprobrat quasi nequiter ac de industria rem tacuerint. Tertium est nugari novellum Apologistam, qui ne viso quidem * Navarreta libro ariolatur non serid, sed per ironiam ab eo dicta esse quæ ex paginâ illius undecimâ representavimus. Quo quid ineptius excogitari potuit.

Pag. 332. col. 2. num. 3. Ad id quod P. vice-Provincialis refert ex Apologia P. Morales (ea nimirum de quâ modo actum est) respondeo illam anno 1646. apud Mexicum visam esse à me & ab iis omnibus navigationis sociis. Eam quippe P. Maginus secum defererebat in Hispaniam, P. Joannes de Morales (Dominicanus) illi Apologiæ responsionem apposuit, eamque cum D. Joanne Palafoxio Episcopo Angelopolitano communicavit, à quo præ-

* Pag. 302.

Addenda.

dictæ Apologiæ exemplum habueramus illius
curâ descriptum ex eo quod P. Maginus ipsi
legendum commodaverat. Eamdem rursus
Manilæ, deinde etiam hîc in Sinis perlegi.
Hinc aliud ejusdem Apologista somnium rideas,
qui Navarretam ab secundo illo, quod notavi-
mus, mendacio bellè defendere posse sibi visus
*est, si * diceret non prius lectam ipsi fuisse Apo-*
logiam P. Morales, quàm cùm ei à Jesuitis apud
Cantonem ostensa est anno 1667.

* Pag. 304.






DILECTO FILIO
FERDINANDO
VERBIEST
VICARIO PROVINCIALI
SOCIETATIS JESU,
INNOCENTIUS PAPA XI.]

Dilecte fili, salutem.

Incredibilis propè lætitiæ argumen-
tum attulerunt litteræ, quibus post
devotas filialis tuæ erga nos observan-
tiæ significationes, duplex ex amplissimo
istò Sinarum Regno munus ad nos detu-
listi, Missale videlicet Romanum Sinensi
idiomate conscriptum, & imagines Astro-
nomicas Sinensi item more à te affabrè
delineatas ad conciliandum Catholicæ fidei
favorem gentis in omni disciplinâ liberali
excultæ, & ad omnem virtutem mirificè

â



propensæ. Jucundissimum verò præ cæ-
teris fuit ex eisdem litteris cognoscere,
quàm sapienter, atque opportunè profa-
narum scientiarum usum ad Sinensium
populorum salutem, & ad Christianæ
fidei incrementum, utilitatēque desle-
xeris; earum beneficio refellens falsas
criminationes, & calumnias, quibus non-
nulli in Christianum nomen inveheban-
tur, viamque tibi sternens ad eum gra-
tiæ locum apud Sinarum Regem, ejusque
Consiliarios, ut solutus ipse gravibus mo-
lestiis, quas diu forti, magnōque animo
pertulisti socios tuos Missionarios ab exi-
lio revocaveris, & Religionem ipsam non
solum pristinæ libertati, dignitatique resti-
tueris, sed etiam ad meliora in dies spe-
randa provexeris. Nihil enim est, quod,
Dei adjutrice gratiâ, sperari non possit te,
tuisque similibus viris apud gentem istam
Religionis causam agentibus, & Rege
ipso ingenio tam solerti, atque animo ad
Christianam pietatem adeo propenso, sicuti
præ cæteris declarant, quæ is authori-
tate, Consilioque tuo adversus schisma-
ticos hæreticosque mandavit, cum econ-
tra Catholicos Lusitanos omni amoris at-
que humanitatis significatione complexus
sit. Reliquum est, ut merito, quod in
commisâ tibi Provincia gerendâ egregium
hactenus comparasti, recentibus quotidie
religiosi zeli, consuetæque industriæ

documentis majorem cumulum adjungas. In quod opus omnia tibi à Pontificiâ charitate, & ab hac sanctâ sede polliceri debes; cum nihil antiquius pro Pastoralis nostro munere habeamus, quàm Christi fidem feliciter adolescere, & propagari in nobilissimâ istâ & florentissimâ Obis terrarum Plagâ; quæ quidem quamvis à nobis immenso penè terrarum tractu sejuncta sit, proximam tamen, imò præsentem facit Charitas Christi, cujus impulsu in Populorum Sinensium æternam salutem sollicitudinis nostræ oculos, curasque continenter intendimus. Pii interim laboribus & conatibus tuis, tuorumque Sociorum bene precamur, & paterni, quo vos, & omnes Sinensis Regni fideles in Domino complectimur, amoris indicem Apostolicam benedictionem peramanter impertimur. Datum Romæ 3. Decembr. ann. 1681.



ILLUSTRI

AC

POTENTISSIMO

UTRIUSQUE TARTARIÆ

ET

SINARUM IMPERATORI,

ALEXANDER PAPA VIII.


ILLUSTRIS, AC POTENTISSIME

Imperator: salutem, & lumen di-
vina Gratia.

CElissimorum decorum quibus insigni-
 ris, fama non intra Imperii quamvis
 amplissimi tui fines concluditur, sed
 diffitas quoque magno locorum intervallo
 Regiones peragrat: præclarosque ubique
 Terrarum inclito nomini tuo plausus excitat.
 Quia verò inter ea decora præcipuè re-
 censerì propensam voluntatem, quâ So-
 cietatis J e s u Missionarios respicis, ex
 constanti jampridem ipsiusmet famæ testi-

monio ; recenterque à Patre Claudio
Philippo Grimaldo ex eadem Societate,
uberius cognovimus , nostrarum esse par-
tium duximus , amantissimis hisce lite-
ris, gratos tibi hac de causa cordis nostri
sensus luculenter explicare , ac benefi-
ciis , quæ in prædictos Missionarios ,
Pekini specialiter , in celeberrima aula tua ,
ante & post eorum obitum , liberali-
ter effundis , aliqua saltem ratione res-
pondere. Sanè cum hi qui ex deputatio-
ne nostra , posthabitis omnibus hujus
vitæ commodis , post exantlata Terræ
Marique innumera penè discrimina , istuc
adveniunt , non aliud sibi lucrum pro-
positum habeant ; quam publicum Im-
perii tui bonum , & æternam animarum
salutem , quæ à Catholicæ fidei Professione
unicè pendet , digni profectò sunt ,
quos florentissimis tuis in ditionibus su-
premo patrocínio tuo tuearis , atque cu-
stodias. Cum autem præ cæteris , qui
arduum istud iter modò sunt aggressuri ,
ob familiæ ex quâ originem trahit ful-
gorem , nec non ob virtutum , scientia-
rumque , quibus abunde præditus est
excellentiâ ; nobis admodum probetur
Pater Franciscus Maria Spinola è Societate
pariter Jesu , insigni virorum pietate , ac
doctrina præstantium Officinâ , quamque
propterea magnopere diligimus , has id-
circo literas tibi reddendas eidem Patri

tradidimus ; injunximusque , ut disertè te doceret , quo in honore , ac existimatione apud nos sis , & quàm cupiamus hujusmodi existimationem , in occasionibus , quæ se offerent , splendidis documentis manifestam facere. Reliquum est, ut Præfatum Patrem , unâ cum Sociis , verhumaniter excipias , dum nos non omittemus impense rogare eum , à quo est omnis potestas & Imperium , ut lætos tibi , faustosque successus tribuat , perfectumque inprimis veritatis suæ lumen ostendat. Datum Romæ apud S. Mariam Majorem sub Annulo Piscatoris die XXIV. Julii M. DC. LXXXX. Pontificatus Nostri anno primo.



ILLUSTRI

AC

POTENTISSIMO

UTRIUSQUE TARTARIÆ

ET

SINARUM IMPERATORI,

INNOCENTIUS PAPA XII.

*ILLUSTRIS, AC POTENTISSIME
Imperator salutem, & lumen di-
vine Gratia.*

CUm nobis non minùs, quàm fel. re-
cord. Alexandro VIII. Prædecessori
nostro, in cujus locum, immerentes
licet, ad Ecclesiam Dei regendam suffecti su-
mus, cognita, ac perspecta sint effusa supre-
mæ benevolentiaë testimonia, quibus So-
cietatis JESU Missionarios ad æternam
animarum salutem indefessis studiis pro-
curandam istuc advenientes prosequeris,
muneris esse nostri duximus, gratos, hac

de causa ; prædicti Prædecessoris nostri
 erga te sensus , à P. Francisco Maria Spi-
 nola ejusdem Societatis , quemque nos
 ob singulares illius dotes , ac præroga-
 tivas majorem in modum cordi habemus,
 tibi explicandos , hisce nostro Nomine
 confirmare , nullam quæ se offerat occa-
 sionem dimissuri luculenter declarandi ,
 quanti celsissima , ac toto Terrarum orbe
 celeberrima decora tua faciamus. Tibi ve-
 rò interim cum ad perfectam divinæ ve-
 ritatis agnitionem , tum ad omnem re-
 rum secundarum faustitatem , Omnipoten-
 tem Deum propitium , faventemque
 ex intimis animi nostri penetralibus accu-
 ratè precamur. Datum Romæ apud S.
 Mariam Majorem sub annulo Piscatoris,
 die 2. Septembris 1691, Pontificatus Nostri
 anno primo,



